

বানাপানির সালে



প্রভাস কান্তি সিংহ

বানাপানির সালে

প্রভাস কান্তি সিংহ

নিখিল বিষ্ণুপ্রিয়া মণিপুরী সাহিত্য পরিষদ

ভকতপুর, শিলচর - ৫

BAANAAPAANIR SAALE : A collection of short stories in Bishnupriya Manipuri language by Prabhas Kanti Sinha.

পইলা সংস্করণ	ঃ পৌষ সংক্ৰান্তি ১৪১২ বাংলা (১৪ই জানুৱাৰী ২০০৬ ইং)
©	শ্ৰীমতী প্ৰমিলা সিংহ (পুনু) বিবেকানন্দ ৰোড, শিলচৰ - ৭
প্ৰকাশনা	ঃ নিখিল বিষ্ণুপ্ৰিয়া মণিপুৰী সাহিত্য পৰিষদ ভকতপুৰ, শিলচৰ - ৭
প্ৰচ্ছদ পৰিকল্পনা	ঃ প্ৰভাস কান্তি সিংহ
কম্পিউটাৰ কম্পোজিং	ঃ বাবুল সিংহ (নিভা) চন্দ্ৰপুৰ
ছাপনিং	ঃ অভিষেক প্ৰিণ্টাৰ্স অম্বিকাপট্টি, শিলচৰ - ৪
মূল্য	ঃ আককুড়ি দশহান

উৎসর্গ

সমাজহানরে বানাপেয়া
তেত্তগ অয়া কাম করেসিলা
বার এবাকাউ করে যিতারাগা
তানু হাবির নিঙে লেরিক এহান
উৎসর্গ করলু -----



দ্রোণাচার্য্য রামায়ণ

আমেরিকান বুক স্টোর (১৯৩৩)

শিখারতনী রাস্তা, কলিকাতা

নাম: কলিকাতা রাস্তা

— কলিকাতা

প্রকাশকর হেইচা আকচুটি

সাহিত্য শব্দ এহানে মানুর লগে মানুর প্রেম, বানা নুংশি, মিলন একতা হাবি আনে পারের। কুন কুন গিরিগিথানি নিজর জাতরে বানাপেয়া জাতর সেবা করানি মনেয়াউ সময়র অভাবে করে নুবারতারা। ঔ কারণে যে সময়হানি পেইতারো উবাকাই সমাজরে কিস্তাউ দিয়া নুবারলেউ লেখনীর মাধ্যমে সাহিত্য হংকরিয়া নিজর ভাব উতা প্রকাশ করে দিতারা। উহান সমাজ আহানরাং ডাঙর সম্পদহান অয়া চিরদিন অমর অয়া থার। ঔ সাহিত্যর মাধ্যমে সমাজে আগর প্রতি আগর বানা নুংশি বার একতা আহের। শ্রী প্রভাস কান্তি সিংহ, সরকারী চাকুরীজীবী অইলেরগায়ো অবসর সময়ে জাতর সেবা করানির নিঙে, প্রতিবেশী আর আর জাতর সাদে বিষ্ণুপ্রিয়া মণিপুরী সাহিত্য এহানরে রূপদেনির নিঙে ‘কারবিদা হৃদি’ বার ‘য়ারির ঝাকা’ নাঙে উপন্যাস আহান বার ছুয়ারি যারির লেরিক আহান সাহিত্য পরিষদেস্ত ফংকরেসিল, যেহান বিষ্ণুপ্রিয়া মণিপুরী সাহিত্যর অমূল্য সম্পদহানি। গিরকে নুবা করে “বানাপানির সালে” নাঙে আরাক লেরিক আহান ফংকরানিত সালসে, যেহানর যারি পাকরলে হুতুমেউ সমাজ আহানরে কতিহান পেয়া বানা পেইলে এসাদে যারি লেখানির ভাব আহে পারের, উহান এরে লেরিক এহানর যারির মাধ্যমে হারপানি পারতাঙাই বুলিয়া আশা করুরি। উহানে লেরিক এহানর নামাকরণহান থনি অসেতাই “বানাপানির সালে”। নিখিল বিষ্ণুপ্রিয়া মণিপুরী সাহিত্য পরিষদর বানান পদ্ধতিত পরিষদর লেপকরা নির্দিষ্ট পদ্ধতি আহান আসে। গিরকর লেরিক এহানাত সাহিত্য পরিষদর ঔ দিগদর্শন উহান কুন ফামেউ ত্রটি নাসে। বিভিন্ন পত্র পত্রিকাত গিরকর প্রকাশিত যারি উতা মাঙ যিতইগা বুলিল ভাবহানলো সমাজরে বানাপানির সালে আকপেইরমা পুন্নাপ করে পুলকরিয়া আনে দেনিয়ে গিরকর সাহিত্য সাধনার উৎসাহ প্রেরণা উহান কতিহান উহানাতেই হারপানি যাকরের। ঔ নিঙে সাহিত্য প্রেমী, সাহিত্য অনুরাগী গিরিগিথানীর মুঙে গিরকর লেংকরা লেরিক এহান সাহিত্য পরিষদর পক্ষন্ত ফংকরানি অইল। আশা করুরি, লেরিক এহানর যারি পাকরিয়া পাঠক পাঠিকা নিশ্চয়ই সাহিত্যর রস পা পারতাই। গিরকে আরাকৌ লেরিক ফংকরিয়া সাহিত্য পরিষদর ভাণ্ডারগ চাংখল করে দিতই বুলিয়া নিঙুর।

লেৱিক এহান ছাপেইতেগা কুন ফামে অনিচ্ছাকৃত ত্ৰুটি থাইতৈ উহান স্বাভাবিকহান, উহানৱকা প্ৰকাশকৰ পক্ষত পাঠক পাঠিকাৱাং ক্ষমা চাউৰি। লেৱিক এহান ছাপেইতেগা প্ৰেসৰ গিৰিগিথানিয়ে যে পাংলাক, বানালো পাঙ্কাল দিলা উহানৱকা তানুৱে ধন্যবাদ জানাউৰি। পাঠক পাঠিকা হাবিহানে পাকৱেদিয়া যাৱিৰ গজে মিল্লেও থদেনিৰ হেইচা কাতকৰুৱি। খামতলে লেখক গিৱকৰ নিৱলস সাহিত্য সাধনা অটুট থাক বুলিয়া ভগবানৱাং প্ৰাৰ্থনা কৰুৱি বাৱ পুন্নিও যৌপা ধন্যবাদ জানাউৰি।

মঙ্গলবাবু সিংহ, এম.এ. নৃত্য নিপুণ

সিঙ্গারী

সাধারণ সম্পাদক

(১৪ই জানুয়ারী ২০০৬ ইং)

নিখিল বিষ্ণুপ্রিয়া মণিপুরী সাহিত্য পরিষদ

লেখকৰ কলমে

সমাজ হুদা সাহিত্যৰকা নাগৈ, কিন্তুমান সাহিত্য হুদা সমাজৰকা। সাহিত্য হুদা সমাজৰকা অৱতা থকয়া যেতা যেতা সমাজৰ হবা অৱ উতাই সাহিত্যৰমা ফাম পানি থক। সমাজ বিৰোধী চিন্তাধাৱা, সমাজৰ ক্ষতিকাক চিন্তাধাৱা সাহিত্যৰমা প্ৰতিফলন অনি থক নেই। সমাজমুখী চিন্তাধাৱা, সমাজ-হিতকৰ চিন্তাধাৱা, সমাজৰ বাৱ ধৰ্মৰ চিৰন্তন ভাবধাৱা সাহিত্যৰমা প্ৰতিফলন অনি থক ——— অন্ততঃ আমাৰ উঠিয়া আয়াৰ সমাজ এহানৰ সাহিত্যৰমা।

সাহিত্য এহান সমাজহানৰ মেংসেলহান বুলিয়া মাতিয়াৰ তা থকয়া সমাজহানৰ ছবি আকেইহান সাহিত্যৰমা প্ৰতিফলন কৰে পাৱানি উহানেই আমাৰ সাহিত্যিকৰ কৰ্তব্যহান।

হবা শাকতি তিলয়াই সমাজ এহান। উহানে সাহিত্যৰমা হবা শাকতি তিলয়া প্ৰতিফলন অইলৈৰগায়ৌ শাকতি উহানৰে শাকতিহান কৰে দেহুৱানি থক। শাকতি কামৰ পৰিণতি নিয়াম দুঃখজনক উতা দেহুৱানি থক। শাকতি উহানে জিঙিয়া ঠুনা নেই। শাকতি উহানৰ পতন অনিবাৰ্য্য। হবা উহানৰে থাকাং দেনি থক, উৎসাহ দেনি থক।

“বানাপানিৰ সালে” মোৰ ক্ষুয়াৰিৰ আৱাক সংকলন আহান। সাহিত্য বানাপানি সমাজ বানাপানিৰ সমান। সমাজ বানাপেইতেগা সমাজৰ বিভিন্ন ছবিল যাৱি লেংকৰিয়া পাকৰেকুৱাৰ মুঙে কাৎকৰলু। মোৰ যাৱিৰমা মুখ্যত সমাজৰ চিৰন্তন ছবি আকেইহান তুলিয়া ধৱানিৰ হমা কৰেসু, আমাৰ ঠাৱৰ মৌলিক বাহি ব্যবহাৰ কৰানিৰ হমা কৰেসু—— কতিহান পাৱেসু উহানৰ বিচাৰ পাকৰেকুৱাৰ গজে এৱাদিলু।

“বানাপানিৰ সালে” লৈৱিক এহান সমাজ বানাপানিৰ সালে সংকলন কৰেসুতা থকয়া সমাজ বানাপাকুৱা হাবিৰ নিঙে উৎসৰ্গ কৰলু।

প্ৰভাস কান্তি সিংহ

আলক চক্রবর্তী

প্রভাস কান্তি সিংহর

প্রকাশিত লেরিকঃ

কার বিদা হৃদি (উপন্যাস)

য়ারির ঝাকা (হরু যারি)

বানাপানির সালে (হরু যারি)

: সূচীপত্র :

বদনচানর মেগা-সিরিয়েল / ১

যমপুরীত লেহাউনু / ৬

অমরী জারমানি / ১২

আট-আনি পালা / ১৬

কদমলেই / ২৪

লেইলেক / ২৯

ছান্তিচর / ৩৭

আত্মার সদগতি / ৪২

বারয়া তেরয়া / ৪৮

বানাপানির সালে / ৫৪

সিন্দূর / ৬৩

দুই নম্বর পুলহান পেয়া / ৭১

বৈতরণী লালৈতেগা / ৭৮

বদনচানর মেগা-সিরিয়েল

খালপারর বদনচান ডাঙরিয়া গিরক খুলাপ্পা লকেইর মাপুগ। লকেইহানরকা বুলিয়া তানুরে গিরি মাতলা। গিরক খানি বুজন অনিয়ে পঞ্চায়েত-রাজনীতি করল। প্রভুয়ে দিলে গিরকরতা কিস্তারৌ অভাব নেয়সিল। ঘরে চিড়ামুড়ির বেপার আহানৌ হবায়া চলিল। লপুকগর কাদা আগ তার ক্ষেতি। দলামুনি, গিরিমুনি, কৃষ্ণমুনি, তিনগো গিরকর মুনি জিপুত। তানুর গাঙর পিঠিহানাত সরকারী সড়কগত কালভাট আগ আসে, উগত ক্ষেতির সুবিধারকা সুইসগেইট আহান বহানি উহান গিরকর রাজনীতির উদ্দেশ্য আহান। এহানল বার ক্ষেতির আর আর কামরকা গিরকে প্রজেক্টে (এবাকার ব্লক) গং ধরিয়া আনি-যানি করল।

বয়স অইল, সংসারর কামকাজ জিপুতরাং এরাদিয়া রাজনীতিল থাইল। জারর পরে, ঘরে ঘরে বুলে বুলে তার য়ারি ছনুরেয়া তা নুঙেই পেইল। ক্ষেতিবারি, গুলা, জিপুত, লেইকির মানু, কালভাটগো, প্রজেক্ট এতাই আসিল গিরকর য়ারি। রাতি ডিলয়া বুলেসিল। খুবার পানি টপটপ পড়ানি অকরলে ঘরেদে আনচিল অইল। জারর পরে অমাটিক ডিলয়া কুঙগৈতে বুড়া মানু এগর তুল য়ারি দিয়া, না ঘুমজিয়া থাইলা? গিরক হাবির তুল য়ারি দিয়া না বহিল। গিরক আঙুলিত লেহেইল কতগর তুল তিলৈল। উতারমা বয়সে খানি কমইলৌ তাঙালকেইর কৃষ্ণমোহন, প্রফুল্ল দ্বিয়গি। এ বুজন দ্বিয়গি গিরিরে নিয়াম য়াকরলা। অইলেই ফিটাহান পারেদিয়া হজকারি আতহানাত দিয়া সেবা করলা।

এ বুজন দ্বিয়গি জারর পরে রাতি কি জানি গিরি আইতে পারে বুলিয়া খানিয়ৌ ডরপেয়া থাইলা। গিরিরেল হিনপেইলতাতে কিতাউ নেই; চাহা পিলগ নাগৈ, ভাতউ খেইলগ নাগৈ — ছদ্দা হজকারি বার য়ারি। উতাইলে হিনহানতে কিহান? হিনহানতে এহান — দিন এহান কামে থায়া রাতিহান অইল, খেয়া পিয়া ফামে হমেইতেগা জার এহানাত তার তুল বহিয়া য়ারি ছনানি। জারর পরে ভাতগি খেইবাতাই এমনেই জারহান নিয়াম লাগের।

গিরির য়ারিতে নিক্কা আকতা। — আজিয়ৌ মানু, কমলা, জয়ন্তি, দলামুনি, গিরিমুনি, কৃষ্ণমুনি দলামুনির মালক, কালভাটগ, প্রজেক্ট, কালিয়ৌ মানু, কমলা, কতিতে আর ছনতাইতা? বসরে দিন আহান, দ্বি-দিন অইলেতে ছনানি য়াকরের। তারতাতে হাপ্তাহানাত দ্বি-দিন তিনদিনতে শ্বেনেয়। য়ারিরৌ খুংকুলখুচা নেই। দিতৈতাউ হজকারি আসুল আহান দিয়া, জিরা জিরা। ছনতে ছনতে আটলপেয়া ঘুম অইলেউ ঘুমজানিয়ৌ নুবারলা, “দাদা অইলগা, যাগা” বুলানিয়ৌ নুবারলা, কিয়াকা বুল্লেতে জেঠাগো অইল,

স্বার্থনেয়য়া দশর কাম করে গেলগা উহানে গিরকরে হাবিয়ৌ ভক্তিশ্রদ্ধা করলা —
কৃষ্ণমোহন বারো প্রফুল্ল আরাক খানি নিয়াম। উহান হারপেয়া তা তানু দ্বিয়গির তুল
য়ারি দিয়া বহানি মনেইল। এহানাত গিরিয়ে য়ারি দিয়া ডিলয়া বহিতে তানু কিসাদে
বেলেয়া ঘুমজিতাইগাতা? কুনদিন জারহান জবর অইলে দাদার য়াথাং লয়া কাছার ভিতরে
হমেইলেগাউ না ঘুমজিয়া য়ারিতে ছনলা। গিরিয়ৌ হার না পেইল, থাঙতে উঠানিয়ৌ না
মনেইল। এহানি বদনচান গিরির বাউ পরিচয় আকচুটি।

জারর রাতি আহান। কাটালুরির আচালা আহান বেরাগাঠুনি দিয়া মুরগত বান্দরটুপী
আগ পিদিয়া তাঙালকেইয়েদে সালইল। আজিকার য়ারি দিতইগা ফামহান কৃষ্ণমোহনর
গরে। পথগন্ত ডাকহান দিলগা—

“কৃষ্ণমোহন গরে আসতগ?”

কৃষ্ণমোহন খেয়া পিয়া ফামে হমেইঙগা বুলতে গিরির ডাকহান ছনিয়া জিপুতরে
মাতের, “নেই বুল, নেই বুল।” জিপুতে লগে লগে, — “জেঠাবা, বাবা গরে নেয়সে”
মাতিয়া লম নাসে গিরি মাঙকলহানাত কায়া বারো ডাকহান দিল,

“কৃষ্ণমোহন গরে আসতগ?”

উপায় না দেহিয়া কৃষ্ণমোহন নিজে দুরারহান আংকরেদিয়া মাতল, “আসু দাদা,
আসু আয়।” সৌ এগি গুমেত্ত উঠিয়া আনিঙ সানিঙে নেই বুলে বেললাতা।

কৃষ্ণমোহনে গিরিরে উদালহানর কাদাত ফিটাহান পারেদিয়া হজক আককারি
দিয়া অভ্যর্থনা করল। গিরি হজকারি ধুমা নিকাল নিকাল য়ারিহান অকরল —

— ছনলে কৃষ্ণমোহন, আজিতে প্রজেক্টে গেসিলুগাতা। বিয়ানে কল্গ নিকেয়া
হিনাত যিঙগা বুলতে মানু উগৈ ডাকল। পৌরু উহান তা বাহা আকতা লয়া বের দেনিরকা
আধা করত করে করে থসে উতা কুঙগৈ চরেদে নেসিগা বুলিয়া গুজুরের। কাদার ঘরগ
থকয়াতে আমারাঙৌ দুষহান পরতৈহান খালকরিয়া গিয়া কুপকরে চেইতেগাতে দেখরিতা
উগৈ কসমা বাহা লয়া ফেরিয়া করত করিয়া থসে থাঙতে দ্বি-দিন রৈদহানাত থায়া কলয়া
চিপিয়া আসুটা বাহা পারা অসে, উহানে তা খালকরলতায় করত করিয়া কামহান সামকরিয়া
থইলু উতা কুঙগৈ চরকরিয়া নিয়া আসুটা বাহা থদেসিতা। বাহা এতাউ খানি হারপেয়া
বপেয়া চেয়া লনি লাগেরতা - নাইলে ঠকেইতারা। বাবুলালরাঙত লইলেই হবা, পাকানা
বাহা পেয়ার। আজিকালি ঠক ঠকামি নিয়াম অইল।

— দাদা প্রজেক্টে সালৈলে উহান কিহান অইলতা?

— হাই, মানু উগরে মাতিয়া ঘাটেদে যিতেগা জয়ন্তিরে তাহিরা মাতের, “গিরি

সাকলখৈহানাত বেরহান ভাগিয়া গুরু হমাসি”। ত্বরাকরে গিয়া চেইতেগা দেখরিতা, তাঙালকেইর সরপঞ্চর ঘরর গুরুউগি বেরহান ভাগিয়া সাকলখৈহানাৎ হমেয়া খানাত লাগেসি। সাকলখৈ উহানতে দলামুনিয়ৈ নিয়াম মনেয়া লাগাসেহান। গাঙহানেঙে নেইতার নেই, লয়াগতৌ উসাদে সাকলখৈ নেই। যেতাউ অক, গুরুগি খেদিয়া দলামুনিরে ডাহিয়া বেরহান ফতকরাত দিয়া আইকে দেখরি গুরু উতাই তুকতা হানৌ সানেসি। মনহানাত নুঙেইহান না লাগিল। তুকতা উহান মি নিজে মেহনত করিয়া হঙকরিয়া আনুরিহান। হবে গুছি বুলনদিয়া আহের মাতামহানাত সানেদিলা। অয়া আহিল হবা উহানতে। বিলবাড়ীতৌ এসাদে তুকতা গাছ অকরে নুরারেসি।

হনতে হনতে কৃষ্ণমোহনরতা আটেলহান লাগিল “গিরি প্রজেক্টর য়ারি উহান আজি অকরে নুরারতেই পাউরি।”

— অকরুরি, অকরুরি। ত্বরাকরে হিনেয়া আয়া খুঙেইহান পটেইতে পিঠিয়েদেত্ত ডাক্লা। খুঙেইহান পটেয়া পিঠির থঙচিলেদে নিকুলিয়া চেইতে দেখরি, এঙির ইঞ্জিনিয়ারগ কালভার্টগ চানিত আহেসে। আলাসালা চুলগ আচুরেয়া, নামসাগ পিদিয়া পালাঙগত্ত আঙেইহান আসুলদিয়া উরিং বুলিয়া চাউরি থাঙতে দেখরি মোর আঙেইহান নাগৈ, গিরিমুনির হান। উগ তার আঙেই উহানাত বুকর জেপগ নেই বুলিয়া না উরিয়া ছদ্দা মোর আঙেই উহান উরানি মনার। প্রফুল্ল উগরে বারে বারে গিরিমুনির আঙেইহান হি’তে বুকগর জেপ লাগাদিস বুলিয়া মাতিয়াউ না লাগাদেসে উহানে হিনরতা। এখুরুমতে প্রফুল্লরাঙ আঙেই হি’নাত নাদিয়া জামিরালার টিকেদ্ররাঙ দেনি মনাসু। কিতা বুলর কৃষ্ণমোহন?

কিহানাত কিহানাত পড়েরগা য়ারি এতা! আর কতি হনতৈ কৃষ্ণমোহনে? প্রজেক্টর য়ারি এহান হনতৌ বুলিয়া থাইতে গিরিয়ে এহানাত হৌহান করতে করতে য়ারির ডেং নিয়াম অয়া কুংহানৌ ঠাইঠিকানা নাইল। হনতে হনতে আটলপেয়া কৃষ্ণমোহন ঘুম উঙেয়া তারে আঙকরের উহানে নাহনেসে। গিরিয়ে বার আঙকরের “কৃষ্ণমোহন, ঘুম আহেরতা, না কিতা?”

— না দাদা, প্রজেক্টে মানু এতা কিসাদে গিয়া ফৌরইতারাগাতা উহান খালকরুরিতা।

গিরিয়ে এবাকা হারপেইল কৃষ্ণমোহনরতা ঘুম আহেসে, হনানি না মনেইল, রাতিহানৌ ডিলৈল। আর বহানি চুম নাইব নিঙকরিয়া কৃষ্ণমোহনরাঙত ঔদিনকারকা বুলিয়া বিদায় নিলগা। কৃষ্ণমোহনৌ সাইঙেল। গিরিয়ৌ প্রজেক্টে গেসেগা য়ারিহান দেনি নুরারিয়া ‘আরাক আকদিন আয়া দিতৌ’ বুলিয়া গেলগা। কৃষ্ণমোহনে হনানি মনেইল য়ারিউহানতে হনানি নুরারল, আরাক না মনাসে য়ারিগো মাহি ঠেকিয়া হনল। খালকরতে

খালকরতে হেজিহানাৎ পড়িয়া নিদ্রাগিথানকরে নিংশিঙ অনি অকরল।

থাঙনাকার দিনে খেয়াপিয়া দুয়াস্ত আয়া ফামে হমেইতেগা গিরি আয়া প্রফুল্লরে ডাকলহা, “প্রফুল্ল গরে আসতগ?”

প্রফুল্ল হাদি হাদিত গিরির লগে য়ারি দিয়া বহিলতা থকয়া হারপাসে। নেই বুলিয়া মাতুৰেইলেউ কানা নাইতৈহান হারপেয়া নিজে দুবারহান আংকরেদিয়া গিরিরে ঙ্করিয়া হজকারি লাগাদিয়া দিল। হজকারি ধুমা নিকালা নিকালা গিরিয়ে তার হৌ-য়ারি উহান অকরল,

----- হারপেইলে প্রফুল্ল, কালিতে প্রজেক্টে গেসিলুগাতা। বিয়ানত উঠিয়া দাড়িগাসি খুরাত বইতেই হুনোরি জয়ন্তিয়ে কমলায় কৌলি লাগিয়া জ্বিগ অসি। কমলার কইনা উগ আয়া “গিরি দ্বিয় বেইবুনিয়ৈ ধরাধরি দেসি, ত্বরাকরে আয়” বুলিয়া গেলিগা। গিয়া চাউরিগা-ধরা-ধরি দেসি। কমলা খুল্লা বেয়কে জয়ন্তিরে খৌনাগত ধরেসে, জয়ন্তিয়ে লেমর জাঙহান। মোরে দেহিয়া এরা দিলা। আঙকরিয়া হারপাউরি-জয়ন্তি কালি রাতি বাগিছাদে গিয়া নিয়াম ডিলয়া আহেসে। গুরিয়া থসি ভাত মেকুরে খাদেসি উহানে নাহেয়া ঘুমজেসেগা। বিয়ানে উঠিয়াই কুরুক্ষেত্রহান। রাতি ডিলয়া বুলতারা এতারে মি হবা নাপাউরি তা থকয়া জয়ন্তি উগরে খানি উচ্চককরে মাতিয়া আইতে কৃষ্ণমুনি উগৈ দরখাস্ত আহান আনিয়া ‘পাবুঙ, দস্তখত আহান দে’ বুলল থাঙতে ‘কলমগ আন’ বুলিয়া দারিগত বইলু। কৃষ্ণমুনি উগরে এণ্ডিত চাকরি আহানাত বরাদেনিরকা ইঞ্জিনিয়ারগরাঙ মাতিয়া থসু উহানে দরখাস্ত আহান লাগের। কালভাটগর বিষয় উহানল ইঞ্জিনিয়ারগৈ মোরে নিয়াম য়াকরেরগ।

প্রজেক্টে গিয়া কিতা করেসেগা য়ারিউতা হুনতৌ বুলতে প্রফুল্লয় আরাক য়ারি আকতা হুনিয়া নুঙেই নাপেইল। ঘুমহানৌ লাগানি অকরল। উপায় নাপেয়া মাতের “দাদা য়ারিহান সামকর। প্রজেক্টে গেসিলেগাতা কিহান করলেগা?”

—— হাই মাতিঙ, খানি বাসা। উবাকা দস্তখত হান দিয়া হিনাত যিতেগা দেহৌরি গিরিমুনি উগৈ লেরিঘাটে মাছ উম্করের। নিংশিঙ অরতা প্রফুল্ল! কনাক আইতে ঘাটেদে মাছ উম্করিয়া চারা আকেইহান ধরলাঙ উহান! করিমুঞ্জত নটিখালহান বাধদানির পিসেঙ ঘাটেদে মাছ কমনি অকরলাতা। আজিকালিতে খলকরিয়াউ চারাহান সু’করে নুৱারিয়ার।

প্রফুল্লরতা ঘুমহান আইলেউ করিলতা কিন্ডাউ নেই। হারপেইল প্রজেক্টর য়ারিহান হুনানি নাইতৈ। ডিলেল বুলিয়া গিরিরে য়ানিরকাউ মাতে নুৱারের। ঘুম উঙানিত লাগিল। এগদে গিরির য়ারিহান ডেং আগস্ত আরাক ডেং আগ, উগস্ত আরাক আগ করতে করতে

মূল যারিহান অকরাগত পড়িয়া থাইল, রাতিহানউ ডিলৈল। কাদার ডাঙর হেইনৌজারে থাইতারা মাঝু হেইমাক উহানে হজাক অয়া টুটুৰেইতারা, গরে ঘুমজেসি সৌ বিবিয়েইতারা। গিরিয়ে দেহের প্রফুল্ল ঘুমজের। কৃষ্ণমোহনরেউ গেলগা কালি তার প্রজেক্টে গেসেগা যারিহান হ্নুরানি নুরারিয়া টাটিহান না বাগিয়া আসে গিরিরতা। আজিতে যেসাদেউ প্রফুল্লরে হ্নুরানি লাগতৈ নিঙকরিয়া প্রফুল্লরে হজাক করানিরকা ডাকল “প্রফুল্ল, না ঘুমজি হজাক অ। দ, হজকারি আকচুম দে, হজাক অইবেতা।”

আরি'গ আগুয়াইল। প্রফুল্ল মেরাক সেরাক হজাক অয়া উপারিগ ধরিয়া হারপার চিকিয়া হদাসে। গিরিরে মাতল “দাদা উপারিগৌ চিকসে। ঘুমৌ আহের, যারিহান আরাক আকদিন হ্নবাপ্ততা না কিতা?”

গিরিয়ে হারপেইল। ঠেকিয়া মুক্সি আহান দিয়া ‘হইদে’ আরাক আকদিন দিতৌ বুলিয়া ঔদিনকারকা গর আনচিল অইল।

গিরকর যারি — অকরতে আহান, উহানান্ত ডেমেয়া নিকুলের নিয়ামপারা যারি, কুংহানৌ লম নার, অকরল উহানৌ পড়িয়া থার এসাদে করিয়া হুদা টাইম পাস্। আজিকালি মেগাসিরিয়াল করতারা যারি এতা গিরিরাংত অনুপ্রেরণা পা'থাইবা বুলিয়া সন্দি আহান থা'যারগা।

* * *

যমপুরীত লেহাউনু

খালপারর বুজন গিরিগিথানীরে লেহাউনুর য়ারি আংকরলে এবাকাউ ঠুনিংশা বেলাতারা। দৌ অইলিতা আককুড়ি বসর বিত্তা অইল, এবাকা পেয়াউ তেইর কথা পাছরে নুৱারতারা। আঙর থংচিলর কাদাং রুৱেয়া গেসেগা লেহাউজারে এবাকা পেয়াউ ডেঙ বাগিয়া লেহাউ ধরের। তেই রুৱেয়া গেসেগা ফলফসলর গাছে এবাকাউ তেইরে নিংশিং অকা বুলিয়া ফল ধরের। হাকতাক আহানাং লেহাউনু বুললে হুদা তেইর গাঙে নাগৈ লয়াগতৌ তেইরে বানানুংশি নাপাকুরা নেয়সিলা — সৌগন্ত চিনকরিয়া বুজন পেয়া তেইরে জবর নিংকরলা বার বানানুংশি পেইলা। তেয়ৌ হাবি সৌরে নিজর সৌ নিংকরিয়া বানাপেইল, হাবি বুজনরে নিজরতা নিংকরিয়া ভক্তি শ্রদ্ধা করে পারেসিলি। গাঙর হাবি তেৱার, দৌ অর সেবা কিতা লেহাউনু নায়া মূলফাং নাইল। উহানে আজি পেয়াউ তেইর য়ারি পাছরানি নুৱারিয়া আসি। হাবিয়ে যেগরে বানানুংশি পেইলা উগরাংত জিঙে কপাল হবা মানু থায়া ঔনা নেই। অইলেরগায়ৌ লেহাউনুর সাদানে কপালখিপী দুগ সুৱয়া আসিলা না নেয়সিলা থম্বেইল বিসারানি লাগতৈ।

মেঞ্জিবারিত লেইরাপা পরিবার আহানাত্ জরম অইলেউ ঘর ঙ্ক্ষী করিয়া থনি, গিরস্থির কাম, ফুতি বুনানি, মানু অইলে আইস-বইস করানিত তেইরে জিঙানি চিলসিল। নিঙলসৌরে ঔ হাকতাক উহানাং স্কুলে যানি নাংলা থাংতে লেখাপড়াউ করানি নুৱারেসিলি। ঘরেদে খানিমানি পাকরব উহানৌ আগদে লেইরা অসিলা, আৱাক আগদে বাগাদেকুরা নেয়সিলা থাংতে নুৱারল। যেতাউ অক রূপহান হবা অনিয়ে হবা ফামে লুহং অসিল।

বা পক বরাচাউবা মেইপাগিরি খানিয়ৌ করল। গাঙ-গরেদে নজরর নুন সলদানি, ঠইমামি চৈয়েলে ঠই ডাহানি, চাপাল দেনি, অলমির জরি দেনি, তাপ উঠলে খুল্লেইর গুল্লি হংকরিয়া দেনি, এতা কিতা করল। দহিনা দিলে দিলা, নাত্লে মাতানিয়ৌ নুৱারল। নুৱাৱাগ বালা অইলে ভাত আকচারাতে শৈনেয়া খৰেইলা। এতা কিতারকা নাঙহান যেসাদে উসাদে বরা অনি নুৱারিয়া আসিল। অইলেরগায়ৌ আকখুলি নিঙলগ লেহাউনুরে ঙ্খখি-ঙাৱাল করিয়া ফিজেং ফুতি পিদুৱেয়া লু-করিয়া থনি পারেসিল।

বাপক-মালকর বানা নুংশি পেইতে পেইতে লেহাউনু ডাঙর অইলি। পুরিজেলাগ অয়া নিংখি কাপিয়া ঙ্খখি-ঙাৱাল অয়া থাইলি উহান লেহাউর ফুলগায়ৌ লাজপেইতৈ, উহানে লেহাউনু নাঙহান মিয়াম চুনা অসিল। তেইর রূপহান দেহিয়া খালপারর বাবুধন পাটাদারে তার জেঠাপুতক বদনর লগে লুহঙর প্রস্তাব আহানল আহিল। কুষ্ঠির শক

কিতা চেয়া তিলসে বুলিয়া হবা খেলতামে বদনর লগে লেহাউনুর লুহং দিলা।

বাপক পাটাদারগ অইলেউ বদন পাটাদারি ঠিক নাপেইল। সাদাসিদা সৌগ পালপাকহান মিয়াম কালা অইলেউ অন্তরগ মিয়াম হবা অসিল — উহানে চরিতর রাজাগ মাতলা। লেরিকেদে অমাটিক হবা নাসিল। আকদিন গাঙর স্কুলে পড়া নুরারানির সালে অজাগৈ কাচকৌরাগ বুলিয়া লাংকরিয়া আনাংসা দেসিল উদিনেস্ত লেরিক বাদ দেসিল। বাপকর গুজুরানিয়ে জারে নুরারিয়া ডাক বারানি হিকলগা। লুহঙর আগে বদন লগরগ অয়া বারানি পারল, লুহঙর পিসেদে গাঙর হুং-হারকাং কর্ম চলাদেনি পারানি অকরল। বদনে লেহাউনুরে ঠই হাতগি দিয়া বানাপেইল। হারৌ পিয়ম অয়া গিরস্তি করানি অকরল। বাপকর বি-বারি আসিল, ক্ষেতির ফসলে বেমলবেঠা। উতার গজে ডাকর বিদ্যাল খানিমানি রোজগার করল। লেহাউনুও কুলিকাটুনিল পয়সা লিকল খানি কামেইল। কিন্তুারৌ অভাব নেই। গাঙর তেবার পরব হাবিত দ্বিয়গি হারৌ হারৌ অয়া যৌঅইলা। দিনে দিনে তানু দ্বিয়গির হারৌপার সংসারহান কুড়িগন্ত ফুলগ যেসাদে শাতর ঔসাদে শাতনি অকরল।

বদনর খুলা বেয়ক কৃষ্ণধনরাং বাপকর পাটাদারি গুণ উহান খানি আসিল। বাবুধন বয়সে চারিকুড়ি লালৈল, দেহাগয়ৌ আর নাকরানি অকরল। জিংতা অয়া থাইতে বাকী কামহানি লমকরিয়া যানি থকর নিংকরিয়া খুলা পুতক কৃষ্ণধনরকা হিংলাস্ত শাত্ হবা নিঙল আগ চেয়া লুহং করেদিল। ভবিষ্যতে দ্বিয়বেইবুনি কৌলিখানা নাকরবাতা বুলিয়া বি-বারি যেতা আসিল উতা সমান সমান বাটেদিয়া জিপুত দ্বিয়গিরে খেইকরেদিল। বুড়া এগৈ জিংতা অয়া থাইতে হাবি সিজিল করেদিল বুলিয়া গাঙর হাবিয়ৌ হারৌ অইলা।

পালপাকহানল হাবিরে দেহুরেয়া হারৌ অইলেউ ভিতরেদে কৃষ্ণধন সুপকরেউ হারৌ নাইল। আগদে বারণগ খেয়ইল, উতার গজে তার নিজর কামেই বুলতে কিত্তাউ নেই। কামেই বুলতে গাঙর পাটাদারি। পাটাদারি করিয়া মনহান বুজলেউ পেটগ না বুজের। কইনা আগৌ ঘরে আইলি। এতা কিতাই তারে চুচর জ্বি-আগই ভিতরে ভিতরে পুড়ানি অকরল। এসাদে করিয়া দিন, হাপ্তা, মাহা যানি অকরল। বসরহান বুলনদিতেই বাবুধন দৌঅর খয়া পেইলগা। দ্বিয় জিপুত তিলয়া বাপকর কর্মহানর লগে মালকরতাউ নিংশিং অয়া ডাঙর করে করলা। হৌরিয়লর কর্মহান লমনির কতদিন পিসে লেহাউনু দইরাপ করল — তেই মা' লেপসে। তানুরতা হারৌর সীমা নেই। এগদে সেনাতস্বী হেয়ক কৃষ্ণধনর চুচর জ্বিগৎ পানি ডালিংতে না বুলিয়া উল্ট বেসুনিল বৌদানি অকরল।

‘মিয়াম হারৌ অইলে মানুর নজর লাগের’ বুলিয়া কথা আহান আসে। এহানৌ হাইহান — বিধির কলমগ কুংগয়ৌ হার নাপেইতাই। লেহাউনু রূপে গুণে চরিতে

বেবারে অমাটিক হবা অসিলি এগরে যমরাজাই হবা নাপেইল। যমরাজাই কালা কেকুরুকগ পারা বদনরে হবাপেয়া দৃষ্টি দিল। দিন আহান ডাক বারেয়া আয়া রাতি পেইরাক্ক পেট কামারার বুলিয়া ফর ফর অনি অকরল। লেইকি গাঙর মানু পুঁলেলা। প্রেমসিং ইপুবে পানি সলকরিয়া দিল দৌঅর দুযহান বুলিয়া— কানা নাইল। এগদে নুরাাগ জবর অযারগা। আগ আগৈ মাত্তারা ডাক বারেয়া আঁৰেপা খানিহান নাহেইলে অইতৈতা? উরাদারা হৈতুরুক আগৎ বারেয়া ডাক্তারখানাৎ সালকরতেই বদন কেকেইল উগ ইমপানিগ অইল। আতেয়া চেইতে গারিগ ইঙসে। প্রেমসিং ইপুবে মারেইগাসে আতহান দিয়াই হারপেইল বদনর আত্মাগ তার দেহাগ এরাদেসে। লেহাউনুরে বিধিয়ে কিতা নাদেসিল? এবাকা হাবি আলকরিয়া নেনি অকরল। হেয়কর বানাল জাপদিয়া কতিরৌ উময়া কতিরৌ হারৌ অয়া থানির হৌপন দেহেসিলিতা। হাবি গুরাগ অইল।

দিন মা' সুরয়া লেহাউনুরতা মুনিসৌ আগ জরম অইল। কপালথিপা সৌগ, জরম অয়া বাপকর মেইথংহানৌ নাদেখল। কনাক বয়সে য়ারি অয়া কপাল থিয়সে লেহাউনু মুনিসৌ এগরে চেয়া আশা-ভরসাল দিন কাটেইরি, পারিল ঔনাপা সেমটেয়া তারে ডাঙর করানি অকরল। নিজে রুবা-দরাত লামানি অকরল।

এগদে দেহরক কিসাদে করিয়া বৌজকর বি-বারি উহানি আত করতৈ উহানর হিরাম চেয়া থাইল। বাগি করিং বুলিয়া বি-বারিং লামানির পথগ নিকাল্ল, পিসে পিসে কজ্জা করানি অকরল। দরাহান কায়া মারাজারা লমকরিয়া ধান, মুট করতে মনেইল গুলি বৌজকরে দের, হিসাব কিতা নেই। আংকরলে মাতের 'এমারি ফসল হবা নাসে'। সরল সাদাসিদা লেহাউনু দেহরকর খংগ হার নাপেইরি। তেই জুদা সৌএগ ডাঙর করিয়া এগরেল নুঙেই অয়া থাইতৈ উহানর হৌপন দেহে দেহে থাইরি। কিন্তুমান লেহাউনুরে হারনাপাসে যে সৌগরেল তেই ভবিষ্যতর নুঙেইপা হৌপন দেহিরি ঔ সৌ উগ সংসার এহানারমা কয়দিনকার অপরিবিগ। হবে ধাপদানি ফালদানি অকরতেই দিন আহান যমরাজাই লেহাউনুর ঠইগঙ জিঙে পুতকরে নিয়া গেলগা। রৌ মেলিয়া কাদানি ছাড়া কিস্তাউ করানি নুরারল লেহাউনুরে। হায় বিধি; এহান বিচারহানক! কনাক সৌগরে সিমটেয়া কাদুরেয়া হারৌ অয়া চানিহান পারা অইল --- এগদে লেহাউনুরে জুরন দিয়া কাদিরি, হৌগদে বিধিয়ে ফাক ফাক আহান! এসাদে করিয়া লেহাউনুরে বিধিয়ে যেতা দেসিল উতা হাবি আল করিয়া নিলগা। দুঃখে দুঃখে কাদতে কাদতে তেই কুকগ অইলি।

কৃষ্ণধনরতা সৌ গুট আহান অইলা। গাঙর পাটাদারি করতে করতে লয়াগর বিচারেউ ডাক আহানি অকরল। পরগণার বিচার করের থাঙৌ ঘরর বিচারহানতে চুমকরে করে নুরারের। বৌজক এগ হিনপেইরি বুলিয়া তালাবি আহান করানির হৌনাবি আহান

নেই। তার ঠাে কাম উহান গাঙর মানুরে করেদিতারা। আকদিন খাংতাক মইলক সেনাতস্বী লেহাউনুরাং আয়া পামকরে ধরীয়া লৌদিয়া কাদে কাদে মাতানি অকরল, 'ইচের দুঃখ এহান দেহিয়াউ দেহিলহান নাগৈ। তিল পড়িকগা।' অমাতিকি দুল-দুলবালি অগেলিগাথাঙৌ ভগবানর প্রতি লেহাউনুরতা বিশ্বাসহান নাবাগেসে। নিক্কা গাঙর লেইসাঙে দৌঅর সেবা করে করে 'ব্রজমাই'র পদফামহান পেয়া হদাসেগ। ইচুদিন দৌঅর সেবা করতে করতে এহান হারপাসে যে বিধির কলমগর গজে যারৌ করিয়া কিত্তাউ কানা নেই, মনহান বুঝাসে। উহানে সেনাতস্বীর তিলয়া থানির প্রস্তাব উহান গ্রহণ নাকরল। সেনাতস্বীযৌ এরাদেকুরীগ নাগৈ, সেংকরে মাতল, "উহান অইলেতে মোর খুল্লি নিঙল এগ নিয়া পালিয়া ডাঙর কর, এগরেল হারৌ অয়া থাক্, ডাঙর অইবতাই লুহঙৌ দিস"। এখুরুমকার প্রস্তাব এহান লেহাউনুরে বেলানি নুরারল। দেহরকর খুল্লি জিলক বিধুমুখীরে লেহাউনুরে পালানি অকরল। বানাপেয়া নাঙহান থইল "ইমাজেলা"।

লেহাউনু আরাক অধ্যায় আহানাং ফরইলিগা। হেয়করেল হারৌর সংসারহান পাত্তে যারি অইলি, পুতক আগ জরম অয়া হারৌর শাতহান দেহে অইতেই উগৌ নেয়ইল। লেহাউনুর জীবন এহান লেঙৌসটাত লেঙৌল গর হংকরানির হন্নাহান পারা অইল। হংকরিরি বাগিয়া পড়ের, তেয়ৌ এরিং নাবুলিরি। বার ইমাজেলারে কল করিয়া আরাক হৌপন আহানল অতীতহান পাছরানি মনেইল। এহানৌ হারপেইরি, তেইর নুৰা হৌপন এহান কয়দিনকারহান। কিন্তুমান করতৈহানতে কিহান?

চেইতে চেইতে ইমাজেলা পুরিজেলাগ অইলি। লুহঙর ফিয়ম ফুতি বুনানি অকরল লেহাউনুরে। কৃষ্ণধনেউ ইমাজেলার লুহঙর বারপজা যোগাড় করানি অকরল। হবা হবা ফাম হমানি অকরলা। আকদিন চাকরি করের পাত্র আগর প্রস্তাব আহান আহিল। হাবিবারা বিচার করিয়া ফামহান হবা দেহিয়া উপেইত বিয়া দিলা। লেহাউনু হংকরিয়া আনিরি লেঙৌর ঘরগ সেংকরে বাগিয়া পড়িল। আকখুলিগ অইলি। লেহাউনুর ভাগ্যরেখা এহান কতিরৌ কৈনাকৈঠেক নিয়াম অগেসেগাতা! হারৌর জিনা পাততেই আড়িংহান তেইর গজে বাগিয়া পড়ের, কুনমতে নিজরে সামালেয়া নিঙলসৌ এগরেল জমহান পাত্তে এগৌ পাহিয়াগর সাদানে ফরদিয়া গেলিগা। নিঙল এতারে এহান্‌ল পাহিয়ার তুল পানতামনা দিতারাতা।

এতাকিতা খাল করিয়া দিন আহান বহেসে মাপা উগং দেহরক আয়া তেইর গজে বজ্রহান বেলাদিলহা। কৃষ্ণধন হিসাবর চে আহান পাকরিয়া মাতিয়া গেলগা যে ইমাজেলার লুহঙর বারপজা যেতা তা লাংকরেসিল উতা লেহাউনুরে পালিয়া লুহং দেসেগ থকয়া তেই হুজানি লাগতৈ। নুরারলে তেইর বি-উহানি উতার জাউরে পা য়িতৈগা।

লেখাউনু ঙাকইলি। এহানতে কিসাদে য়ারিহান? ইমাজেলাতে কৃষধনর জিলক নাগৈথাং? তাতে জিলকরে কিস্তাউ দেনি নালাগেরথাং? লেহাউনুরেতে দেহরকরে ইমাজেলার লুহঙর বারপজা লাংকরানিরকা নাহে মাতেসে। এহান দেহরক-জালক দ্বিয়গি তিলয়া তেইরে উৎখারিগ করানির পাক্চা আহান নিংকরল। গাঙর মানু ডাহিয়া বিচারে বহিলা। বিচারে কৃষধনর যুক্তি উহান উরাবেলা নুরারলা। বিচারর রায়ে লেহাউনু তেইর বাটে যেহানি বি-বারি পরেসিল উহানি দেহরকরাং কাতকরানিৎ পড়লি। পৌ এহান পেয়া ইমাজেলা আয়া মালকর উরকহানাৎ পড়িয়া অকলৌকরে কাদিয়া বাপকর গজে নুঙেই নায়া আর বেয়াপার এগদে না বুলনদিতৌ বুলিয়া গেলিগা। বৌজকর বি-বারি হাবি কারলয়াউ কৃষধন আল নাইল। তেইর লগে যেবাকাউ ডাটয়া টটরার, কথাই কথাই খুটা কারের। হুদা তা নাগৈ — তার মইলক, জিপুত হাবিয়ৌ লেহাউনু বুললে পিঠি বুলনদিতারা। কিন্তুমান কিয়াকা? এহান হারপা নুরারল লেহাউনুরে। তেইতে তানুরাং কুনদিনৌ লাল নাসে। গাঙেদে গেলেগা মনহান খানি পাতল অর, গরে আইবতাই শ্মশানহানাৎ হমেইরি পারা।

লেখাউনু হারপেইল তেইর মুঙে পিঠিৎ কুঙগৌ নেই। আহির মুঙে কুমছালিগক' আধারহান দেহিরি। তেইর কপালহানাৎ যেহানি হারৌপার মিঙাল আসিল উহানি বদনে যিতেগা যমকরিয়া নিয়া গেলগা। আজি তেই বদনরে বিসারেয়া এহানর জুরাপহান লনি মনেইরি, অযেইরিগা লারচার এতার বিচার চানি মনেইরি। কিন্তুমান বদন যে আরাক দুনিয়া আহানাৎ অঙয়া গেলগা উহান কি লেহাউনুরে হার নাপেইরি? হুতুমে খালকরলে লেহাউনু গাঙেত্ত, দেহরকরাংত অকরিয়া স্বয়ং বিধিরাংতৌ বিচার নাপাসে। সংসার এহান এবাকা তেইরাং যমপুরীহান। জীবন এহান লেইপাক্হানর লগে লালফাম করিয়া আইতে আইতে এবাকা তেই ঠুঁরইলি। আর জিংতায়া খানি নামনেইল। দুঃখই দুঃখই চিলি-চিলিগ অয়া লেহাউনু লেহাউ ফুলগতে থাক্ পাতাহানাৎতৌ ফাং নাইলি। খানিপিনির উবেদে থিয়াল নেয়ইলি।

সংক্রান্তির দিন মাদানে পুরিজেলেই, মৌ জেলেইর তুল করা খেলানি, নুরা বসরে লামর দৌ হমাদেনি, কাঙ আসুলানি, বালাৎ এলা দেনি, নিয়মর মাহাৎ মঙ্গলারতি দেনিস্ত অকরিয়া গাঙর হাবি বেয়াপার কামে যে লেহাউনু নাইলে না চলিল ঔ লেহাউনু গাঙেদে যানি নুরারানি অকরল। নুরারা অয়া পড়লি, ভাতপানি এরাদিল।

পৌহান পেয়া মালকরে লমইলগা দেহাহান দেহিং বুলিয়া ইমাজেলা আয়া ফৌরইলিহা। এগদে মালক নিমাত অসে, সাধুহান হমাসে। ইমাজেলা মালকর মরণর ফুতি থসিলি উতা পিদাদিয়া, নামসা পিদাদিয়া, আতহানাৎ খেবার পয়সা দিয়া হরিনামহান

সলকরে সলকরে মালকরে ডাহানি অকরল। পেইরাক্ক দেহিরি, মালক হুসহান নেয়ইলেউ ভাতর বারার আতহানল কারে আগরে ধরানিরকা হুমা করিরি পারা, মুকসিয়ৌ দিরি পারা। ডাকলে নাউ হুনিরি। হাবিয়ে দেহিয়া নুমপাং অয়া চেইতারা। জিলকে আত উহান ইজ্জুম করেদিরি বার মালকে আগর উসাদে কারে আগরে ধরানিরকা হুমা করিরি। জিলকে বার মালকর আতহান ইজ্জুম করেদিরি, করিয়াউ নুয়ারিরি — এসাদে আদল আহান থাইলা।

পুলসি মানু উতাই এসাদেতে নাং নাসি। তানু ঝুম মারিয়া চেয়া থাইলা, আকতাই ডরপেয়া লাং লাং অয়া চেয়া থাইলা। ইমাজেলা মালক কিহান অইলি হার নাপেয়া, লরেইরি আত উহান চেতক ধরিয়া লৌদিয়া কাদে কাদে “ইমা মোরে বেলেয়া নাযিগা” বুলিয়া মালকরে ডাহানি অকরল। লৌ ঔগ হাগর জুরন মাটির জুরন দের পারা। হৌগদে বামুনগরাংত চিন করিয়া পুলসি বুজন বেয়াপা উতাই জবর জবর ক হরিণাম হান সলকরানি অকরলা। হরিণামহানে, জিলকর ডাক উহানে আকতা অয়া লেহাউনুর কানেদে অন্তরগ দন্দকারা করানি অকরলগা।

লেহাউনু ঘর আন্চিল বুলতারা উহান অইলি। হুসহান আয়াউ জিলকরে দেহিয়া চিনল। মালকর বুকগত মুরগ থয়া ইমাজেলা কাদিরি মাপা উগং জিলকরে কানে কানে লেহাউনুরে দুহান আহান কথা মাতল — “ইমাজেলা, মি যমপুরীত গেসিলুগাতা না। কতিয়ৌ হবা অসিলতা। মি ফৌরইতেগাই সিপাই আগ মোরে লগে করিয়া নেনি অকরল। খানি গিয়াউ পেইরাক্ক ভাতর বারাদে মেঙসেলর ঘর আগং তোর বাবারে দেখলু। দেহিয়া ধরিংগা বুলতে সিপাই উগৈ আতহানাং ধরিয়া মোরে খামকরের। তোর বাবা আত দ্বিয়হানি টিংদিয়া মোরে ডাহের বুলিয়া মি ধরিংগা বুলতে সিপাই উগৈ বার খামকরের। এসাদে লাংলা অসু হের উগং পিঠিয়েদেত্তু কুংগ আগৈ ডাহানিয়ে হজাক অপরলুগা। ইমাজেলায় হারপেইল হৌপনহানর সিপাই উতা কুংগ। “ইমা জিংতা অয়া থাইতেউ যমপুরীহানাং আসৎগৈতে আরাক যমপুরী আহানতে কুরাং দেখলেতা” বুলিয়া রৌ মেলিয়া কাদানি অকরল। লেহাউনু সেংক আহিগি জিপেইল, অটগি লরেয়া কিহান মাতল পারা বুলতেই পেইরাক্ক লরন চরন নেয়ইলি। প্রেমসিং ইপুরে মিহলগ চেয়া হারপেইল, বুলনদিয়া মাতল “মদন সেলপুঙহান আনগা।”

* * *

অমরী জারমানি

বুজন গিরিগিথানীরাংত ভূত-প্রেতর নিয়ামপারা য়ারি হুনেসি। কুনগৈ নিজে উনা অসিলা বুলিয়া মাতলা, কুনগৈ মানুর থতান্ত হুনেসি। হুত্তমেতে ভূতা এতা কিতা ? ডরোরা মনর প্রতিফলন না হুত্তমে কুন অশরীরি আত্মা এ ভূত-প্রেত বুলতারা এতা। এহানর কুন লেপকরা জুরাপ নাপেয়ার। এতা কাল্পনিক তথ্য বুলিয়াউ মাতানি নাকরের। এতার অস্তিত্ব নেই বুলিয়াউ মাতানি হিন, আসে বুলিয়া মাতলেউ প্রমাণ করানি নার।

আমি জরম অনির আগে আমার গরে গাঙর গাররাপুরা আগ খেতির কাম পাংকরিয়া আসিল। নাঙহান বুদুঙ। মাদানে নিককা মইষগ রাহানিত গিয়া সেন্দাপেয়া থাইল।

কিতাপারা দিন আহান সেন্দাহান লালয়া গেলগাতা পেয়া আলয়া নাহেরহান দেহিয়া গরেদে খালকরানিৎ পড়লা। ইমাই তারে ডাহে ডাহে দুমেইউরাগ পেয়া গিয়া বুদুঙরে নাদেখল, মইষগ আকখুলাগ ঘাস খেয়া আসেহান দেখল। হারন মাহান, পিনপিনি বরনৌ দেব। ইমাই বুদুঙরে নাদেহিয়া খালকরতে খালকরতে ডরপেয়া গরে আলয়া আইলি।

বুদুঙর গরে আংকরিয়া হারপেইল গরেউ নাগেসেগা। ইমাই সন্দি করল বুদুঙরে লপুকর পিষ্ঠিরি জেলা উগৈ বুলেয়া নেসেগা বুলিয়া, কিয়াকা বুললেতে এসাদে আগেও কতগ মানু... পিষ্ঠিরি জেলা উগৈ আকখুলা পেয়া ভুলেয়া নেসিলিগা।

গাঙর মানুরে ডাহিয়া য়ারিহান দেনিয়ে ডাক করতান রহা রহা নাগাবাতি লেটনল লপুকেদে বুদুঙরে বিসারেয়া নিকুললা। টেঙারার লামহান নাগৈহান থকয়া কাদাবারাং ডাঙর জঙ্গল নেয়সিল — উদুমদুরা লপুকগ। লপুকগর হমবুকগৎ কাঙ আসুললা ফাম উহানাং তীড়া আকজার বার খৈনাং আকজার আসিল। লপুকগর পিঠির গাঙহান পানির আগে গুলগর পারগৎ লামরদৌ হমাদিলা উপেইৎ পুরানা খৈনাং আকজারর তলে গল্লাসপা আহান আসিল। উতা হাবি বিসারতে বিসারতে সমেয়হানৌ বাক্কা ডিলৈল। বুদুঙরে নাপেইলা।

আর কুরাংতে বিসারতাগা। গাঙর মানু আগ নেই বুলতে নেই। নাপেইলাং বুলিয়া বেলেয়া আহিক বুলতেউ নুয়ারিয়া খালকরানি অকরলা। রাতি এহান গুট গুট অয়া গাঙেদে আয়া বাহাসপার তল, খেরর হিনির তল যেগৈ যেগদে সন্দি করলা উগদে বিসারানি অকরলা। এসাদে পুহাকে রাতিহান বুদুঙরে বিসারেয়াউ নাপেইলা।

শাচাকগ মতয়া বেলিরাজারে আহান করল। পহর অনি অকরানিয়ে রাতিহান না

গুমজিয়া বদুঙরে বিসারতারা মানু এতা আমিয়ানি অকরলা, আহি মুজুরানি অকরলা ।
বেলিরাজাই মানু এতারে হজাক করিয়া সেংকরে পাংকাল দিল ।

রাতিকার আধারহানে ইমাইন্দলে লেইশৌ-লেইমা হমাদিলা পুরানা থৈনাংজার
গাতগিৎ বার কাদার গল্লাসপাৎ হবাকরে বিসারানি নুরারেসিলা । পহর অনিয়ে উপেইত
লমরগা বিসারানিহান দিয়া আলনি বুলিয়া গেলাগা । গল্লাসপার কাদাৎ গিয়া হাবি জাকৈলা ।
দেখলা গল্লাকাটার ভিতরে চিপাগৎ বদুঙরে খুরেয়া বরাদেসি পারা । আহি দ্বিয়গি পাক্দিয়া
চেয়া আসে, মানু এতারে দেহিয়া ডরপাসে । নিজর গাঙর মানুরে চিনানি নুরারিয়া খাং
লাগিয়া চার ——— যেসাদে অদ্ভুত জীব আকতারে দেখল পারা ।

বদুঙরে পেয়া বিসারানিৎ গেসিগা মানু হারৌ অইলা । তেব বদুঙ স্বাভাবিক আচরণ
নাকরলথাংতে হাবি খালকরাৎ থেঙইলা । পিঙিরির য়ারি হুনেসি বুজন উতাই মাতলা —
— “এগরে পিঙিরিয়ে ধরেসিতা ——— পিঙিরি উগর জারনহান এনা । আপপানেউ ঠিক
অইতৈ । কপাল হবা ——— লগে লগে আমি ডাক করতানল লপুকগ দনদকারা করানিয়ে
পিঙিরি উগৈ নেনি নুরারিয়া এপেই লুকেয়া থসেতা তেইর মাচাকগ ।”

হাবিয়ে ধরিয়া-বাদিয়া বদুঙরে গরে আনিক বুলতে “এরাদেই , এরাদেই মরে
যানি দেই” বুলিয়া সিকদানি অকরল । হাবিয়ে চেংকরে ধরিয়া বদুঙরে গরে আনলা ।
বদুঙ তেব এভাবে নেই । এরাদিলে সেংকরে দাবদিয়া যিতৈগা বুলিয়া রাহিয়া থইলা । খানি
খানি থায়া “মি যিংগা, এরাদেই” বুলিয়া যানিরকা করের । অমাটিক বুঝেইতরাতা পেয়াউ
আল নাইল । উপায় নাদেহিয়া মেইপা আগ ডাহিয়া আনানিৎ গেলাগা ।

মেইপাগ আয়া বদুঙরে মন্ত্রল ঝারিয়া আজিরাৎ করানি অকরল । বদুঙ জারে
নুরারিয়া হিরি গাম সুটিয়া তিঙিল । ঝারানিহান জবর অইল আর থতান্ত কলপুক বেলানি
অকরল । মেইপাগৈ আংকরানি অকরল — “তি কুরাং যানিরকা লাগেসংতা ?”

—— মর মইলকরাং ।

—— তিতে বিয়াউ নাকরেসংগ না ?

—— করেসু ।

হনতারা উতাই নিংকরলা ভুলেয়া নেসেগা পিঙিরি জেলা এগৈ বদুঙরে রাতি
রাতিয়ে বিয়া করে বেলাসে ।

বদুঙরে আজিরাৎ করতারা বুলিয়া হুনিয়া গাঙর মানু পুলয়া মাংকল,গর, উঠান,
বুজলাহা ——— কুমেইহান পারা অইল । আরাকৌ হুনানি মনেয়া মেইপাগৈ আংকরানি
অকরল “ তিতে কুমবাকা বিয়া করলেতা ?”

—— কালি ।

—— তর মইলকতে কুরাং আসে এবাকা ?

—— ওরে আরাংগর উপেই !

—— লগেতে আরতা কুংগ ?

—— মর হৌরিয়ক ।

—— তোর হৌরিয়কর নাঙ কিনাঙ ?

—— অমরী ।

—— তর হৌরিয়কতে হবাতা ?

—— হবা অইলেউ বুড়া অইলি থাংতে

—— তর মইলকতে হবাতা ?

—— নিয়াম হবা, পানতামনা নেই ।

কুমেইহান ফাগিরামহান পারা অইল । বদুঙ আহিগি জিপেয়া হাবি প্রশ্নর জুরাপ দিয়া যারগা । ছনতারা মানু আহেয়া চিরা ফারতারা । বিয়াউ নাকরেসে গাররাপুরা আগৈ মইলকর য়ারি, হৌরিয়লর য়ারি দেৱ থাংতে না আহিয়া নুৱারতারা । আহিয়া গৈগ অসি উতारे “আহানি বাউি কর, কথা ছনিক” বুলিয়া মেইপাগৈ বার আংকরানি অকরল — তর মইলকর নাঙ কিনাঙ ?

—— ইস্ লাজপাউরি । নামাততৌ ! মইলকর নাঙ হানতে মাত্তারাতা ।

—— মাতানি লাগতৈ ।

মেইপাগৈ চিকারী দিয়া আংকরল থাংতে জুরাপ নাদিয়া নুৱারল । মইলকর নাঙহান মাতানি নুৱারিয়া ইঙ্গিতে আকাৰে কথাল বাগেইল মইলকর নাঙ “ওরে কেছুরগাঙর চৌবার মালকর নাঙহানর তুল আকতা ।

—— জারমানি ?

—— হই ।

বদুঙর মইলক জারমানি, হৌরিয়ক অমরী এবাকাউ বদুঙরে পানির খৌরাঙে পথগং আরাঙগর বাহিৰে বাসেয়া আসিহান হাৰপেয়া মেইপাগৈ এগিৰে খেদানিৰ হন্না অকরল । হরানি আহান ধরিয়া মন্ত্ৰহান সলকরে সলকরে আরাংগ তালকরে গেলগা । আলয়া আয়া বদুঙরে লমইলগা ঝাৱানিহান ঝাৱেইল ।

আচানক হান ! পিত্তিরিগিয়ে এরা দিলতাই দ্বিদিন তিনদিন নাহেয়া আসেগ পারা
অয়া গারিগ এরা দিয়া পড়িল। মানু পুলসিহান দেহিয়া লাজপেয়া মুরগ নঙেইল। ব্দুঙ
বালা অইলহান হারপেয়া পুলসিলা মানু গরে গরে গেলাগা। এহানার জারনহানে হাপ্তা
দশদিন ব্দুঙ খেয়া পিয়াউ ইম্পানি অয়া থাইল।

আকদিন কথাত কথাত পড়িয়া বাবাই ব্দুঙরে পিত্তিরি উতার য়ারি আংকরানিয়ে
ব্দুঙে মাতেসিল — “পিত্তিরি জেলা উতা নিয়াম শাংহবা টেইপাং মানুরাংতৌ হবা।
গারগ বুজে হনা পিদতারা। আমি সকইলে হনা উতা মাটি অলর।”

—— পিত্তিরি উতা অমাটিক হবা বুলর থাংতে দেহানি আহের।

—— না অজা, তি পিত্তিরি উতারে দেহানি মনেইলেউ নুরারতেই —— তরে
নিয়াম ডরপেইতারা।

রাতি আকহনাং অমাটিক নিয়াম য়ারি হারপা বেলাসেতা ব্দুঙে।

পিত্তিরি এতাই হাবিরে কাবু করানি নুরারতারা। ভূত-প্রেতর বেলায়ৌ এসাদে।
রাশির প্রভাব আহান এতাত কাম করের উহানে হাবিগৈ মনেয়াউ বা পরিবেশ অনুকুল
অয়াউ ভূত-প্রেত নাঙ নাইতারা।

আজি কালি পিত্তিরি, ভূত-প্রেত হবানেই দৌ দুক নেয়ইলা বুললেউ য়াকরের।
আজি কালি নিয়ামপারা টেইপাং মানুর বেবার চরিত ভূত-প্রেতরাংতৌ থিয়ইল বুলিয়া
পাউরি এতার গজে প্রভাব বেলানি নুরারতারা —— টেইপাঙ মানুরে উল্ট তানু ডরপেইতারা
পাউরি।

* * *

আট-আনি পালা

হাকতাক আহনাত গাঙর মানুরে যাত্রাপালা নিয়াম ঠিকপেইলা। দুর্গাপূজাত বাগিছায় বাগিছায় যাত্রা পালা করলা। কাদাবারার গাঙর মানু যাত্রা হুনানি-দেহানি মনেয়া সেন্দাহান অইবতাই বাগিছাত গেলাগা।

কনাক কালে ‘যাত্রা’ চেয়া বুলতে বুলতে বংশীর মুরগৎ যাত্রার পক হমা পড়েসিলাগা। উহানরকা বুলিয়া লেরিক, তামকরানি সামকরিয়া বংশী ‘যাত্রা’র দলে হমাসিলগা। ডাঙর অইতে অইতে যাত্রাপালার পাঠ দেকুরার লেহাৎ হমেইল। নিয়াম দিন যাত্রার দলে থাইতে থাইতে এতা দলর লেজ-মুর হাবি হারপাসিল বংশীয়ে। ‘যাত্রা’র পাঠ অকরেসিল দিনেস্ত তা নিজর দল আহান হংকরানির হৌপন দেহেসিল।

‘যাত্রা’ দলে খানি পুরান্না অনিয়ে বংশীয়ে নিজর দল আহান হংকরানি মনেয়া খালকরানি অকরল। ‘যাত্রা’র দল আহান হংকরতে পয়সা-লিকল লাগের, পেশাদারী মানু লাগের, অরানিরকা আঁরৈপা ফাম লাগের, এতা-হাবি কুরাংত পেইতৈতা বংশীয়ে ? বংশী ও এরেকুরাগ নাগৈ। তার হৌপনহান টেইপাঙে না ফরকরিয়া এরানি নামনেইল।

কাম করেসিল ‘যাত্রা’র দল উহান আকদিন এরাদিয়া আলয়া আহিল বংশী। আহিল উবাকা দল উহানর মেনেজার উগৈ বংশীর মনর খৌরাঙহান হারপেয়া পুরান্না তবলা জোড়া আহানে বার হারমুনি আগ খুন্তল দিয়া বংশীয়ে খৌতাল দিল।

গাঙে আলয়া আয়া বংশী তার নিজর ‘যাত্রা’ দল আহান হংকরানির হমা করানি অকরল। মানু দুগ আগো লগে করিয়া গাঙর মালঠেগৎ অরানির ফামহান লেপকরলা। যেতাই ‘যাত্রা’ নুঙেই পেইতারা বার খানিমানি অভিনয় করানি পারতারা উতারে পুলকরিয়া হুফ পালা আহান অকরানি লেপকরলা। পয়সা লিকল খানি চান্দা করিয়া ফিজেৎ বার আতিয়ার সরঞ্জাম লনির সিজিল করলা।

আটআনা দিয়া হুফ পালার লেরিকশৌ আহান লয়া আনলাগা। পালাহান অইলতাই “অভিমন্যু বধ”। আট-আনি পালা এতা গেইতে নিয়াম অইলে ঘন্টা আহানান্ত দেড় ঘন্টা লাগের। হাদিমেরাকে কনসার্ট, শুক্রার নাছা, ফাগি চুটি আকেইগ বরেইলে দি ঘন্টা কিতা ফৌবনি যাকরের।

মালঠেপে নিককা পুলয়া অরানি অকরলা। দেহানি মনেয়া পুলইতারা উতারেল নিক্কা রস মাহি অর।

বঠা নাঙর কনাক সৌ আগ যাত্রাহানাৎ হমানি মনেয়া নিককা নিককা মালঠেপে বহিয়া থাইলহা। কনাক অসে বুলিয়া তা হমেইব পদফাম নেই তা থকয়া তারে কুনগয়ৌ

আংডাং নাকরলা। তাউ তারে মাতকা বুলিয়া নিককা নিককা আয়া বাসেয়া থাইল। পালাহানর পাঠ দেকুরা লেপকরিয়া লমকরে নিতারাগাহান দেহিয়া বঠা আকদিন বংশীয়ে মাতল, “খুড়া, মরেও পদফাম আহান দেইনে। মি ও গারনিং হমানি মনাউরি।”

বংশীয়ে দেখল সৌ এগ কনাকেও গারনিয়েদে মনহান দিয়াবেললে লেরিকেদে মনহান নাদতৈ উহানে লাহাঙেদে বঠারে আহান হুমকরল — “হাইদে তি অভিমুন্ডর গরাগর পাঠহান দিস্।”

সাদাসিধা সৌগ বংশীর কথা উহান হুত্তমেহান পারাবেয়া হারৌ হারৌ অয়া জেঠাবেয়করে মাতলগা, “দাদা, মরেও গারনিং পদফাম আহানি দিলা।” জেঠাবেয়ক মদন নিয়ামপারা রসিক মানুগ আসিল। সাদাসিধা সৌগ পেয়া এগরেল ফাগিফারাং করে থাইবাহান দইরাপ করিয়া বঠারে আংকরল — “কি পদফামহানতে দিলা?”

— “অভিমুন্ডর গরাগর পদফামহান।” বঠায় হুমকরল।

তি ও য়াকরিয়া আইলে।

— হাই, য়াকরলু।

পরল্লেইহান আইল। ঘাস নেই বসরহান চেয়া গরাগর পদফামহান কিহান হারপেয়া লইলেগাতা। রুৱসিলাং টাটুৱাহানৌ গুলাই মারেদিল, ঝিয়ানা খানিয়ৌ রুৱানি নুৱারলাং বসরহানাং গরাগল লাংলাত পড়তাঙাই। যাগা ফিরাদিয়া আইগা।

বঠা জেঠাবেয়করে নিয়ামপারা য়াকরল। জেঠাবেয়কর কথাহান বেলানি নুৱারিয়া রাতিফুলে গারনি অরেইতারা উপেই গিয়া মুরগ নঙেয়া বহিয়া থাইলগা। বংশীয়ে বঠারে দেহিয়া আংকরল, “বঠা কিয়াকা মুরগ নঙেয়া বহেসংতা?”

বঠা মনহান নিয়াম হিনপেয়া হুমকরল, “খুড়া! দাদাই এমারি ঘাস নেই বসরহানাং গরাগর পাঠহান করানি নাদের তা থকয়া মি গারনিং না হমেইতৌ।”

বংশীয়ে মদনর রস এহান হারপেয়া বঠার পিঠিহান মাঠিয়া দিয়া মাতল, “হাইহান! যাগা লেরিক তামকরিয়া ডাঙর অইবেতাই তরে আমার গারনিহানাং যৌকরতাঙাই” কথাহান ইলয়া বঠা গরে আলয়া গেলগা।

বংশীর তালাবিং গারনিহান অকরাগ দিলা। ভীথুর পদফামহান সেলকমবাবুয়ে, কর্ণ কমলে, দুঃশাসন রবিয়ে, শকুনি বসন্তই, জয়দ্রথ প্রসন্নই এসাদে করিয়া পাঠ পেইলা। অভিমুন্ডর পাঠহান দিলাতাই বলিপাংকালপা গাররাপুৱাগ চ্ছেয়া — ধনেরে।

হাবিয়ে নিজর নিজর ডায়লগ ইকরিয়া নিয়া হিকানি অকরলাগা।

রসময়ে দুৰ্য্যধনর পাঠহান হবাকরে দেনি পারেরথাঙৌ গিরকর হারগ খানি-হুৱার

অনিয়ে অমাটিক চুনা নার। বংশীয়ে তারে গরে আচ্ছুলে আচ্ছুলে টটরানির অভ্যাস করানিরকা মাতল। আকদিনকার হুয়ার হুয়ারগ পটেয়া বহলা করানি সাদের কামহান নাগৈ। গরে নিককা নিককা আচ্ছুলে টটরা টটরা ঠকহান করে নেরগা — লেইকির মানুবে মেরাকে রসময় বাপকর তুল কৌলি লাগেসে সাৎ বুলিয়াউ নিংকরলা।

গরে গরে হাবিয়ে ডায়লগ অরেইলা, উতা কিতার লৌ চিকারিয়ে গাঙহান দুমেল হৌ অইল। ‘গাঙর গাররাপুরেয়ে যাত্রা অকরেসি’ এহানল গাঙহানাৎ বার লয়াগৎ হারৌপার জোবার কইল।

যাত্রাহান হিকিয়া লমকরে নিতারাগা। বংশীরতা এখুরুম খালকরানি আহান হমেইল। — “গারনিহান দেনিতে কুমেপেই?” তানু যে হুফু পালাহান অকরেসি এহানল ডাঙর আসরে বার্তন পানি নাইতৈ। পইলাঙ নুয়া মানুরেল ডাঙর পালা অকরানি ও কম কথাহান নাগৈ।

বংশীয়ে খালকরল — “এসাদে হুফু পালাতে আমার মানুর মালঠেপে হে দেনি হবা অইতৈ।” আমর মানুর বার্তন বিসারেয়া থাইল। বংশীর নিজর আতে হংকরা গারনিহানর পইলাকার কুমেইহান — তার হৌপনহান আজি টেইপাঙ ফৌঙনির থংচিলহানাৎ বাসেয়া থাইল।

বংশীর খৌরাঙ এহান খুঙনির খেলতামহান আহিল। বুরুঙ্গার বিজয় এইগাই বাসন্তী পূজা বহাসে। কুমেই কিতাউ যুতেসে বুলিয়া হুনিয়া বংশী আকদিন বিজয় এইগার তুল ফাংনা অনি মনেয়া গেলগা। ফৌরয়াউ বিজয় এইগারে হমাদিয়া মাতলগা, “এইগা। মোর নাঙ বংশী। এইগারে দেহানি মনেয়া আইলুতা।” বংশী নাঙ এহান এইগাই হুনেসে পারা তা থকয়া আংকরল, “জলি অপেরাত কতবসর আগে কর্ণর পাঠ করল বংশী উগ না কিতা?”

— হাই এইগা।

— এবাকাতে কিতা করর। জলি অপেরাঙ নিকুলেসৎ বুলিয়া হুনলাৎ।

— হাবি এরাদিয়া আয়া এবাকা গাঙে হুফু যাত্রা দল আহান হংকরেসু। এইগাই পূজা বহরহান হুনিয়া এইগার তুল দেহা করানি মনেয়া আইলুতা। এইগার য়াথাং থাইলেতে মোর যাত্রা দলহানর পইলাকার পালাহান এইগার পূজাৎ কাতকরানি মনাউরি।

— পালাতে কুংহান দিয়রাই।

— এবাকাতে হুদা আকহান দিয়ার এইগা — অভিমন্যু বধ।

মহাভারতর পালাহান হুনিয়া এইগায়ৌ মনাবেলল। ‘রাতিফুরেয়া দেনি লাগতৈ’

বুলিয়া মাত্তে বংশীয়ে পিসমুঙ না খালকরিয়া গসেবেলল থাংতে এইগা রূপা আহানল বংশীরে বার্তন করিয়া সাঙেল।

বংশী তার ইচ্ছদিনর হৌপনহানর নৌগ টেইপাঙর টেকাগৎ চেপকরানি পারতৈহান হারপেয়া হারৌহানে মিকুপ আহানরকাও না খালকরল তার আটআনি পালা উহানল রাতিহান ফুরানি পারতাই না নুরারতাই। হারৌহানে উরাদারা গরে আলয়া আয়া হাবিরে বার্তনর য়ারিহান বাগেইলহা।

পূজার বার্তন পেয়া বংশীর গারনি দলহান ফিজেৎ-ফুতি, পর্দা, আতিয়ার পাতি ধয়া-পাজালেয়া গুফী করিয়া বাজনা কিতা উবাজাসিলা উতা হংকরিয়া যোগাড়ে থেঙইলা। দিন বিত্তা অয়া আহের মাহি, বার্তনহান দিতে এইগাই মাতেসিল কথা চুটি উহানিয়ে বংশীরে কাটা বিদানি অকরল। “আট আনি পালাহানলতে কিসাদে রাতিহান ফুরেইতাঙাইতা?” এসাদে ছরু পালাল বিয়ান ফরনি নাইতৈ উহান বংশীরাংত জিঙে আরতা কুংগৈ হারপেইতাইতা! যেতাউ অক বার্তন ল’ বেললা থাংতে করিলতা কিত্তাউ নেই — আন্চিল অনি থক নেই। বংশীয়ে রাতিহান ফুরানি পেয়া কুমেইহান আসুলানির পেচ খেলানি অকরল।

চৈত্র পূজার নবমীর দিনে সেন্দাহান অইল। বংশীর দলহান পইলাকার কুমেইহান দেনিৎ সালইলা। যাত্রার বারপজা, আতিয়ার, ফিজেৎ গাঠুরিৎ বকচা বাধিয়া হাংকা রাতি অইতাই ভীষ্ম, দ্রোণ, কৃপ, কর্ণ হাবি ‘জয় মাধব — জয় মাধব’ বুলিয়া বুরুঙ্গাদে সালৈলা।

বংশীয়ে পইলাকার পেচহান অকরল। “তুমি আটানি অকর, মি আউরি বুলিয়া গরে হমেইলগা। লগর উতা বকচা বারকরিয়া গাড়ীর ফামে ফরইলাগা। বংশী এবাকাউ না ফৌরইলগাহান দেহিয়া লগর উতা খাংকরে নুরারিয়া থা’যিতারাগা। নুরা নুরা যাত্রাৎ হমাসিতা থকয়া রামাহানে ডিল অ যারগাহান খাংকরে নুরারিয়া কানাকানি অকরলা — “মেনেজারগ অসেহান দেখ্‌রারতা।”

নিয়ামপারা ডিলকরিয়া বংশী আয়া ফৌরইলহা। এতা নুঙেই নাসিহান হারপেয়া বংশীয়ে মাতের, “ডিলয়াউ থাইক — কিত্তাউ নেই, আমার মানু না —— আরতি দিতে দিতে এমনৌ ডিলকরতাইগ। এগদে ভরর দিনহান। রাতি ফুরানির কুমেইহান খেয়া পিয়া হে অকরতানাই!”

মাগ্‌তে মাগ্‌তে বাসহান আহিল। চড়তেই বাসহান এড়া দিল।

‘বংশীর গারনিহান চেইতাঙাই’ বুলিয়া উরাদারা আরতি কিতা লমকরিয়া বিজয় এইগার মালঠেপগ চম্ম বুজেসি। মালঠেপগর হমবুকুরমা ষ্টেজগ হংকরেসি। দৌর ভাত রাধানির বালর সাঙগরে “গ্রীণ রুমগ” হংকরেসি। যাত্রার দলহান ডিলইতারা হান

দেহিয়া লৌদালৌদি অকরলা । তানজা উগৎ যাত্রা দলহান গিয়া ফৌরইলাগা ।

বালর সাঙগৎ হমেয়া পর্দা দুহান আহান টাঙিয়া আউর করিয়া সালনি অকরলা । নারীবর্জিত পালাহান থকয়া বেয়াপার সালনির গৈ নাসে । গারনিহানাৎ ধৃতরাষ্ট্রর পাঠহান দিতৈগা দলাবুড়াই গ্রীনরুমগন্তে দেহানি পারের — মেঙসেলহান চেয়া চেয়া দলা দাড়ি উতা মেইথংহানাৎ নাপকরাৎ থেঙসে ।

গ্রীণরুমর দায়িত্ব নিয়া আসেতা থাবাল বুলিয়া ঠার-সাকতি গিরক আগ । বংশীর কানে মন্ত্রহান পেয়া “তাপক্ তাপক সালৈ, সময়হান কিন্তাউ নাসে বুলিয়া” থংচিলহান রাহিয়া বহেসে । হাজেইতারা উহান দেহানি মনেয়া তকাতাং মৌনাহা কতগ আয়া পর্দাহান তুলিয়া চেইক বুলতে থাবালে দেখল । সৌ-অনি সটহান দিয়া দ্বারগ ডাঙরকরে “গঠনিগাছি, মুনিয়ৈ সালৈতেতে কিয়াকা চারাইগাতা — লাজ নাপারাইতা” বুলিয়া উতারে তালকরল । মৌনাহা এগি ঠটে বারি খেইলগি অলয়া “বাঘে খৌরাগর ঠার সাক্তিহান” বুলিয়া ইজ্জুম অয়া গিয়া ফালুত বইলাগা ।

কুমেইহান অকরানি ডিলযারগা দেহিয়া মালঠেপগৎ গুজুরা-গুজুরি অকরলা । কাফামহান বেয়া লাগেরহান দেহিয়া বংশী বাজনা বাজাকুরা উতারে ষ্টেজগর কাদাৎ তানুর ফামে গিয়া বাজনা অকরানির সিজিল করিয়া শুক্লা সৌ দুগরে নাছানিরকা মাতিয়া বিজয় এইগার তুল দেহা করানিত গেলগা ।

বংশীয়ে পারিল মাহি ডিলকরানির পাকচা করের । কনসাট বার শুক্লার নাছাল ফালুর মানু বিভুলা করিয়া বিজয় এইগার তুল যারি অকরলগা বংশীয়ে । এইগারাং গিয়া ডিগলগ অয়া হমা আহান দিয়া বংশীয়ে মাতলগা, “আক্খুলা মানুগ দাপদা-ফালদি করতে করতে ডিল পড়লাংগাতানা । এইগা, যারৌ না করিস । এক্বাকাই অকরতাঙাই । বিয়ানত সিজিল করতে করতে ভাত খানাহান পেয়াউ পাছরেসু — বক আহানে হিনপা যাউরিগা, এইগা !”

বিজয় এইগা বংশীরেল গরে হমেয়া দৌর প্রসাদ থসি উতান্ত খানি খেইকরিয়া বংশীরে খানিরকা দিল । বংশী খেয়া খেয়া আজিকার পালাহানর যারিহান এইগারাং দেনি অকরল — “এইগা অভিমন্যু বধ এহান আজিকালি হাবির গজে অয়া চলেসে পালাহান । দুর্বলর গজে পাংকালপার অত্যাচার — এহানেই আজিকালি দেহিয়ারহান । কলিকাল এহানাৎ ন্যায় এহানরে অন্যায়ৈ যাতেইতৈ এহান দ্বাপরেই ভগবানে দেহরাসিল । অভিমন্যু বধ এহানৌ উহানর পানতামনা আহান । হাতগ মহারথীয়ে য়েবাকা অন্যায় করিয়া কনাকসৌগ অভিমন্যুরে মারতাই উহান দেহিয়া দর্শক — জারে পারবা নি নুরারবা । অমাটিক হবা করে দেহরেইতাঙাইতা । অভিমন্যুরে বেলতাই উবাকাহে কুমেইহানর চি-

যৌপা নুঙেইপাহান।”

বংশীয়ে এগদে সময়হান খেদানিরকা মনেয়া য়ারিহান ডিগল করেনেরগা। হৌগদে ফালুত বহেসি মানু নিয়াম ডিল য়ারগাহান দেহিয়া লৌদা-লৌদি অকরলা। বংশী আলাশালা খেয়া আতহান ধয়া গ্রীনরুমগৎ হমেইলগা, বিজয় এইগা ও ফালুহানাৎ বহিলগা।

কুমেইহান অকরলা।

আট আনি পালাহান অইলতাই একাংক নাটকহান। একাংক নাটকহান থকয়া এ পালা এতা রাতিহান ফুরানির কুমেই নাগৈ। নাপেইতে-পেইতে পাসে বার্তনহান এরাদেনি নামনেয়া বংশীয়ে রাতিহান ফুরানির কথা দিয়া লসিল বার্তনহান। অকরতে খানি ডিলকরানি মনেয়াউ ভাবুক-বৈষ্ণবর খৌরাঙে আকয়া নিয়াম ডিলকরানি নুরারল। এবাকা এ আট-আনি পালা এহানল কিসাদে বিয়ানহান ফুরানি এহান খালকরিয়া পথ বিসারানি অকরল বংশীয়ে।

দৃশ্য আকেইহান লমইলেই ফাগিফারাং আকেইচুটি বার নাছা আকেইহান দেখরেয়া সময় খেদানি অকরলা। দৃশ্য আকেইহান লমরমাহি বংশী বিজয় এইগারে দেসিল বাক্য উহান নিংশিং অয়া ‘দুর্গা’ ইমারে হমাদের “ইমা আজি আমার মান সম্মান থদিস।”

দৃশ্য তিনহান লমইতেগা হাগহানাৎ মেঘর সাকা নিকুলিয়া আধার অনি অকরল। চেইতে চেইতে দিনহান গুর-গুর করিয়া রহিয়া আহের। গারনিহান নিয়াম নুঙেই করে দিয়া যিতারাগা। চারিয়ো ফালু বুম মারিয়া বহেসি।

কুমেইহান আগবাড়ের মাহি হাগহান কঙালা অযারগা। লিরি লিরি বৌ আহানল বৌরাজা গিরকে পৌ-আহান দিয়া পেঠেইল। বিজয় এইগা দিনহানর অয়ংহান দেহিয়া মনে মনে বৌরাজা গিরকরে হমা দের “বৌরাজা গিরক। আজি বেরা না করেদি।” বংশীয়ে “বৌরাজা গিরক! আজি আমার মান সম্মান থদিস” বুলিয়া হমাদিল। কুমেইহান অসে নুঙেইহানে বৌ-বরণ আহান আহের পারা এহান কুনগয়ৌ হার নাপেইলা। হুদা হারপারগ বংশী — গারনিহানর মেনেজার, ডিরেক্টার, একটারগ। গিরকে এহানেই মনাসিলহান।

দৃশ্য চারিহান লমইল। শুক্রার নাছা চুটি আগর লগে কনসটি আগল দৃশ্য খেইকরিয়া লমইলগা দৃশ্য হানাৎ পড়লাগা। রাতিহান ফুরানি এবাকাউ নিয়ামপারা বাকী। পালাহানতে লমনি বিত্তা অ-যারগা। কুমেইহান চেয়া রাতিহান ফুবেইতাঙাই বুলিয়া চারিয়ো ফালু চম্ম বুজিয়া ইমপানি অয়া বহেসি এতার খৌরাঙহান থুমকরানি নুরারলে নিজরতাউ নুঙেইপাহান না লাগতৈ — বার নাগৈতা টটরতাই উতারতা বার সম্মানে বারি খেইতৈ — এতা কিতা খালকরিয়া বংশী ফর ফর অল য়ারগা।

পালাহান লমনি বিত্তা অয়া আহের। লালফামহানাৎ পড়লাহ। অভিমন্যু ব্যুহরগরমা হমেইলগা। অভিমন্যুরে ব্যুহরগরমা বরেয়া হাতগ মহারথীয়ে চারিয়বারাদেত্ত থেংকরিয়া লালফামহান অকরলা। নিয়াম আত্মবিশ্বাসল চেকমুক্ নায়া হাতগ মহারথীর তুল লালফামহান করিয়া যারগা।

নিয়ামপারা বলিপাংকালপা অইলেরগায়ৌ ব্যুহগত্ত নিকুলানির লালফামর লৌশিংহান অভিমন্যুরে হারনাপাসিল। অজ্জুনে শ্রীকৃষ্ণরাংত ব্যুহগত কিসাদে হমানি ব্যুহগত্ত কিসাদে নিকুলানি এহানর লৌশিং হান ছনানি মনেয়া আংকরেসিল উবাকা সুভদ্রা ও কাদাৎ বহেসিলি। উবাকা তেই অভিমন্যুরে মাহ লেপসিলি। শ্রীকৃষ্ণই যেবাকা ব্যুহগৎ হমানির যারিহান দেসিল উবাকা অভিমন্যু ইমা সুভদ্রার পেটে থায়া ছনেসিল। যেবাকা শ্রীকৃষ্ণ ব্যুহগত্ত কিসাদে নিকুলানি এহান মাতানি অকরেসিল উবাকা সুভদ্রা বেরহান পারা অয়া গেসিলিগা থাংতে ছনানি নুরারেসিলি। তা থকয়া অভিমন্যুয়ে ব্যুহগত্ত কিসাদে নিকুলিয়া আহানিহান হার নাপাসিল।

ব্যুহগত্ত নিকুলানিহান হার নাপেইল থাংতে হাতগ মহারথীর তুল আকখুলাগৈ লালফাম করতে করতে ঠুকরে যারগা। পাংকালহান ঠুমেসে তা থকয়া অভিমন্যু আকখুলাগৈ কামহানশা নাকরিয়া লালফামহান চলেয়া যারগা।

দ্বাপরে অভিমন্যু ব্যুহগত্ত নিকুলানি নুরারিয়া মরনহান ডর নাপেয়া হাতগ মহারথীর তুল যুদ্ধ করিয়া গেসিলগা উহান স্বর্গত্ত দৌলিশিং দৌলাশা হাবি লাঙয়া চেয়া আসিলা। আজি কলিযুগে বিজয় এইগার মালঠেপে হাতগ মহারথীর তুল অসে অভিমন্যুর লালফাম এহান দেহানি মনেয়া স্বয়ং বৌরাজা গিরক বরুন দেবরেল সালয়া আহের। দিনহান গুজুরিয়া ঝিলকানি অকরল। লিরি লিরি বৌহান খানি পাংকালহান পেয়া বরি অনি অকরল। মালঠেপগৎ লালফামহান জ্বিগ অসে।

বংশীয়ে তার কুমেইহান ডিগল করানির আরাক পেচ আহান অকরল। অভিমন্যুরেল আকেইগ মহারথীর তুল তঙাল তঙাল করে লালফাম কররানি অকরল। দুগৈ আকখুরুম গদাল ; আকখুরুম কার-ধনুকল ; আকখুরুম থাংজাংল ; আকখুরুম জাঠিল ; আকখুরুম লাঠিল ; লমইতেগা হাবিতা থয়া লাকাটি। থাংনাৎ দ্বিয়গরমা আগৈ লাঠিল হৌগৈ গদাল ; আগৈ গদাল হৌগৈ কার-ধনুকল ; আগৈ কার-ধনুকল হৌগৈ থাংজাংল ; আগৈ থাংজাংল হৌগৈ জাঠিল এসাদে সিগাসিগ্নি আতিয়ারল অভিমন্যুর তুল হাবিরে খেই খেই করে লালফামহান কররানিৎ থেঙসে। উহানে লালফাম এহান ডিগল অয়ারগা। অভিমন্যুগ অসে এগ ঠুকরে যারগা। বংশীয়ে লালফামহানল রাতিহান ফুরানি মনাসে।

ভাবুক ভাবে হুমাপড়িয়া কুমমারিয়া লালফামহান চেইতে বংশীর পাকচা এহান

হারনাপেইলা। অভিমন্যু আকখুলাগৈ আর কতিতে লালফাম করতৈতা ? তেত্তগ অয়া হেইবি নাইবি দেনি অকরল। অভিমন্যুর হিন উহান দেহিয়া অভিমন্যুরে থাকাং দেনিহান পারা অয়া মালঠেপর ভাবুক অভিমন্যুর নাঙে জয়ধ্বনি দিয়া লৌদানি অকরলা।

ক্লাইমেক্সহান বৌরাজাই কাড়লইলহা। দ্বাপরে অন্যায় করিয়া হাতগ মহারথীয়ে অভিমন্যুরে মারেসিলা। দৌলিশিং দৌলাশা শ্রীকৃষ্ণর মেইথংহান চেয়া কিত্তাউ করে নুরারেসিলা। কাছি কাছিয়ে দাত কামারেয়া আসিলা। কলিযুগে সেংকরে উহান দেহিয়া আর জারানি নুরারলা। কাছি সাক্তি বৌরাজা লঙলেইগ অয়া আয়া বিজয় এইগার মালঠেপগর কুরুক্ষেত্রহানাং হমেইলহা। বরুনদেবও পিঠি পিঠি অয়া আহিল।

অভিমন্যুরে মারানি নুরারলা — বৌরাজা গিরকে কালকরে দিলহা। বৌ বরনহানে হাবি ছারখার করেদিল। কুমেই চাকুরা হাবি সিতু বিতু অয়া যেগ যেগদে পারিল উগদে গিয়া হমেইলাগা। বৌবরনহানে আকয়া কুমেইহান লমইল। রাতিহান এবাকাউ না ফুরাসে। দুরাদে বৌ-উরুল্লিগৈ হাবিতা উলট পালট করে, গ্রীণরুমর ভিতরে হারৌপার বৌ উরুল্লিগ বুলের। আজি বংশীর হারৌ কুংগৈ দেহের ? তার আতে হংকরা গারনি দলহানর পইলাকার পালাহান সুপারহিট অইল।

এইগার তুল অসে কথাহানর শৈ-সামারাং নাইল। রাতিহান ফুরেয়া কুমেইহান দেহুরানি নুরারানিরকাতে তানু দায়ী নাগৈ নাই।

বৌরাজা গিরক মনেয়া আহেসিল কামহান লমকরিয়া মুড়ি-খক্করিয়া আলয়া গেলগা।

কুমেইহান হাদিমেরাকে বাগানিয়ে বিজয় এইগা মনহান নিয়াম হিনপেয়া গরে গিয়া উপুগং কইঙগা বুলতে বংশী আয়া জাঙহানাং ডিগলগ অয়া পড়িয়া মাতানি অকরল, “এইগা ! আসল নুঙেইপা তানজাগং কিহান অ-পড়লাংগাতা — দেহুরানি মনেয়া আহেসিলাং উহানেই দেহুরানি নুরারলাং।” মাতে মাতে গড়েইপা হেক আগ আনল বংশীয়ে।

— দুঃখ না করি বংশী ! যেহানি দেহুরেইলাই উহানিয়ৌ পাছুরানি নুরারতাঙাই। নিয়াম হবা করে দিলাই। মোর কপালহানাং নেই থাংতে দুঃখ করিয়াউ করতৌহান কিহান। জিংতায়া থাইলে বুলনে দেখতাঙাই।

বংশীর মুরগ মাঠিয়া মাঠিয়া গারগং বেলাসে ফিতুপহানল বিজয় এইগা আহির পানি পুসানি অকরল।



কদমলেই

প্রতাপগড় লয়ার ‘লঙ্গাই’ হানর বাংগুরি বারার পারগত আসাম ত্রিপুরা সড়কগর দলংহানর লামাং নিয়াম মাচাচেতয়া বহেসে গাঙ আহান। প্রকৃতির দয়াং গাঙ এহান অমাটিক পহর অসে দেখলেগা মন চরকরের। আক্‌বারাদে নাছে নাছে তালে তালে এলাদিয়া খলপি খলক করিয়া যেইরিগা ‘লঙ্গাই’ হান, আরাক আক্‌বারাদে তাপথা অয়া বেলির মিঙাল বাটানি পাংকরিয়া বহিয়া আসে নাঙ ফিটা বিল আগ, বিলগর পিঠির পারগত রেলসড়কগ, মুঙর পারগত খেতির লপুকগর হাদিয়েদে ত্রিপুরা যানির মোটর সড়কগ। উত্তর পারগত পারেং পারেং তিড়া গাছর পিঠিৎ গাঙ এহান।

আমার মানুর আরাক গাঙ আহান এ গাঙর হৌপারে আসে। হাদিগরমা লঙ্গাইহান। দ্বিয়গাঙর সম্পর্ক হবা করনির হনা আহান করতগা ‘লঙ্গাই’ হান এপেই হাবিত্ত চেপ্টা অসে। বরিষাত যতৌ তাঙব দেখরাক, হুকানার পরে তেই দ্বিয়পারর মানুরে আটিয়া লালনির সিজিল করিয়া থদেসে।

ঔ গাঙে কদমলেই বুলিয়া নিঙল আগ আসিলি। শাতে-বাতে, মঙে-মাতাঙে নিয়াম হবা অসিলি। লেরিক খানিমানি পাকরলেউ কদমলেই সাদাসিদা বার খানিয়ৌ আপাংপিগ অসিলি। ইমা বাবাই যেহান মাতলা উহান ইলয়া চল্লি। ইমা-বাবার দুগগ-জিপুতরমা আক্‌খুলি নিঙলগ কদমলেই। তেইর আকখুলা বেয়কগ হরিলাল। হরিলাল জেঠাগ। দ্বিয়বেইবুনি আগরে আঁগে নিয়াম বানা পেইলা। কদমলেই ইমা বাবার কথাত্ত জেঠা বেয়কর কথাই নিয়াম যাকরল। হরিলাল খানি বেয়াপা-সাকপাগ। লেপগৌ বনকর তুল আকতা, গারির কচুহানৌ বনকর তুল আকতা। দ্বিয়বেইবুনিরে মানুরে তঙাল করিয়া চিনানি হিনপেইলা। ডাঙর অনিয়ে হরিলালরতা হেইরাপ মুছ উঠানিয়ে মেইথঙহান খানি তঙাল অসিল। উতাউ বনকর রাসে মুছহানি খুরেয়া মাথাংগ অসিল উবাকা মানুরে দোহার-মাথাঙরে “ডাবল একটিং” বুলিয়া মাতেসিলা। হরিলাল মেরাকে যাত্রাত নিঙলর পাট করল।

তানুর হৌপারে কাঙ আসুল্লা হুৰু গোচরা আগ আসিল। ঔগরমা গাররাপুরেই সৌ বিয়ান-মাদান গুরু রাহিয়া থাইলা। গুরু রাহে রাহে মনেইলা উতাই খেল্লা, মনেইলা উতাই এলা দিয়া থাইলা। উতারমা গকুল বুলিয়া গাররাপুরাসৌ আগ আসিল। বলিপাংকালপা সাহসহানৌ হবা, নিয়াম হবাক’ বাশী রহেইল’। গাঙর রাসে কতখুরম কৃষ্ণং অয়াউ নাছেসিল। তার বাশীগর রৌহান হনবাতাই এপারেত্ত “হৌপারর কৃষ্ণং” গুরুরাহানিত আহিল বুলিয়া ফাগি ফারাং করলা।

আকদিন কলচপল গাটে যিতেগা কদমলেয়ে পেইরাক্ গকুলর বাশীগর রৌহান
হ্নল। উরাদারা লেরিগন্ত লামিয়া পানিহানর পটে লেঙোসটাগৎ কলচপ থয়া বাশীগর
রৌহান নুঙেইপেয়া হ্নানি অকরল। হ্নতে হ্নতে বিভুলা অয়া কুম্বাকা কলহানি দারেয়া
হদেইল হার নাপাসে। কলচপ থয়া তাপক' তাপক' গরে আলথক অয়া আইলি। উতার
পিসেদে কদমলেই বাশীগর রৌহান হ্নবতাই কলচপল গাটেদে নিকুলিরি।

আকদিন গকুল গুরুগি ফিরানিরকা বুলিয়া লেরিগর পটগৎ আইতেই কলদারেইরি
কদমলেইরে দেখল। কদমলেইর রূপহান দেহিয়া গকুল কুপকরে তেইরে চেয়া থাইল।
এপার হৌপার। কদমলেয়ৌ কলহানি দারেয়া হদেয়া হৌপারেদে চেইতে গকুলর লগে
আহি পড়া-পড়ি অইল। আতহানাৎ বাশীগ দেহিয়া কদমলেই হারপেইল “এগ বাশী
রহার গুরু-রাহাল উগ” খানি চেয়া মানুরে দেহে বেলতাই বুলিয়া কদমলেই লাজপেয়া
কলচপল উরাদারা গরে আলয়া আইলি।

পিসেকার দিনেউ তানুর দ্বিয়গিরতা এসাদে সেংকরে দেহা অইল। আগরে আগৈ
দেহানিরকা তানু হুদা ফঙ পাতিয়া থানি অকরলা। হৌপারে গুরু রাহানিত আইতাই
তানজা উগৎ কদমলেয়ৌ কলচপল ঘাটে যানির হিরাম চেয়া থাইরি। গুরুরাহানিৎ
আইবতাই গকুলৌ গুরু ফিরানির সটহান দিয়া পারগত আয়া কদমলেইরে মিল্লেং আকেইহান
দিয়া যারগা। এসাদে করতে করতে আগর লগে আগর টান আহান দেহা দিল। কনাক
যৌবনর ঔনাহান — কাদান্ত দেহিয়াউ নাগৈ, টটরেয়াউ নাগৈ দিন দিন টান এহান নিয়াম
অনি অকরল। গকুলেউ আর আর কাম বেলেয়া হুদা গুরু রাহিয়া গাটরপারে থাইলেগাতেক
বুলের, কদমলেয়ৌ বারে বারে কল দারানিরকা গাটে গেলেগাতেক বুলিয়া থাইরি। আগরে
আগৈ কাদান্ত দেহানির বার টটরানির সেপ্ আহান চেয়া থাইলা। ঔ সেপ উহানৌ কতমাহা
পিসেদে আহিল।

আকদিন কদমলেইগাছির গাঙর বিলগ বাঙ্গেইতারা পৌহান পেইল গকুলে।
পলগ লেম্পালহানাৎ দিয়া গাটহান লালয়া বিলেদে সালৈল। কদমলেয়ৌ গাঙর বিলগ
থ'কয়া হমাজকরেল বিলে ইংচিল খলেইল গেলিগা। পল বেয়া বেয়া গকুল হুদা
চারিয়বারাদে চার, মাছ হমেইলা না হমেইলা নাউ চার। কদমলেয়ৌ ইংচিল হান বেয়া
বেয়া হুদা বারা-বারাদে চেইরি, মাছ হমাসি না হমাসি নাউ চেইরি। দ্বিয়গি নিজর নিজর
রস আকেইহানল বিল এগর এপট হৌপট হাপদিয়া লমকরে নিতারাগা। তিলহান অসি
মাছ ধরেকুরা এতাত গকুলৌ কদমলেইরে নাদেখল কদমলেয়ৌ গকুলরে নাদেখল।
অয়াউ তানু আশা না এরাদিলা। টাক্ বারাকুরা আইতারা উতার মুঙে পল বাকুরার
লাইনহনাৎ গকুল উবা অইলগা পলগল — তানুর পিঠিৎ ইংচিল বাকুরার পারেংহান

টাক্ বারাকুরা চেপয়া ফৌরইতারাহা মাপা উগৎ পিঠিয়েদেত্তৌ শৌ-আগ খাংতাক্ক “দুলিপক্গ ধরেসে” বুলিয়া চিকারী দিতেই গকুল পিঠিয়েদে চেয়া দেখল তার পিঠিৎ কদমলেয়ে ইংচিলহান পাতিয়া আসে। উবাকা দ্বিয়গিরতাউ আগরে আগৈ কাদান্ত দেহানির খৌরাংহান পুরিল। আহির পট না মারিয়া আগরে আগৈ চেয়া থাইলা। দৃষ্টি বিনিময়র ঔ মাহাক উহানিত অন্তরে অন্তরে দ্বিয়গিয়ে নিয়ামপারা টটরাবেল্লা পারা। টাক্ বারাকুরা চেপনিয়ে তানুর গঙ ধরানিহান বাগিল। বিলগর বুকগতেই সেপ চেয়া গকুল কদমলেইর তুল টটরাবেল্ল। মিকুপহানাং নাঙ কিতা আংকরিয়া আরাকৌ য়ারি কিতা খানি দিয়া বেল্লা দ্বিয়গিয়ে। মানুৰেউ হার নাপেইলা। দ্বিয়গিয়ৌ হারপানি অকরলা আগরে আগৈ বানাপেইতারাহান।

তানু দ্বিয়গির প্রেমপর্ব চলানি অকরল এপার হৌপার থায়া থায়া। তানু দ্বিয়গি আকপেই বহিয়া য়ারি দিয়া প্রেম নিবেদন করানিরৌ হিরাম নাপেইতারা। মানু নেয়ইলে দ্বিয়পারে থায়া দুহান আহান কথা হুদা টটরানি পারতারা। উহানিলৌ তানু নিয়ামপারা হারৌ। গকুলৌ তার লেংকা মারুপরে না বাগার, কদমলেয়েতে কারেউ না বাগেইতৈ নিঙলপীগ থকয়া। এসাদে ‘লঙ্গাই’ হানরে হম্বুকে থায়া চলানি অকরল গকুল-কদমলেইর রস এহান। কুংগয়ৌ হার নাপেইলা, হুদা সাক্ষীগ অয়া আক্গ থাইলিগ ‘লঙ্গাই’হান। সময় আহানাং দ্বিয়গির প্রেম এহান খুমিৎ কাইল।

দিন আহান কদমলেইরে কাদাং পেয়া গকুল তার মনর য়ারিহান দিয়াবেল্ল। তা কদমলেইরে যেসাদে করিয়াউ অক পানি মনার। কনাক অসে বুলিয়া বাপকরাঙৌ ফঙকরে বিয়া করিৎ বুলিয়া মাতানি নুরারের। এগদে কদমলেইরে ত্বরা করেউ পানি মনার। উহানে ঔ হাকতাকে সমাজে মেরাক মেরাকে অইল উসাদে গন্দৰ্ভ মতে কদমলেইরে নেনি মনার উহান মাতে বেলল। উহান হুনিয়া কদমলেয়ৌ পিসমুঙ না খালকরিয়া গকুলরে কথা দিয়া বেল্ল। ‘কনাক পাগল’ বুলিয়া কথা আহান আসে, উহান পারা। দ্বিয়গির বয়স আর কতিয়ৌ অইতৈতা ? আককুড়িয়ৌ অইব কি নাইব, কিহানৌ বা হারপেইতারা! লেপকরা বেল্লা ত্বরা এহান। ইমা-বাবা, সাকেই বেইবুনি, গাঙ-সমাজ হাবি পাছরলা। দ্বিয়গিয়ে লেপকরলা — দিন আহান দ্বিপরকার হাদিৎ কদমলেই কলচপল গাটে আয়া কলচপ থায়া গাটহান লালনি অকরতৈ, হৌপারেত্ত গকুল আয়া তেইরে ঙ্করিয়া নিতৈগা। দ্বিপরকার হাদিগ থকয়া মানু নেয়ইতাই ঔ সুযোগ উহান কামে লাগানিরকা।

কদমলেই গরে আয়া খালকরানি অকরল। আগদে মনেইরি দামানগরাং যিতৈগা বুলিয়া হারৌহানে থাইব ফাম নাপেইরি আরাক আগদে বাপকর আক্খুলি নিঙলগ, বাপকরে দানহানান্ত বঞ্চিত করিয়া, ইমা-বাবার মেইথঙে কালিসুনু গসেদিয়া বানিৎ লেপসে

উহানে বার সমাজে তেইর কলঙ্ক আহান ইকরিয়া থনিং লেপসে উহানি খালকরিয়া ডরপেয়া থুরথুরেই কাপিরি। কুংগদেতে অইত? বানা পেইরি গকুলরে কথাউ দিয়া বেলল। এগদেউ অনি নুরারিরি-হৌগদেউ অনি নুরারিরি। খুংকুলখুচা নায়া দ্বিমন-দিশা আহানাং পড়িয়া তেইরতা পেটগ থুকথুকানিহানে খানি পিনিউ নুরারিয়া থাইলি। হরিলাল বনকরে ঠৈগ দিয়া বানাপারগ থকয়া মেইথংহান দেহিয়াই হারপেইল বনকরতা কিহান আহান অসে। আংকরতেউ না বাগেইরি। হরিলাল বনকরে তেনন দিয়া য়ারিহান লনির হুয়া করানি অকরল।

লেপকরেসি দিন বিত্তা অয়া আহেরমাহি কদমলেই ঠৈমামি চৈয় যেইরিগা। বুদ্ধি লৌশিং খানি কমগ থকয়া কারাঙৌ ফংকরিয়া মাতানি নুরারিয়া চুচর জ্বি-আগং পুড়িয়া মরে যেইরিগা পায়া। জারে নুরারিয়া লেপকরেসি দিন উহানর আগর রাতি উহান বারার দারিগদে গিয়া নারগ না নিকালেয়া হকচেলয়া কাদিরিগা মাপাউগং হরিলালে দেখল। তাপক কাদাং গিয়া বনকরে মাতলগা,

“কিহান অসেহান হাতেককরে মরাং মাত, আকগয়ৌ হার নাপেইতাই। মিহে তোরে পাংকরতুনাই।”

— বেয়কর ঠাংহান পেয়া য়ারিহান হাবিহান ফংকরিয়া দিল কদমলেয়ে। পইলা হরিলালে খানি হবানেইতা খালকরিয়া ডরপাসিল। বনকর য়ারিহান হুনিয়া, তেইর আহির পানি পুসেদিয়া মাতল,

“অ, পাঙলি, উহানরকা বুলিয়া হৌদিনেত্ত পুরি কাদিল মেরাক অয়া খানিপিনি বেলাসত্তা। হিন নাপেই, তি যেহান মনাউরি উহান অইতৈ। হুদা মি যেসাদে মাত্তৌ উসাদে করিস।

কদমলেই ঠৈমইলি।

লেপকরেসিলা দিন উহান জারর পরকার দিন আহান। গাটহান ঠায়সে। গকুল দ্বিপরকার হাদিউগং গাটহানর পারগং আয়া বাহাসপার হাদিগং পলেয়া এপারেদে চেয়া বাসেয়া থাইল। মানু খেয়াপিয়া জিরাসি মাপাগ থকয়া কুংগৌ নেই দ্বিয়পারেউ। পাহিয়া পলির সাড়া শব্দউ নেই। ‘লঙ্গাই’ হানে আজিকার কলির ‘অজ্জুন-সুভদ্রার’ কুমেই এহান চেইতৌ বুলিয়া ঝুম-মারিয়া বাসেয়া আসে।

গকুল এপারেদে কুপকরে চেইতে চেইতে আহিগি মামাম্ করিয়া আকখুরুম মুজুরিয়া চেইতেই অপরূপ দৃশ্য আহান দেহের। নুরা কইনার ফিজেং পিদিয়া কদমলেই কলচপল উরাদারা কেথকপা কাকেইল, থমক থমক দিয়া লেরিগত্ত লামিয়া আ-যেইরিগা।

কদমলেইর এ রূপ এহান কোনদিনো নাদেহেসে। অঙ্গরাগ আইরি পাৱা দেহিয়া হারৌহানে গকুল আহিগি বাহুৱা দিয়া চেয়া থাইল। কদমলেই কলচপ পানিহানর পটগৎ থয়া, মানুষে দেখতাই বুলিল্গ পাৱা অয়া চারিয়বাবাদে চেয়া চেয়া আঠুপানিহানাদে ত্বৰাকরে আটে আটে গাটহান লালনি অকরল। গাটহান আধাথান লালয়া আইলিহান দেহিয়া বাহাসপাত্ত নিকুলিয়া আকচঙে লেরিগর তলে লামিয়া কদমলেইরে ঙ্করিয়া নেনিরকা পানিহান লালনি অকরল। আঠুপানি উহানাৎ পানিহান খলপিখলক করিয়া জোৱাৰ-কাকরিয়া আগৰাং আগৈ ফৌৱনিরকা যে দাপহান দিয়া আইলা উহান প্রেমোন্মত্ত অরিঙ-অরিঙিযৌ লাজপেইবা। দ্বিয়গির লীলাহান দেহিয়া ‘লঙ্গাই’ হানে জিৱন নেয়য়া খলকিয়া আহে নিরিগা।

কদমলেই গকুলৰে পেইংগা বুলিয়া হৌ-পাৱেদে সালসে, গকুল কদমলেইরে নেনিরকা এপাৱেদে আহেৰ। ঘাটহানর হমবুকগৎ দ্বিয়গি তিলেতেই গকুল কদমলেইর উবেদে খকহান পাতেদিল। ফলক’ ফালদিয়া কদমলেই গকুলর খকহানাৎ কাইতেই গকুল জানপ্ৰাণ দিয়া তেইৱেল’ গাটহান লালয়া তানুৱ পাৱগৎ ফৌৱইলগা। লেরিগ কায়া বাহাসপাহানর গুৱিগৎ ফৌৱইতেই কদমলেইর পাৱ এগত্ত “হৌপাৱর মুনিযে মুনি দাপদুৱেয়া নিলাগা” বুলিয়া ফামে ফামে আগেত্ত পলেয়া আসিলা গাৱৰাপুৰেই উতা নিকুলিয়া আতৰসপা দিয়া দিয়া লৌদানি অকরলা। লৌগ হুনিয়া “দেখলাসাৎ” বুলিয়া গকুলে কদমলেইরে খকহানাত্ত লামাদিয়া চা’ৰ থাংতে দেহেৰ কদমলেইতে নাগৈ, হৰিলাল। লাজহানে পড়ে পড়ে দাপদিয়া গকুল তানুৱ গাঙেদে হমেইলগা।

* * *

লেইলেক

“বিয়ার বিয়াল্লিশ কথা” বুলিয়া পৌরি আহান আসে। উহানে মানুর বিয়ার য়ারিত হাবিগৈ হমানি নামনেইতারা। মানুর বিয়ার য়ারিত হমেয়া বিয়া আহান সামদেদিলে ও হেইমাক উহান নুঙেই অয়া থাইবাতাই সামাদেদেকুরা এগরে কচ্চিং নিংশিং অইতারা, বার হবাবালা অয়া নাথাইলেতে সামদেদেকুরা এগরে দিনে রাতিয়ে শিরাপ দিতারা। উহান হারপা হারপাউ মানু আকতা আসি যেতা মুরখুলী দিয়া মানুর বিয়ার য়ারিত যৌঅনি নুঙেই পেইতারা। আরাক আকজাত মানু আসি যেতা এবারার হৌবারার পৌ বয়া মানুর বিয়া জুড়া দিয়া আটানিহানে কামহান বুলিয়া থেঙেইতারা। উতারাংত গাড়ীর ভাড়া, দহিনা কিতা লয়া আটিয়া নাঙ কামেয়ার বুলিয়া নিঙকরতারা। কুপকরে বিসারেয়া চেইলে গাঙগরেদেই এসাদে মানু নিয়াম দেহিয়ার।

ডাঙর মাংকলহান থয়া আগেকার হাকতাকর গাঙর ইজ্জুম নৌ-বেঙর ডিগালি গরগ। মাংকলহানাত গরে হমানির থংচিলহানাত খেতকরা চৌকাঠগল রুকর দুরারহান। রং-বেরঙর উদালা বইতলর মুক্খাহানি তলেদে দিয়া পারেং আহানল গজহান মাটামান্না করিয়া মাটিহানাত গারিয়া উতার গজে খেতকরা চৌকাঠগ বহাসি উহান চেইলমাটিক অসে। থংচিলহানাত হমেইতেগা বাতেদে যাত্রাগ। বাঙ্গেদে ডালিয়াহানর ফাম আহানি কাপিয়া চারিকুনা লিকলির টুমা আহান বহাদেসি। উহানর লগে থশ্বেইর জাঙ আহান ডালিয়াহানাত নাপকরিয়া থশ্বেই আগ থসি। রাতি গরর ভিতরগৈ দুরাহানে থশ্বেই আকগল পহর করে পারানির লৌশিং আহান। মাংকলর ডালিয়াহানাং কেলেঙার দুহান আহান ডেঙ খেলার। মাংকলে খেতকরা উহকতলর খুটাগত গয়া গরর মাপুগ লালহরিয়ে মনে মনে মাতের ‘এতা কামে আটতে আটতে এমাটিক পুরানা অইলুথাং কুনদিন উসুটন নাহসু। সেলকমবাবুর পুতকর কেইস এহানাত কিতায়া লেইলেক এহান অ-পড়লুগাতা!’ গালগত আতহান দিয়া য়ারি উহান লালহরিয়ে সেংকরে নিংশিং অনি অকরল।

দৌঅর লেইকির সেলকমবাবু লেইরা অইলেরগায়ৌ নিজরতাল নিজে চটে মটে চলের। মানুরাং আত পাতানির দরকার নাপড়ের। সরার বি-দ্বিকিয়ার উতা ডঙরগৈ বাগিয়া নিলেগাউ ভিটাগর লগে আসে বি-উহানি দ্বি ফসলা অনিয়ে উহানিল কুনরকম চলে পারের।

গরগিথানী বিনোদিনীও লক্ষ্মীপালপীগ। কামে নিয়াম হেইনিং, মিকুপ আহান বয়া থাইরিগ নাগৈ। তেইর বারিহানাত বারমাহা মিয়ারর সিরন নেই। মারৈ-মাপাঙ হাবিতাউ তেইর বারিহানাত থার। বয়স অইলেরগায়ৌ রুঝা-দরাত লামিরি। লপুকর কামেঙ অকরিয়া গরর হাবি কামৌ করিরি থাং তেইরতা ‘দ’-বুলিল আগ নেই, ‘আন’-বুলিল

আগ নেই। হিনপেয়াউ নিজে হাবিতা করানি লাগের তেইরতা। বহক আগর বা-খেইতৌ বুলিয়া কাকালির খাঙচেত্ আটেয়া বরেই বিসারেয়া আক্খুলা পুতক রামবাবুর লুহং আহান করেদিল আর মুনিসৌ আগ থয়া বহকগৌ কনাক বয়সে দৌ অইলি। উবাকান্ত বিনোদিনী সেংকরে নুৰা কইনাগর সাদে গর-গিরস্থির কামে থেঙনিত পড়লি। রামবাবুও মনহান নিয়াম হিনপেয়া গিরস্থির কামেদে পেয়া মন দেনি নুৱারিয়া ঔলিজৌলি অয়া গরেন্ত না নিকুলিয়া থার। তারে আরাক লুহং আহান করেদিবাতাউ সৌ উগর বেদে চেয়া নুৱারলা। মনেইলেউ কুংগয় তারে নিঙল দিতাইতা।

সেলকমবাবুও পুড়া-কপালিয়াগ। পুতক এগ কপাল থিয়নিযে তাউ বুড়া বয়সে ফুতির দোকানে করেগা কাম উহানৌ এরাদেনি নুৱারিয়া থাইল। বরিষার দিনে পথঘাট এতারকা দোকানে আনি যানি কতিরৌ হিন। গুলাহান আইবতাই কামে যানি নুৱারিয়া থার। মা'হান পুরিয়া তাংখা কম দিলাক'পুরি টানাটানিত পড়ের। রামবাবুরে গিরস্থির কামে সেংকরে মনহান বহুৱাদেনি পারলেতে তার হিনহান খানি কমরতা। পুতকরতাউ দোষ নেই। মাতামবালা হারৌ অয়া সংসার করিয়া আইতে কইনাগ দৌ অইলি থাংতে কিসাদেউ মনহান বুঝা পারতৈতা। সেলকমবাবু বার বিনোদিনী দ্বিয়গি হিনপেইতারা থাঙৌ গরে কৌলি-জৌলি, গুজুরা-গুজুরি নাকরতারা — রামবাবুরে হুনিয়া মনে দুঃখ পেইতৈ বুলিয়া।

সেলকমবাবুর গরে লালহরিয়ে তার হবা কেইস আহান আসেহান দেখল। মাতানিতে মনার, মাতে নুৱারের — বারা বারাদে আটে আটে য়ারিহান বেলানির হিরাম চেয়া থাইল।

কিতাপারা দিন আহান পুতক গরে নেয়ইতে কামে আকয়া তেত্তগ অয়া বিনোদিনীয়ে আক্খুলিগৈ টটরেইরি, 'পুড়া-কপালিগ মি, নুৱারৌরি থাঙৌ দিন আহান বয়া জিরা নুৱারলু। মোর লেইপাকে কুরাংকার নুঙেইপা ! বহক আগ আনলেগা খানি আহান নুঙেইপার ভাত খানি পারতৌ বুল্লু আরো কইতে খা-পারলু! ভগবান এগৈ কিয়াউ মোরে নানেরগাগ থাং!"

উঠানহান ফাড়ি দিয়া যিতেগা লালহরিয়ে বিনোদিনীর কথাহানি ছনল। এসাদে তানুরাংত ছনানি মনেয়া ইচুদিন বাসেয়া আসেগ লালহরি। যারগা উগ ফেৎক আলথক অয়া আয়া সেলকমবাবুর মাংকলহানাত কইলহা। পিঠির লেইহালগর ভিতরে বিনোদিনী আসে উপেই গিয়া পিরা আহান আসুলদিয়া বহিয়া বিনোদিনীরে মাতানি অকরল, "বৌজির হিন এহান দেহে দেহে কথা আকচুটি মাতানি মনেয়া আসুতা ইচুদিন। আজি তোৱ কথাহানি হুনিয়া না মাতিয়া নুৱারলু। কে দাদাতে? দ্বিয়গির মুংহানাত মাতানিরে হবা অইতৈ।

মাত্তে মাত্তে সেলকমবাবু গরে হমেইলহা। হজক আককারি লাগেয়া চুষর জিগত টিকিগ গাতেয়া লালহরিয়ে আংকরল, “কুরাং গেসিলেগাতা হাদি এহান লালহরিতে? বিদেশ থকসিলেগাতা না কিতা? হৌদিন মালঠেপে তিলসিলা উপেইত না দেখলুতা।”

— না দাদা, কুরাঙৌ নাগেসুগা, গরে আসিলু। গারিগ নুঙেই নাপেয়া নাইলুতা।

— আজিতে কাম থায়া না কিতা?

— হাই, উঠানহান ফাড়ি দিয়া যিতেগা বৌজির নারগ ছনিয়া — বৌজিয়ে যারৌ করিয়া টটরেইরী থাংতে হারপেইং বুলিয়া হমেইলুতা। বৌজির যারি ছনিয়া, অইরি হিন এহান দেহিয়া নুঙেইহান না লাগের। এবাকা তেই বয়া খেইব সময়হান। উহানে দাদারেউ মাতুরিতা — বহক আগ বিসারেয়া আনেদিংগা খানি জিরেই। কইদিন আর এসাদে চলতাইতা।

— বার উতা যারি অকরলেতা!

সেলকমবাবু লালহরির যারিহান ছনানি নামনেয়া আরাক যারি আহান অকরতেই উহানরে জাতেয়া লালহরিয়ে মাতল, “আজি ছনানি নামনেইলেউ ছনানি লাগতে। আরাক আকদিন মাততৌগ নাগৈ। লয়া এগর মানু মোরে বা-খেইতারো হানতে জেঠাবেয়কগর কামহানতে কিয়াকা করেদেনি নুরারতৌতা। এবসর চারি পাচহান ফাম জুড়া দিয়াদিলু। হাবিয়ৌ হবা অয়া আসি। কেছুরগাঙর ললিতর জিলক কলাসরে দেসি উগ গিয়া চেইগা — রাণীগ অয়া আসেগা। উহানৌ মি সামকরেদিলুহান। হৌপারর মহেন্দ্রর বহক, টুকর বংক মাষ্টরর বহক কুংগৈ টটরেয়া আনেসিগাতা হারপাসগ? হাবি মি টটরেয়া আনেদেসুগাতা। বুড়া-আকাদা অয়া তার সাকতা উহানল তাম্ফাসেনাই কুনদিন জেলেই পেইতে বুলিয়া নিংকরেসিলাইতা? উগৌতে মোর পরাদে হারৌ পিয়ম অয়া গর-সংসার করের। আর লেহেয়া কিতা করতু — অটা অটা অসি। বৌজি এগ হিনপেইরিহান দেহিয়া মাতুরিতা, হুদা যাথাংহান দেই — হনুমান অলয়া সালৈং রামবাবুরকা লক্ষ্মী টুমা পারা সৌ আগ বিসারেয়া আনেদিংগা।

বিনোদিনী লালহরির যারিহান ঠিক পেইল। কিন্তুমান গরর বুজনগৈ কিন্তাউ না টটরারহান দেহিয়া কথাহানাত হমেয়া মাতিরি, “য়ারিহানতে হাইহান। মিতে মনাউরিগ, তাহে কিন্তাউ নামাতের থাংতে। আর কইদিনৌ বা জিংতা অয়া থাইতাঙাইথাং! আমি থাইতে রামবাবুরে গর-গিরস্থিত সেংকরে মনহান লাগাদে পারলেতে রাই সাঙয়ারতা। মিও এবাকাতে চাকামহান সমালানি হিনপাউরি।

বিনোদিনীরে আত-করেবেললহান দেহিয়া লালহরিয়ে সেলকমবাবুরে মাতল, “দাদাই মাতবেনাই খানি। বৌজির মতহানতে ছনলু। কিয়া অমাটিক খালকরতা। রামবাবু

এগ এসাদে অয়া থাক এহান মনারথাং?

সেলকমবাবু লালহরির কথাহান হুনিয়াউ নাহনিল সটহান দিয়া থাইল। আহিথম জিপেয়া গরে দুহেসে হজকর ছরাতহান উপভোগ করানিৎ গৈগ অসে। ধূমাগল গঙালেয়া হজকারিল মন্ত অসে। হজকারি ডহে যারগা। লালহরি নুঙেই নানির অংতাহান দেখেয়েয়া মাতানি অকরল, তুমি নুঙেই অয়া হবা অয়া থাই বুলিয়া মাতুরিতা। তুমি নিজে বিসারেয়া আনগা — মোরে নাউ মাতিয়। তুমি বহকগ আনিয়া নুঙেই অয়া থাইলে মোরে নিংশিং অইতারাইথাং? তুমিহে নুঙেই অয়া থাইবাইতা বুলিয়া বার রামবাবুও সেংকরে সংসারহান পাতিয়া নুঙেই অয়া থাক বুলিয়া মাতুরিতা। মোরে যেকনাপাগ না নিংকরিয়! তোমার পুতকগরাং খুটা আহান আসে উহানৌ না পাহরিয়। মনেইলেই তারকা কইনা আগ আনেদেনা পারতারাইহান নাগৈ। এগরকা কইনা আনতেগা আমার সাদে মানু লাগতৈহান হারপেয়া থই। সমাজহানাত এতাকিতারকা হাবিয়ে মোরে চিনেসি তা থকয়া মোরাং এহানর ভারহান দিলে হবা অইবতা বুলিয়া মাতুরিতা।

এখুরুমতে সেলকমবাবুরে না টটরেয়া নুরারল। উপারিগ আরিগন্ত লামেয়া ডহাগ উদালহানাত বেলেয়া লালহরিরে মাতের, “তোর বৌজি হিনপেইরি এহান মি হারপাউরি, রামবাবুরে গিরস্থির কাম সিলকরলে মিও নুঙেই অইতৌ উহানৌ হাইহান। রামবাবু নাকরের থাংতে আমি মনেয়াউ তার বারাদে চেয়া ইম্পানি অসিতা। জিগনেই পানিগনেই আগুলি থা পড়িলগা থাংতে উগরকাউ খালকরুরিতা। সমাজ এহানতে বিসারা-বিসিরি নিয়ামহান তিও হারপাসত। উতাউ রামবাবুরে মনেইলেতে খালকরিয়া চেইলুইসতা।

— রামবাবুরে যাকরুরানির ভারহান দাদাই মোরাং এরাদে। বার সমাজহান বিসারা-বিসিরি নিয়াম অনির সালেহে লালহরির দরকার পড়েরতানাই। বিসারা-বিসিরির হাদিয়েদে লেইফেৎ দিয়া লিতয়া লালনি পারৌরি বুলিয়াহে ইমাই মোর নাঙহান লালহরি বুলিয়া থদেসেতা।

মাতিলতা মাতিয়া “দরকার পড়লে মোরে নিংশিং অয়” বুলিয়া লালহরি তার কামে গেলগা।

লালহরি বিয়ার যারি জুড়াদের হাইহান, কিন্তুমান তার কেইস খানি তঙাল। খেইনাপি, খানি কমবয়সী যারিজেলৈই, যারা মুনি, বয়স অয়া বিয়া নায়া থাইতারা জেলৈই মুনি — এতা কিতা। আংকরাত নাইতারা বয়স লালয়া গেসিগা পুরিজেলৈই লালহরিরে দেখলে পলেয়া থায়া ফাগি দিয়া লাংকরিয়া মাত্তারা “খুড়া, আমার ফাইলগি খানি মিল্লেং আহান দিয়াদিস্লে!”

এগদে বিনোদিনী লালহরিয়ে দিয়া গেলগা যারি হুনিয়া মনহান গলিয়া হেয়কর

যাথাংহান পানির সালেদে দিনে রাতিয়ে তাক্করানি অকরল। জারে নুৱারিয়া আকদিন সেলকমবাবু তেইরে সরয়া মাতের “তোমার বেয়াপা এতার ঔনহান — য়ারি আহান হনলে উহানল থাইতারাইতা! তি নাহ্নেসত থাং লালহরির কীৰ্তি। য়ারিজেলেইরে পুরিজেলেই মালকরিয়া হাজেয়া এগৈ বিয়া দিয়া পারেসেগ। হেই আসি জেলেইরে দুহান তিনহান ফাম লালকরেদে পাবেসেগ এ গিরক এগ। না হ্নেসতথাং — বুরুঙ্গান্ত য়ারি জেলা আগ আনিয়া পাথারিগাঙে কি লৈলাট আহান করেসিলতা। উবাকান্ত এবাকাউ এগরে পাথারিগাঙে হমানি নাত্তারা। মানু এগ ডরপেইল মাটিকগ। আজিও কলাসর কমলপুর, কালিও কাছাড় ঝাপিরবন্দ বারমুনি। তা নাচিনব ফাম নেই, তারেউ না চিনবা মানু নেই। বিয়া সামকরে সামকরে আটানি এহানেই তার রোজি-রোজগারহান। মানু মুরর ঘাম জাঙে বেলেয়াউ পেট বুজে খানারতা নাপেইতে তা বয়া বয়া বুলে বুলে নবাবগ অয়া চলেরহান নাদেহুরিতা! হবাগ অলয়া বহক আগ আনেদিয়া ধনপয়সাগ মাছি দাবি করিয়া বইতে উবাকা কুরাংত দিতেইতা। উতাকিতাই এগরে আমার গরভিতরর য়ারিত য়ৌকরানি নামনেয়া অসুতা। তোর হিনহান মিতে নাদেহুরিথাং? মনে মনে যুগত আহান লাগানির হন্না করুরি। দিন উহান না সুরইলে কিঙাউ নার। খানি সবুর কর।”

এসাদে মাতিয়া বিনোদিনীর মনহান খানি তাপথা করেস সেলকমবাবু।

কতদিন পিসেদে রামবাবুর আটাফিরাত, কথাবার্তাত তঙালপা ভাব আহান দেহা দিল উহান মালক বাপকে দইরাপ করলা। রামবাবু বারি-গরর কামে মেইকখুগ অইল। মালক বাপকরেউ আগেত্ত নিয়াম তালাবি করানি অকরল। গরেত্তউ না নিকুলিয়া থাইল এগ গাঙ গরেদে মেরাক-মেরাকে বুলানি অকরল। গারেদে লেমপালহানি হাপদিয়া বপকরে পাউডার গসিয়া, বিয়ার সেনাপুলগ অলয়া, সেন্দার ইরবির উগত এন্ডিবাদগত বৌ খেয়া খেয়া বুলা আকেইহান নিক্কা দেনি অকরল। গাঙর মানুও হারপেইলা রামবাবুরাং নুৱাকরে বসন্তর বৌ আহান বারি দেসে। সেলকমবাবু বার বিনোদিনীয়ে পুতকর অংতা এহান দেহিয়া হারৌ অইলা। খালকরানি অকরলা — এবাকাতে আরাক লুহং আহানর য়ারি অকরানি য়াকরল। খরচর বারা উহান খালকরিয়া খানিয়ৌ ডরপেইতারা। পইলাকার বিয়াহান নাগৈ থাংতে মাইক রহেয়া, নাগারাসি বাজেয়া বিয়াত সালনিয়ৌ লাজপেইতারা। এতাহাবি খালকরিয়া নামনেয়াউ অক লালহরিরে ডাহানিত লেপইলা।

দিন আহান লালহরিরে ডাহিয়া সেলকমবাবুরে মাতল, “লালহরি, তিতে মোর খুলাবেয়কগ পারাগ, তরাং কিতাতে লুকেইতু। তোর বৌজিয়ে মনাবেলল থাংতে রামবাবুর য়ারি উহানরকা তরে ডাকলাংতা। খানি কনাক বার হবাউ অইব নিঙলসৌ আগ, থাইল সৌ এগরেউ জরম পুতকগর সাদে নিংকরিয়া চলানি পারব আগ আমারতা লাগের। বার আরাক য়ারি আহান — আমি মানুরে দেহুরেয়া বিয়া করিয়া আনানি নামনেয়ার। কইনাগ

গরে আনিয়া ‘বিধানহানি সুকরিয়া’ বরেইতাঙাই। পিসেদে হবা দিন আহান চেয়া গাঙ-
লেইকির বুজন দুগ আগ, শাকেই কুটুম ডাহিয়া আতর ভাত ল’বেলতাঙাই। উদিন ঙেই-
সাকেইরৌ ডাকতাঙাই। উতা কিতা লমকরিয়া তোর দহিনাহান।

‘মোরতাতে বার কিতার দহিনা! হাইদে, জুনাকহান পালৈলে নিকুলতৌ। না
খালকরিয়’” বুলিয়া এ কেইস এহানাত আতহান দিল লালহরিয়ে।

জুনাকহান পালৈল। লালহরি পইলাই সালৈল কলাসরে। গাড়ীত চড়িয়া যিতেগা
লুয়ারপুরা লালয়া আরাক গাড়ী আহানর তুল থেংনা দিয়া তা চড়েসে গাড়ী উহান পথগর
বারাদে আক্কাদা অয়া নক্হানিয়েদে জিংতা অয়া আলয়া আহিল। রাতি উহান লালহরি
নিয়াম খালকরল, “কেইস এহান অকরতেই হবানেই লক্ষণ আহান দেহা দিল। নামনেয়া
থেঙইলা উহানে পাউরি। মোর নাঙৌ লালহরি। লালয়া হদেয়া এরতৌগ।”

কতদিন পিসেদে সেংকরে সালৈল। এখুরমতে হিংগালাদে। গড়েরবন্দ, কুকিটিলা,
দলিবিলা, আমরখাল, আরালআলা, মুল্লিয়ালা, বেতুবাড়ী, বিদ্যানগর, পাঁচডালি, রূপা,
চান্দরগাঙ, খিলুবা, কেছুরগাঙ, গেরগাউ, বনরগাঙ, বাশকানটিলা, হাবি উকেই দিতে
দিতে থেপাত থেতয়া চামটিলাত ফরইলগা। উপেয়ৌ কুন হদিস নাপেইল। কাফামহান
বেরা লাগিলহান দেহিয়া খানি খালকরিয়া জীবনেউ না হমাসেগা ফেতিপাতে যানিত
লেপইল।

চামটিলার পিঠিত হিংগালাহান লালয়াই ফেতিপাত। গাঙহানাত হমেয়াউ
লালহরিয়ে দেহের খানি নেমতিরিক টিলাসৌ আগর গজে তিন-চারি গরর লেইকি আহান।
গর আগর উঠান আহানাত মৌনাহা আগৈ লেইরাং আহানাত গুরুরকা কুড়া রাধিরি।
হুকুনা ডুংগাল জ্বিগ অকরেসে। কাদাত চেপয়া আংকরলগা, “ইমাউগ, লেহাউবার গরগতে
কুংগ?”

অচিনা বুজন মানু আগর থতাত বাপকর নাঙহান হনিয়া মৌনাহা উগৈ “কুটুমগ
অ-থাইব” নিংকরিয়া জ্বিগ খানি ঠেলাদিয়া উরাদার আয়া লালহরিরে গুরুরলহা।

— “খুড়া এগ নাই আমার গরগ। মি লেহাউবার জিলক।”

লালহরিয়ে দেহের মৌনাহাগ, এগদে মাতিরিতাই জিলক — য়ারিহানাত লিম্
আগ পেইল লালহরিয়ে। মেইথঙেঙ অকরে জাঙ তালকরে চেয়া চেয়া তার অংকহান
করে করে বার আংকরল, “ইমাউগর নাঙহানতে কিহান?”

— মালতি

নাঙহান মাতিয়াই গরে হমেয়া মালকরে মাতিরিগা, “বাবারে বিসারেয়া মানু
আগ আহেসে। মোরে কুপকরে চার অংতা উহানে লাজপাউরি। যাগা কুড়াহানি হিজিল

পাউরি লামাদেগা।”

লালহরিরে কুরাংকারগ কিতা আংকরিয়া মাংকলহানাত বছবেইলা। খানি থায়া লেহাউবা আহিল। লালহরি গেসেগা কাম এহান য়ারি দেনিয়ে লেহাউবার দ্বিয়হেইমাকে তারে রাতিহান ঠেকানিরকা মাতলা। মালতির আফরকে রাতি হাবি য়ারি দিলা। লালহরিয়ে হারপেইল মালতি খেইনাপিগ। বয়সৌ নিয়াম নাসে। রাতিফুলে মালতিরাং য়ারিহান ফংকরলা — তেইরে বুঝেয়া য়াকরুবেয়া পুরিজ়েলাগর সাদে হাজ়েইলা।

হাপ্তা আহান কিতা ফেতিপাতে ছ্বাত ছ্বাতক’ খেয়া পিয়া থায়া হবা খেলতাম আহানাত লালহরি মালতিরেল গরেদে আলইল। সেন্দাহান অইতেই মুঙর সরাহান লালয়া মালতিরেল লালহরি সেলকমবাবুর গরে ফরইলহা। বিনোদিনীয়ে ধূপ-থম্বেইল বহকগ ঙ্করল। গাঙর মানু সুপৌ হার নাপেইলা।

বিনোদিনীয়ে গর দুয়ার ঙক্ষী-ঙরাল করিয়া থসে। সেলকমবাবু ফিরফিরা ফেইচম আহান পিদিয়া, নুৰা গেঞ্জি আহান উরিয়া হজক আক্কারি পিয়া বহেসে। রামবাবু হিনেয়া পুরপুরেয়া পাউডার গসিয়া হারৌ হারৌ অয়া মাংকলেদে উঠানেদে আটেরগা। ছপে ছপে খাটালগ হাজ়েয়াউ থসে। সৌগরে মামাকলকেইর গরে কতদিনরকা থদেসিগা। বিয়া নয়াউ বিয়ার গরগ মালকরেসি। রামবাবুয়ে বিয়ালি বাজারেস্ত মাছ আনেসেগা উতাল বিনোদিনীয়ে মেঠেল মেঠেল রাখল। লালহরিরতাউ এপেই ভাত বরাসি।

ভাত-পানি খেয়া হজকারি ধূমা নিকালা নিকালা সেলকমবাবুরে আনেসি কইনাসৌগরে আংকরানি অকরল, ‘তোর নাঙতে কিনাঙ?’

— মালতি

— গরতে কুরাং ?

— হিংগালাত।

— হিংগালাত্বে কুংগাঙে ?

— ফেতিপাতে।

— ফেতিপাতেতে আমারতাউ সাকেই আসিগ’না লেহাউবারেতে চিনেসত ?

— মোর বাবানাই লেহাউবাতে।

ছনিয়াউ সেলকমবাবুরতা মুরগত বজ্জগ পরিল পারা। আরিগ থয়া বিনোদিনীয়ে চেয়া মাতল, “ছনরাইগ, এগৈ কিতা বুলিরিতাতে ? মাস্তে মাস্তে সবয়া জ্বিগ অইল লালহরির গজে।

লালহরিও তানুর লগে ভাত-পানি খেয়া সেলপাকহানান্ত গুরাচাবা তাপকরের

উবাকা সেলকমবাবুর পেইরাক করে সরয়া জ্বিগ অইলহান দেহের। হারপা নুরারল কিহান অসেহান। তানুর উপকার আহান করেসে তা থকয়া আজি বুকগ ফুলেয়া বয়া ডাঙর ডাঙর যারি দিতৌ বুলতে বুজন এগ সরয়া করের অংতা এহান দেহিয়া লালহরি বিভুলা সাবুলা অয়া চেইতে দেহের — সেলকমবাবু দাত কামারেয়া তারে মাতিয়া আনের, “লালহরি, এহানতে কিহান বুলিয়া করলেতা? জেলেইব ফেইকারী অইলেতে লকেই গোত্র চিন নেয়ইতারাতা? আমি কি গোত্র, কি লগেই হাবি তি হবাকরে হারপাসতগৈ কিহান বুলিয়া করলেতা? মানুষে হার নাপাকা। বিয়ানহান ফুরেইলেই ত্বরাকরে মালতিরে নিয়া থিলকরে দিয়া আহিসগা।

মইলকর বারাদে বুলন দিয়া সেলকমবাবুরে পাকদিয়া চেয়া মাতল, “লালহরির সাদে মানুর কাদাং না চেপইং বুলতে জেলা এগর মেইথি এহানে আকয়া আজি এহান অরতা।”

* * *

ছাণ্ডিচর

সময় পেইলেই ফাগিফারাং করিয়া, নানান রসর য়ারি দিয়া, আহেয়া সময় কাটানি এহান মানুর প্রবৃত্তি আহান। স্বাস্থ্যবিদর মতে দিল খুলিয়া আহানি পারলে গারিৎ উপকার অর। উহানে এসাদে ফাগির য়ারিৎ ভাবর গভীরতা নেয়ইতে পারে কিন্তুমান মনর অরাহিন কঙ্করানিৎ এতার জুড়ি নেই। নিয়াম রস করিয়া য়ারি দেকুরা মানু আমার সমাজে কম নেই। আজিকালি নানান চাপে পড়িয়া সময় নাপেইতারা উহানে এতা খানি কমইল। হকতাক আহানাৎ এতা রসালাপ নিয়াম অসিল। কুঞ্জবেহারী জেঠাবা, সেনাচাউবা বিনি, ঠাকুরচান খুড়া সেন্দাহান ললৈবতাই আইতাইতা য়ারি দেনিত। আমি সেন্দাহান অইলেই লেরিকহানি পাকরিয়া লমকরিয়া, তানুর হজক টিকি লাগাদিয়া য়ারি হুনানিৎ বহিলাং। ফাগির য়ারি দিবাতাই চিরাফারিয়া আহেইলাং বার ভূত-প্রেতর য়ারি দিবাতাই ডরপেয়া তানুর কাদাৎ চেপইলাং। তানু নিজে বানেয়া ঔ য়ারি উতা দিলা। তানুরে আমার বুড়ীমা গাছিয়ে য়ারি এল্‌পা বুলিয়াউ মাত্‌লা। মি এবাকা নিংশিং অইলেই নুংপাং অয়া খালকরুরি ঔ হকতাকর বুজন উতা কতিরৌ সৃজনশীল অসিলাতা। তানু দিলা য়ারি উতা ইকরিয়া থইলাইসতে আমি আজি তানুরাংত ডাঙর সাহিত্য আহান পেইলাঙইস।

কনাকে তানুরাংত আপাঙর য়ারি, দৌ-অর য়ারি হুনেসিলু। আপাঙর য়ারি আহান নিংশিং অউরি — আকদিন চর আকতাই চরে যিতেগা আপাঙ আগরে নেনি মনেয়া মাতলা থাংতে আপাঙ উগৈ মালকর য়াথাং লয়া রাতি চরে গেলাগা। চর উতার লগে ঔদিন ধানর লপুকে চরে গেসিলাগা। কাচিল ধান কাপিয়া আনিয়া গর ফরনির আগে আকপেই বহিয়া উতা বাট্‌লা। ধানর চেই উতা কাপিয়া চর উতাই নিলাগা, গুরি উতা মাহি আপাঙরে দিয়া দিলা। আপাঙৌ হারৌ হারৌ অয়া গরে আলয়া মালকরে ঘুমেঙ উঠেয়ারগাই চরকরিয়া আনেসে বার উতা দেখেইল। মালকে উতা দেহিয়াই সবয়া জ্বি-গ অইলি — “আপাঙত আপাঙ, আনলে এতাতে কিতা কামে লাগতৈথাং, আগা উতা আনে নুঝারলেথাং ? বেলাদেগা।” মালকর কথাহানি হুনিয়া আপাঙ লাজপেইল। আরাক দিন আহানরকা বাসেয়া থইল।

কতদিন পিসেদে চর উতাই বার আপাঙরে চরে যানিরকা মাত্‌লা। এদিনতে আপাঙ মালকরেউ না আংকরিয়া গেলগা। মনে মনে আগেকার দিনর লাজপাসিল উহান কক্করতৈগ বুলিয়া নিংকরল। চর উতাই তারে আংকরলা — “আপাঙতে আজিতে কিতা নিতেইগা।” কিন্তুউ জুরাপ নাদিয়া আপাঙ হুদা মুক্‌সি আহান দিয়া হাবিরে চেইল। ঔদিন চরকরিয়া আয়া বার উতা বাট্‌তে আপাঙ মাতাবলা নেই আগা উতা বাসিয়া বাসিয়া

কাপিয়া নিলগা। গরে ফরয়াই মালকরে ঘুমেত্ত উঠেইল। মালক আপাঙে আনেসে বার উতা দেহানিয়েতে ফাৎনেই আপাঙরে গুজুরানি অকরল। আপাঙে মাতের, “হৌদিন আগা আনিস বুললে থাংতে আজি আগা আনলু আর বারতে কিয়া গুজুরি।” আপাঙ আজিও মালকরে হারৌ করানি নুরারল কারণ এহান খালকরিয়া নাপেইল। অসিলহানতে “কিহান বুল্লেতে — এদিন তানু মৌ চরকরিয়া আনেসিলা।

৫. আরাক য়ারি আহান এসাদে — কিতাপারা দিন আহান চর আগ দলানর গর আগত চরকরানি মনেয়া সেন্দান্ত হমেয়া কাঙারতলে পলেয়া থাইলগা। গরর মানু খেয়াপিয়া ঘুমজিলেগা চরকরিয়া দুরারহান আংকরিয়া যিতৈগা বুলিয়া বাসেয়া থাইল। গর উগর মানু উতা খেয়াপিয়া য়ারিপরি দিয়া ঘুমজিতেগা নিয়াম ডিল পরলাগা। বাসেইতে বাসেইতে চর উগ নিজেহে কাঙার তলহানাং ঘুমজে পরেসেগা। রাতি মেরাকে চর উগর বিবিয়ানিহান হুনিয়া গরর মানু হজাক অয়া তারে ধরে বেলেয়া আনাংশা দেসিলা।

য়্যারি এতা যতৌ নুঙেই অক বাস্তব সম্মত নাইলেই কুন আকপেই অভাব আহান আসে বুলিয়া মনে অর, অপূরণ আহান থা য়ারগা পারা।

আকদিন অফিসেত্ত আয়া খানি জিরেইং বুলিয়া জাঙ-মেইথঙ কিতা ধয়া বহেসু মাপাউগৎ কনাক কালর মারুপগ সমর আহিল। কামর চাপে মুরগ খানি ভরি ভরি অসে বুললু থাংতে তা মাতল, “খানি আহেইলে মুরগ পাতল অইতৈ। খানি আহেইক মোর য়ারি আহান হুন” বুলিয়া য়ারি আহান অকরল —

১৯৭৩ ইংরাজীর য়ারিহান। পাথারকান্দি লয়াত মেট্রিক পরীক্ষার সেন্টার নেয়সিল থাংতে আমি উবাকা করিমগঞ্জে গিয়া বাসা ভাড়া করিয়া নাইলে চিনা জানা আত্মীয়র বাসাত থায়া পরীক্ষা দিলাংগা। মি ও বসর মেট্রিক পরীক্ষা দেনিরকা ব্রজেন্দ্র রোডে আমার গাঙর তপনদার বাসাত আসিলুগা।

বন্ধুর দিন আহান তপনদাই মোরে দোকানেত্ত বারপজা খানি লয়া আনানিরকা দিয়া পেঠেইল। বরন দের থাংতে তপনদার ছাতিগল গেলুগা। ব্রজেন্দ্র রোডেত্ত নিকুলিয়া রমনী রোড অয়া লক্ষ্মীবাজার রোডর আতর কথনি সাক্‌পা ঠেক উগৎ নিকুলিয়া, টাউনর ভিতরেদে বুলন দিয়া আইলে আতর পামপলগ পারা উগদে আয়া মেইন রোডউগৎ কায়াউ মুঙে গভর্নমেন্ট স্কুলগ। গভর্নমেন্ট স্কুলর আঙর থংচিলহানর উল্টদে পি. ডবলিউ. ডি. অফিসগর কাদাং ভূষিমালর দোকান আগ আসিল — নাঙহান “দেব ষ্টোরস”। ও দোকান উগৎ বারপজা লনিং গেলুগা। বরনর দিনহান থকয়া আরাক কতগ মানু দোকানে আহেদিগা। নিজর নিজর ছাতি আনেসি উতা জিপেয়া থয়া দোকানগৎ বহেসিলা। মিও

মোর নেসুগা ছাতিগ জিপেয়া দুরাহানর কাদাং থয়া বারপজা লনিং থেঙসু। বরনহান এরানিয়ে বহেসিলা মানু উতা হাবি নিকুলিয়া গেলাগা। বারপজা কিতা লয়া আলয়া আহিং বুলিয়া চেইতে দেহুরি ছাতিগ নেই। চিন্তাত পড়লু। মানুর ছাতিগ আনেসুগ মাংকরিয়া কি মেইথংহানল তুমিল অয়া আলয়া যিতৌগা, গিয়াউ বা তপনদারাং কিহান হুমকরতৌগা। এমনৌ তপনদা' ডাট-মানুগ — নিয়াম ডরপেইলাং কনাকে। খালকরতে খালকরতে ফর ফর অল যাউরিগা। ছাতি মাঙনি গম্নেই বুলতারা থাংতে উহানৌ ডর আহান। দোকানগরমা বেঞ্চ আহান থসি উহানাং বহিয়া দোকানগদে আকখুরুম চারিয়বারাদে আকখুরুম চেয়া চেয়া খালকরানিং থেঙসু উবাকা পেইরাংক্ক দেখলু দোকানগর মুঙর মাংকলশৌহানর হৌ মুড়ে ডালিয়াহানর চিপাগং ছাতি আগ আসে। ছাতিগৌ চেইতে হবা অসে, নুরাগ পাউরি। মনে মনে লেপকরলু ছাতিগ নানিয়াতে আলনি নাইতৈ। তপনদাই নিজে রাধিয়া খরেয়া আমারে তালাবি করিয়া পরীক্ষাহান হবাকরে দেনি পাংকরের মানু এগরে কৃতজ্ঞতা দেহুরানিতে থাক্ উল্ট ত অফিসে নেরগা ছাতিগ মাংকরেদিলেতে তারাং কিসাদে মেইথংহান দেহুরেইতৌগাতা। খালকরতে খালকরতে ছাতি উগ চরকরানিত লেপইলু। দোকানগরমা উবাকা গ্রাহক আক্গৌ নেই, হুদা গিরিগ বার তার পুতক। দ্বিয়গিয়ে বহিয়া হিসাব মিলেইতারা। মি খালকরলু ছাতি এগ তানুরগহে অইতৈ। মানুতে উবাকা মি বার তানু দ্বিয়গি। মোর ছাতিগতে থসিলু ফামউহানাং নেই। য়েপেই ছাতি এগ দেহুরি উপেইত মি না থসু। হারপেইলু ছাতি এগ শ্বে-নায়া তানুরগ অইল। য়েগরগ অয়াউ থাক — ছাতি উগ চরকরানিত লেপইলু।

জীবনে চরকরানির অভিজ্ঞতা নেই। গাঙে বারি-গরেদে হুঙা, পঙিতল, হেইনৌ, জাম বড়েই, জলফল চরকরিয়া খেইলাং উহান চরকানির আরাক জাত আহান। আজিকার করানিরকা যাউরিগা এহানতে ডাঙর চর আহান, সামাজিক বার নৈতিক অপরাধ আহান য়েহান জীবনেউ কল্পনা নাকরেসু। ধরা পড়লে কিহান অইতৌ উহানৌ হারপাউরি, হারপেয়া হিরিগাম শৌকরের। গারিগর রকত কেঙইল, সিঙলেয়েদে সিংনা দিয়া ধাবদানি অকরল। আহিগি তপ্তা অযারগা, মুরগ টালিগ পারা অইল হারপাউরি। ধরা পড়লে অইতৌ অংতা উহান খালকরিয়া ডরৌ পাউরি। “না চরকরলে না'র থাং?” মোরে মি আংকরুরি। তপনদার মেইথংহান নিংশিং অইমতাই মনহান দরা অর। আকখুরুম ছাতি উগ চাউরি, দোকানদারি উতারে চাউরি, আকখুরুম তপনদার মেইথংহান নিংশিং অউরি। এসাদে করতে করতে মোরতা গারিগ বেরা লাগিয়া আহের পারা। ডিলকরানি চুম নাইব। এগদে দোকানদারি উতা তানুর কামে মুর নঙেয়া মেইক্ষুগ অসি হের উগং মনে মনে “থ্বি, টু, ওয়ান, জিরো” লেহেয়াউ ফল্ক ফালদিয়া উঠলু। উঠিয়াই আবেরা সটহান দিয়া সুরু-

বুরু ডালিয়াহানর কোণগন্ত ছাতি উগ আসুলদিয়া আটানি অকরলু। অফিস ডিলৈলগ কিগ পারা অয়া — উরাদারা আটানি অকরলু। “ইলেভেন আপ-এক্সপ্রেসহান” আটানি নাগৈ, ধাবদানি মেরাক, পারলেতে দ্বি-কাকেয়ে গিয়া ব্রজেন্দ্র রোড ফৌবনি উসাদে। মনহানাত ডর আহান — “আয়া পেইতাইহা পাউরি।” নাগৈ কামহান করানিয়ে মনহানাত ডর আহান থাইল। পিঠি বুলনদিয়াউ চানি নুরারৌরি সাক্কাগ মালয়া যাউরিগা। খালকরৌরি খকচাহানাং আহিআগ থাইলইস্তে পিঠিয়েদে কুংগ ধরানিত আইতারা দেহানি পারলুইস। যেতাউ অক্, দ্বিবারা দিশাং নাচেয়া ইজ্জু নাকগর দিশাল লক্ষীবাজার রোডর পামপলগ বেয়া কছনি সাকপা ঠেক উহানাত রমনী রোডেদে বুলনদিয়াই ব্রজেন্দ্র রোডে ফরইলুগা। পিঠিয়েদে চেয়া কুনগরে না দেখলু।

মোরতা ঘামে গেঞ্জিহান চিচ্চুপাগ অয়া গজে উরেসু আঙিহানৌ তিঙেসে। তিঙিয়াউ থাক্। মনে মনে হারৌ আহানৌ অইলু — নাগৈ কামহানৌ করলু, ধরাও নাপড়লু। লালফাম আহান জিঙিয়া আহেসুগ পারা অয়া বুক এগ ফুলিল পারা। কি অধম কামহান করিয়া আহেসু উহানতে মিয়ৌ হারপাউরি, কিন্তুমান ধরা যে নাপড়লু উহানেই জিঙানিহান সাকর। জীবনে পইলাকার ডাঙর চরহান সফল অইলু — পাপ ধর্ম যেতাউ অক্। মিনেসুগা ছাতিগতে কিয়াকা চরকরলা ? উহান খালকরলে মোরতা কুন পাপ নেই।

মনে মনে এতা গবেষণাত থেঙসু উবাকা তপনদা আয়া মোর অংতাহান দেহিয়া মাতের, “হা বরনর দিনেতে কিতার ঘাম এ ? তিঙলে থাং ?”

কুন উত্তর নাতলু। তপনদার মেইথংহান আহির পট্ না মারিয়া চেয়া থাইলু।

কুন জুরাপ নাপেয়া তপনদাই বার মোরে আংকরের, “কিয়াকা না টটরারতাতে, কিয়াকা ডিলৈলেগাতা ?”

তপনদাই কিতা মাতের চেইং বুলিয়া মাতলু, “তোর ছাতিগ নেসিলুগা উগ দোকানগত থয়া বারপজা লয়া লমকরিয়া চেইতে দেখরি চরকরিয়া নেসিগা — উহানে খালকরিয়া ডিলৈলুতা।”

তপনদাই পাক্দিয়া মাতল “আকগ ছাতিগ আসেগ মাংকরিয়া আইলেতা, অমাটিক অক্নায়াতে কিসাদে।”

খানিও লাজপেয়া খানিও ডরপেয়া মাতলু, “যেহান অনারতাতে অয়া গেলগা, কাম না আটকিবাংতা বুলিয়া আরাক আগ কাদাং পেইলু উগ তুলিয়া আনলু, নুরাগ পারা অসে চা।”

“চেইং চেইং” বুলিয়া আনেসু ছাতি উগ ধরিয়াই তার তিনগ নার তিলকরিয়া
দের ধমক উতা আহান দিয়া মাতল, “হি-দা, বুরবক্গ, এগনাই মোর ছাতিগ।” নিজে
আতার ছাতিগ ধরিয়াই চিনে বেলে।

নামনেয়াউ অক, পরিস্থিতির চাপেউ অক্ করলু চর উহান গুরানিরকা গাটামি
আহানল থাইলেউ, করেসু অন্যায় উহানর পাপ আহানে মোর মনহান ভরি করিয়া থসিল।
তপনদার ধমক উহানে ও মনহানর ভরি উহান পাতল করেদিল। মি ঝাই সাঙইলু।

য়ারিহান লমকরিয়া সমরে আহানির লেইসিগ বারেইল, থাংনাং মিয়ৌ যৌরইলু।

~ * ~ * *

আত্মার সদগতি

আশিন মাহার দুর্গাপূজার দশমীর দিন উহান বেলি হমেইতেগা দুর্গা ইমার বিসর্জনা বার মট আনতারা প্রশেসন দেহানি মনেয়া গন্ধরাজর সৌর মালক গন্ধরাজরে গর রাহানিত থয়া সৌগিরেল বরাকহানর পারে গেলীগা। গর ফুকয়া বিসর্জনা চানিত যিতেগা কিতাপারা আত ডিগল গিরিগিথানী উতা ফৌর পরলেহা এতদিন হিনপেয়া-দুখপেয়া খেয়া-নাহেয়া হংকরেসি জমহান, বারি-গর সিতারাদে বেলতাই উহান খালকরিয়া গন্ধরাজ গরগ রাহানিত পড়িল।

গন্ধরাজ মাংকলে চিয়ার আহানাত বহিয়া পথেদে চেয়া চেয়া থাইল। দশমীর মানু আনি-যানির অম্ অম্ রৌ আহানে বেরয়া আসে। সেন্দাহান অয়া আহের মাহি দুরেইত্ত প্রশেসনে রহেইতারা মাইকর এলা কানহানাত আয়া হমারহা। প্রশেসনহান নিজর আহিল নাদেখলেগাউ এতা কিতা হুনিয়া মনহান চাম্ করানি মনেয়া মনহান দিয়া হুনানি অকরল। এলাতে হুনে পারলেহে নাই — হুদা রৌ। সুরগল এলাহান হারপানি। খানি মনহান দিয়া হুনানি তালকরতে কানহানাং এলা আহান বারি দিলহা —

“বন্ধু যখন প্রেমিক লয়া,
আমার বাড়ীর সামনে দিয়া,

.....
ফাইট্যা যায়, বুকটা ফাইট্যা যায়।

হুনিয়া খালকরের — ‘হা এহানতে কিহান! ইমারে বিসর্জনা দেনিত যিতেগা ভক্তিমূলক এলাতে কাদা আগদে থয়া প্রেমে বুক ফাটের বুলিয়া রোমান্টিক এলা দিতারা। মনুষ্য এতা কিতা অপরলাগাতা? ইমারে বিসর্জন দিতেগা ইমার বিরহে বুক ফাটের বুলিয়া এলা দিলাইস্তে হুনানি য়াকরলইস। ধর্ম কর্ম রসাতলে যানিত পড়িল বুলিয়া খালকরতে বারো হুনের —

গাঞ্জা খাইয়া মগ্ন হইয়া নাচে ভোলানাথ।

‘এখুরুমতে খানি হুনানি য়াকরল। পূজার চারিয়দিন মর্ত্যে থায়া পূজার বান্দারার শাকল থৈ, ডাইল, বরা-পিঠা, চিনচু, নিরামিষ ইরলপা, আরতির এইরা, ফলাল খেয়া হারৌ হারৌ অয়া টেইপাং মানুর য়াক্ গাঞ্জা আককারী পিয়া বিভুলা অয়া মহাদেব গিরক নাছে নাছে কৈলাসে সালসে। কতিরৌ চুনা অথাইবতা — খালকরিয়া গন্ধরাজে কল্পনাল গাঞ্জার নেশাত হমেয়া আহিথম্ জিপেয়া চার থাংতে দেহের মহাদেব গিরকতে নেই।

নাছতারাতা আজি কালিকার বিচুৰা সৌ মাহি। ঢালহানি বেলাসি ট্রাকর বডিগত কাটামহানি
বহেয়া গাড়ীহানর পিসে পিসে বিচুৰা সৌ মাহি — কোনগে কোয়াটার, কোনগে হাফ,
কুনগে ফুল বইতল আকেইহান গিলিয়া মাইকহানর এলাহানর লগে লগে “গাঞ্জা খাইয়া
.....” এলাহান দিয়া মনেইল উসাদে তাণ্ডব নৃত্য করিয়া সালসি। হুদা মুনিসৌ নাগে —
- তেত্রিশ পারসেন্ট নাইলেতে কিতাইল, দুগ আগ হমেইলেউ মন্দ নেই’ বুলিয়া নিঙল
সৌ কতগিউ হাদিত হমাসি। নাছতারা নিঙল উতার হাব-ভাবে হারপানি যাকরের তানু
বিসৰ্জনা দেহানি মনেয়া গেসিগা হেরৌ বেয়াপা — যেতা মুরর ফুতি দিয়া হেইর লগে
আসি, পুরিজেলেই জেঠা বেয়কর তুল আসি, কনাক নিঙলসৌ যেতা বাপকর আঙুলিত
ধরিয়া ঝু-লাকাং অয়া প্রশেসন চানিত থেঙসি উতারে মাততারা পারা ‘হে অবলা জাতহান,
কইদিন আর মুনির ছেয়াত থাইতারাইতা ! আহ মুনির তুল মাম্মা অইক। নিজর অধিকারহান
কালকরিক।’

নাছতারা অংতা উতা দেহিয়া ছিঃ ছিঃ — আক্-থু-বুলতেই গন্ধরাজরতা হুসহান
আছিল — ‘মি তে মোর মাংকলহানাত বহেসুগ না।’

হুসহান আহানিয়ে হুনের —

“কাটা লাগা

‘কিসাদে এলাহান এহানতে বারো খালকরতেই আরাক মাইক আহানাত হুনের-

- “বল তারা - রা রা রারা

উহানর রৌহান খানি কমইতে বার হুনের পুরাণা এলা আহান ---

“গুটুর, গুটুর গুটুর গুটুর

গন্ধরাজরতা আলিহান হমেইল। মনে মনে মাতানি অকরল, ‘মনারাই বুললেতে
পিক্নিকে রহেয়নে উতা এলা। পূজার তুপ এহানাত ভক্তিভাব আকচুটি দেহ মনে
উপসিলহা উহানিয়ৌ দিতারা এলা এতা হুনিয়া থাইতু-না-যিতুগা বুলানি অকরল। টেইপাং
মানু এতার মূরে পক হমেইলাহাম্লেই কিতা নেই। পাপ, ধর্ম, হারৌ, দুঃখ হাবি খেচুরিগ
করানি অকরলা।

বিসৰ্জনা চানিত গেসেগা গন্ধরাজর গরগিথানীয়ৌ ঔ নাছা উতা দেহিয়া মগ্ন অয়া
থাইলীগা। আইরী বুলতেউ নাইরী। পথগ চেইতে চেইতে গন্ধরাজর আহির সেনাহিদাক
নেয় যারগা। সেন্দাহানৌ বাক্কা অইল। পিনপিনি বরণ আহানৌ দেনি অকরল। মাংকলে
বইতে বইতে তারতা ঠুকরল। গেসিগা উতা আইতে জিলাবি দুহান আহান আনতাই এ
খৌরাং এহানল খাংকরিয়া থাইল বুলতে মাইকর অনাচার এলা এতাল তার মুরগ

খাবেললা। গরে হমেইলে খানি নিস্তার পেইতৈ বুলিয়া উঠিয়া চিয়ারহান তুলতেই কারেন্টহান গেলগা। চারিয় বারা আধার অইল। লাংলাকাহানাং আসে গরগত আক্খুলাগ গন্ধরাজ। কাদাবারাং গর নেই, পিঠিয়েদে বিলগ। তার মনহানাং ডর আহানৌ হমার পারা উহানে থক্ক গরে হমেয়া দুৱারহান গাটিং বুলতে পিঠিয়েদেস্ত ডাক আহান হনল। নিঙলপী আগৈ ডাহিরী — ‘দাদা, দাদা.....’ বদাগন্ত কাকেই আহান নিকালেয়া দুৱাদে চেইতে কারেউ নাদেহের। কারেন্টহান যিতেগা পেইরা ক্ক যে আধারহান দেহেসিল উহান এবাকা নেই, খানি পহর অইল। বার হনের ‘দাদা, অ দাদা.....’। কারেউ নাতে দেহের কাদাবারাং, হুদা ডাকহান হনের। ডর আহান হমেয়া গন্ধরাজে ডাট্‌করে মাতল, ‘কুংগ!’ নিঙল উগ আরাকৌ কঙালা নারগল মাতল, ‘কিয়াকা ধমকারতা দাদা, মোরে নাচিনরথাং?’ হনিয়া গন্ধরাজ খানি লাজপেইল পারা। তাপক আংকরল ‘কুমপেইত আসতগ নাউ দেহরি, দেখলেহে চিনুরি না নাচিনুরি মাত্তু নাই। কই মুংহানাত আই।’

— তোর মুংহানাত উবা অসুনাই।

— কিয়াকাতে মি - নাদেহরি?

নাদেখলে নাচিনতৈ। নাচিনলে দে নি মনেয়া আহেসে য়ারিহান দে নি নুৱারতৈ উহানে মুংহানাং নিকুল্লী। তারাংত চারি পাচ আত দূরেইত উবা অসে উহান দেখল গন্ধরাজে। শূণ্যহানাং উবা অসেহান দেহিয়া হারপানি বাকি নেয়ইল এগ আত্মাগ, নাইলে প্রেতাত্মাগ। ডরহানে নিক্করানি অকরল। নিকালাসে কাকেইহান বদাগর ভিতরে আনচিল করিয়া দুৱারহান গাটিং বুলতেই নিকুলেসে নিঙল উগৈ বার ডাক দিয়া মাতল, ‘দাদা ডর নাপেই, মি তরে কিস্তাউ নাকরতৌ, মি প্রেতাত্মাগ নাগৈ, হবা আত্মাগ। তি নাদেহর বুলিয়া গারিগ পালৈলুতা। এবাকা চিন্।’

— না চিনলু তি কুংগ মাত ? এপেই কিয়াকা আহেসততা ?

— হাঃ মরে না চিনলে ?

— না

— মি তোর উষা মামীর জিলক !

— কুন উষা মামী ?

— তোমার মামাগাছির মুঙর লেইফামহানর কাদার।

— পাছরলু।

— নিংশিং অ, কুপকরে খালকর। কনাকে তোর ইমার তুল তোমার মামার গরে

আইলাই উবাকা ইমাই মরেল তানুরাং গেলীগাকপুরি তোর ইমার তুল য়ারি দিয়া উছনি
চেয়া বইলা উবাকা তুমি খেললাই আরো মি হুরকাং অসিলু বুলিয়া কাদাং বয়া চেইলুগ
না, নিংশিং নারতা !

— হাবি হুরকাং সৌ কাদাং বয়া চেইলা । কইগরে নিংশিং অইতৌতা ।

— মি হাবিত্ত তঙাল অসিলুগ । তোর ইমাই মোরে বানাপেয়া লিকলির দ্যৌ-
সৌগ বুললুগ ।

— উতা নিয়ামপারা দিন অইল । হাবি পাহরলু । আর ডিগল নাকরি । তোর নাঙ
কিনাঙ মাত, নিংশিং অউরি নেই চেইং ।

খানি ইমপানি অয়া — আরাকৌ নুংশিপা কঙালা নারগল মাতল — ‘মোর
নাঙ সুদেষগ !’

— শহীদ সুদেষগ !

— হাই ! তুমি শহীদ সুদেষগ বুলরাই । মোর নাঙহানতে ছদ্দা সুদেষগ ।

নাঙহান ছনিয়া বারো তেইরে সেইক্ষাতে দেহানিয়ে গন্ধরাজরতা গারিগ জিরিং
জিরিং করিয়া রমকাটা বারি দিল । ডরে হারৌরে তিলয়া অনথকপা অনুভুতি আহান তার
মনহানাং আহিল ‘কিতা বুলিং নাবুলিং’ ‘কিহান করতু নাকরতু’ ভাব আহান আইতেই
আতর তারা দ্বিয়হানি গন্ধরাজে সুপকরে বেলাসে । সুদেষগই দেহিয়া মাতিরি — হাঃ দাদা,
কিয়াকা আতজোর কররতা, গমনেই । তি জেঠাগ না । তি সমাজহানরে বানাপারগ হারপেয়া
তরাং য়ারি চুটি আহান হনুবেইং বুলিয়া আইলুতা । ত্বরাকরে বার কুপকরে ছন, মোরতা
সময় নিয়াম নেই ।’

সুদেষগরে দেহিয়া বিলবাড়ীর রেললাইনগং তেইরে গুলি করিয়া মারেসিলা উহান
গন্ধরাজে নিংশিং অয়া মারেসিল উগর গজে কানথিহানে তারতা গারিগ জিগ’ অইল ।
সুদেষগই তেইর য়ারিহান অকরানির আগে গন্ধরাজে মাতানি অকরল, ‘সুদেষগ, তোরকা
বুলিয়া পুত্ৰাপ সমাজহান আজি ইঙাল ঙালইলাং । তোরেল আমি নিয়াম নাপাল করিয়ার ।
টেপানাগন্ত অকরে বুড়া অয়া কলঠং চেলসিতা পেয়াউ তোরে চিনতারা । তোরে সমাজহানর
হাবিয়ে নিংকরতারা । তোরে চিনতারা । তোর আত্মাত্যাগরকা তি মরিয়াউ অমর অইলে ।
তি আমার দধিচি । তি সুপকরে হিন নাপেই । তোর দুঃখহান মি হারপাউরি । তোর আত্মাগ
শাস্তি অনির সিজিল করানিরকা মি খালকরুরি । অফিসে আইতে যিতেগা তোরে গুলি
করেসিল ঔ পাপী উগরে দেহিয়া কানথিয়ে কানথিয়ে দাত কামারাউরি । সুযোগ আহান
চেয়া আসুতা, সুযোগহান পেইমতাই প্রতিশোধ নিতৌগা’ ।

— আঃ ও ভুল উহান কুনদিনৌ নাকরিস। কুনগয়ৌ নাকরকা। উগরে প্রতিশোধ নিবাইগাতাই হাবিয়ে জানাজানি অইলাকপুরি সমাজহানর গজে বারো আরাক হৈপত আহান আপরতৈহা। মোরতাউ মানহান কমইতৈ উহান অইলে। উগৈ মরে মারল আরহে মি শহীদগর সম্মান পেইলুনাই। উগৈ না মারলেউ আকদিনতে এমনৌ মরলুইস। আজি হুদা আমার সমাজে নাগৈ, আর আর সমাজেও ভাষা শহীদগ বুলিয়া মোর তঙাল ফাম আহান লেপসে। তা আর উগর গজে মোর কোন কানথি নেই। সরকারী ডিউটি করতেগা উগৈ যদি খেইপা খেইচক মনহান অয়া গুলি করেসিল উহান অইলে তা এমনৌ আনাংশা পেইতৈ। উহানরকা বুলিয়া বারো উগরকা বুলিয়া মোর আত্মাগ শান্তি নাপারহান নাগৈ।

— উহান অইলেতে কিহান করলে তোর আত্মাগ শান্তি পেইতৈ ?

— হন, মাতিং। উহান মাতানি মনেয়া মি তোরাং আহেসুগ।

সুদেষগর আত্মাগরে শান্তি দেনি আমার পইলাকার কর্তব্যহান। কিহান করলে তেইর আত্মাগ শান্তি পেইতৈ, আমরতা হারপানির মুরাত নেয়সিল। আজি তেই সেইক্ষাতে নিকুলিয়া মাতিং বুলিয়া লেপইলীহান দেহিয়া হারৌহানে কুমবাকা ছনতৌতা বুলিয়া গন্ধরাজ বাসা নুরারিয়া থাইল।

সুদেষগই মাতানি অকরল, “দাদা মি সমাজহান পালকরানি বার গালকরানির সালে মোর ঠৈগ কাতকরেসুগ — এহান হাবিও হারপানি থক। কিন্তুমান আজিকালি সমাজ এহান মোরেল রাজনীতি অকরেসি, এহান মি হবাকরে হারপাউরী, হারপেয়া মি অশান্তি আহানাং পরেসু। দাপা আহানে মোর নাঙহান কামে লাগেয়া নাঙ কামেইতারা বারো মোরে বের দিয়া থয়া আরাক দাপা আহানরে চেপকরানি নাততারা। এহানেতে সমাজহানাত মোরেল বিভেদ আহান সৃষ্টি অযারগা। সমাজে এসাদে বিভেদ অক, দলাদলি অক উহান মি নমনাউরী। মোর কথাহান অইলতাই মি সমাজহানর হাবিরগ — সমাজহানর হাবি মোর নিজরতা। এসাদে মোরেল দলাদলি করতে থাইলে সমাজহান আঙুরানি নুরারতাই বার মোর আত্মত্যাগহানৌ বিফলে যিতৈগা। তা আর মোরেল আর রাজনীতি নাকরকা। ব্যক্তিগত কৌলিখান্না উরাবেলেয়া সমাজর স্বার্থে হাবি তিলয়া আকপেই বয়া মোরে নিংশিং অকা, উহান অইলেই মোর আত্মত্যাগহান লেমেদে নাযিতৈগা, সমাজহানৌ ইঙাল-ঙালৈতৈ। দলাদলি বেলেয়া হাবি আকতা অসিহান দেহিমতাই মোর আত্মাগ শান্তি পেইতৈ।

সুদেষগ ইমপানিগ অইলীহান হারপেয়া মুরগ তুলিয়া চেইতে গন্ধরাজে দেহের আহির পানিয়ে তেইর মেইথংহান তিঙেসে। তেইরে দেহিয়া তারতাউ হকগ আহিল। তারে চেয়া বারো মাতানি অকরল, ‘সমাজ বানাপেয়ার বুলতারা উগ দুং আগরাং গিয়া

মি একথা এহান মাততেগা তানু মোর কথাহান ছনানিয়েই নামনেইলা। তি ইকরানি অকরেসং বুলিয়া তরাং আইলুতা। মোর মনর কথা এচুটি ইকরিয়া তি সমাজর মানুৱাং প্রচার করেদে।

— মি সমাজর সাধারণ মানু আগ। মি ইকরিয়া মোর কথাহান ইলইতাইতা?

— ইলকা, না ইলকা তি খালকরিল দরকার নেই। তোরে মাতলু কাম এহান তি মনহান দিয়া কর। মোর কথাহান ইলইলে সমাজহানর হবা অইতৈ, মোর আত্মাগ শান্তি পেইতৈ। মোর কথাহান না ইলয়া দলাদলিত মেইকখুগ অইলে সমাজহান মতইতৈ, সমাজহান মতইবতাই যতই ডাঙরিয়া অয়াউ থাকা পালয়া থা নুৱারতাই। মোর আত্মাগৌ শান্তি নাপেয়া আট্টিংগাহানাদে বুলে বুলে থাইতৈ। সমাজহানরে বার মোরে বানাপেইলে মোর কথাহানি ইলইতাই।

সুদেষগর কথাহানি ছনতে ছনতে গন্ধরাজর আহিথমে গুলাহান আহিল। আহিগি পুসিয়া চেইতে সুদেষগরে আর নাদেখল। খালকরানি আহান হমেইল তার মনহানাত। সুদেষগরে ল রাজনীতি অর বুলিয়াতে তা হার নাপাসে। ঘাঘাৱা-চেংকুড়িল দলাদলি অর বুলিয়া হারপাসে কিন্তুমান সুদেষগরে ল দলাদলি অর বুলিয়াতে তা হারনাপাসে। আত্মাই মিনামপা না টটরতারা উহানে সুদেষগই মাতিয়া গেলীগা এহান হাইহান বুলিয়া যাকরিয়া গন্ধরাজ তেই মাতিয়া গেলীগা কামহান করানিত লেপইল।

“সুদেষগ তি মহান আত্মাগ। তোৱ আত্মাগর চিৱশান্তি বার সদগতিৱকা মি জীবন এহান হন্না কৱিয়া যিতৌগা” বুলিয়া বাসাক কৱিয়া আহিথম জিপেয়া গন্ধরাজ তেইৱাং নিঙ কাংকৱল।

আহিথম মেলিয়া চেইতে বিসৰ্জনা চানিং গেসিগা উতা আয়া গন্ধরাজরে আংকৱলাহা, “কিয়াকা কাদৱতা?”

— “না হে, কাদুৱিতা নাগৈ। পক আগৈ বাৱেয়া আহিৱ পানি পড়েৱতা। বিলগৱ কাদাত থায়া পক এতাই দিতাৱা যন্ত্ৰণা এহান। সেন্দাহান অইবতাই ছৱিত নেই। কই জিলাবি কিতা খানি আনে থাইলে দেই। দশমীৱ জিলাবি খেইতৌ বুলিয়া বাসেয়া আসুগ।”

জিলাবিহানি দিলাহা আৱ খেইং বুলতেই সুদেষগর কথাহানি নিংশিং অয়া জিলাবিহানি থয়া গন্ধরাজ খাতা কলম বিসাৱেয়া কোঠাগত হমেইলগা।

* * *

বারয়া তেরয়া

টেইপাং মানুর ডরপেইল কাফাম এতা কতিরৌ নিয়াম অগেসেগাতা। পানি ডরপেয়ার, জ্বি ডরপেয়ার, বৌউরুল্লি ডরপেয়ার, বৈচাল ডরপেয়ার, পথে আটতে কুকুরে কামারতাই বুলিয়া ডরপেয়ার, পথেঘাটে গাড়ীয়ে থেংনা দিতে বুলিয়া ডরপেয়ার, সিনা ফামে ডাকাতি করতাই বুলিয়া ডরপেয়ার, উগ্রপছীরে ডরপেয়ার, কবার জম বাগলে খুনটেইতাই বুলিয়া ডরপেয়ার, দুরার আংকরিয়া গুমজিলে চর হমেইতাই বুলিয়া ডরপেয়ার, নিয়াম খেইলে হজম নাইতৈ বুলিয়া ডরপেয়ার, খেইতে মানুরে চেইলে নজর লাগতৈ বুলিয়া ডরপেয়ার, ডাট মরেইরে হেয়ে ডরপেইতারা, ডাট হেয়েরে মরেয়ে ডরপেইতারা আরতাউ কত কিতা লেহেয়া লমকরে পারিলহান নাগৈ।

এতা হাবিস্ত এলনির উপায় আকেই হানৌ আসে। প্রকৃতি ইমার উরেস্ত আহের ডর উতা ছাড়া বাকী উতা নিজে সমালানি যাকরের। প্রকৃতি ইমার উরেস্ত আহের ডর উতা কতহানাস্ত এলনির উপায়ও আসে কিন্তুমান বৈচাল, বৌউরুল্লিস্ত জিংতা অনি চিলর। বৌউরুল্লি এগতে হাবিস্ত জিঙে। উহানরকা বৌরাজারে হাবিস্ত পাংকালপাগ বুলিয়া হাবিয়ে যাকরতারা।

বৈশাখ মাহা এহানরে বৌবরনর মা'হান বুলিয়ার। এ মাহা এহানাং বৌরাজার পাংকালহান নিয়াম অর। এ মাহা এহানার ১২, ১৩ তারিখ দ্বিয়দিন বৌরাজা গিরকর পাংকালহান ঠুমর। এ দ্বিয়দিনরে বারয়া-তেরয়া মাস্তারা। বারয়া-তেরয়ার বৌ উরুল্লি আকেইগ নাঙসি উতা নামরেসি পেয়াউ না পাহরতাই।

বৈশাখহান হমেইল। গাঙর মানু বারয়া-তেরয়া আহের বুলিয়া গরে সেংকা বরানিৎ থেঙসি - গুরুর সাঙে, খেরর হেইনিৎ খুটি সিলকরানিৎ থেঙসি।

কুসুমলেইর গরগৎ কুনগৈ খুটি সিলকরেদিতাই, সেংকা বরাদিতাই? মুনি মানু বুলতে গরে আকগৌ নেই। তেইর জারনহান জারে নুরারিয়া হেয়ক অকালেই দৌ অয়া রাই সাঙেল। যারি জেলাগ অয়াউ কম নেই, গাঙহান হাবি থর থর নিক্করতারা তেইর জারনে। আকখুলা পুতক ধনঞ্জয় সিবেইত হমাসেগা। মালকর হুকুম বেলা নুরারিয়া তিনগ সৌ অইলি থাঙৌ ময়লক সুভদ্রারে আজি পেয়াউ আকখুরুম চাকরির ফামে নিয়া কোয়ার্টারে থনি নুরারেসেগা।

গরে মুনি মানু নেয়ইলেতে কিতা অইব, কুসুমলেইতে পাচগ মুনিরাংত কিতা কমথাং? তেইর হাউকি খেয়া নিজর গরর কাম বেলেয়া বলরাম, সুখময় নিজর গরেস্ত বরুবা বাহা সেদেয়া আনিয়া কুসুলেইর গরর খুটি সিলকরেদিল, সেংকা বরাদিলা। আর

খালকরিলতাতে কিতা ? কুসুমলেইর গরগ পরিলমাহি দরা অইল ।

গুরুর সাঙ, খেরর হেইনির কাতে কুসুমলেইরতা চিন্তা নেই । বসরএহান গাঙেদে ট-ট করিয়া বুলতেউ শাং নাইরিগে গুরুহে পালতৈতা ! পুতকর বেতনহান আয়া ফৌরইবহাতাই নিক্কা ইলিশা - চহাবেইনং নাইলে রউ আলু বেইনং নাইলে পরম খলতুম নাইলে লেউ বোয়াল । বেতনর রূপাহানি লমৈবতাই ইরলপা-পালটে হুকন পুড়িয়া ; জারর পরে লংচাক পুরিয়া পালটে । গাঙ পরগনাং বুজন কনাক তেই ডরপেইব কুনগৌ নেই । অমাটিক ডাট, মুনি সাকপা জেলা এগরতাউ ডরপেইল কাফাম আহান থাগেসেগা ।

বারয়া-তেরয়াং মানু মাদানত ভাত খেয়া লমকরতারা মেরাকগৈ রাধিয়া না হাজেয়া থইতারা, বৌহান এরলে খেইবাতা বুলিয়া মেরাকগৈ চিরা কলা আনিয়া থইতারা রাধানি নাংনাইলে খেইবাতা বুলিয়া । বায়ুহান আসি বেয়াপা উতাই চিরা খেইলে গারি বেরালাগের বুলিয়া ভালকরে রাধিয়া থইতারা । সুভদ্রা সিবেইর মরেইগ অয়ানেই কিতানেই ডরভয় কম । বৌবরন সুপকরৌ ডর নাপেইরি । অয়াতে কিতা — বৌবরনহান আনলেই হৌরিয়ক অলইরি অংতা উহান দেহিয়া তেয়ৌ ডরপেইরিগ অলয়া হৈ হৈ করিরি ।

বারয়ার মাদানহান । হাগহান বৌরাজাই কান্তা করিয়া হদাসে । সেন্দার ধুপথশ্বেই দিয়া সুভদ্রা চাকামে হমানির সিজিল করিরি । কুসুমলেই বৌবরনহান আহেরহান দেহিয়া ডরহানে হেজিহানর কাদা আগদে বহিয়া বহকরে চেইরি । সুভদ্রা ফুতি পটেয়া ফুংকাহানাং জ্বিগ লাগেইং বুলতেই হৌরিয়কে মাতিরি, “জ্বিগ না অকরি, চিরা কলাগুলি আনুরাসু উতা খেয়া রাতিহান থাইতাঙাই । এবাকা বৌহান অকরবতাই রাধানিহান মেরাক সেরাক অইতৈ — জ্বিগ নিবেইতেইতা না সৌগি সমালতেইতা ।”

— হুদা চিরা কলা খেয়াতে কিসাদে রাতিহান কাটেইতাঙাইতা ? ইনেই পারলেউ মিতে নুবারতৌ — মি তে সৌ-র মানুগ । সৌগিয়েউ ভাত নাহেয়া নুবারতাই ।

হৌরিয়কর কথাহান নাথনিয়া সুভদ্রা চাকামে হমেইলিগা । সৌগি সেন্দান্ত গুমজেসি । ভাত লমকরিয়া লমৈতেই লিরি লিরি বৌহান অকরল । আকহান ডরপেইরি কাফামহান সৃষ্টি এহানাং — যেহানে কুসুমলেইর পঞ্চইন্দ্রিয়রে শাসন করেব । বৌহান অকরানিতে ফাৎনেই উরাদারা আয়া জ্বিগ পানি ডালিয়া নিবা দিল । সুভদ্রা হৌরিয়করে মাতিরি, “হা ইনে, জ্বিগ কিয়াকা নিবাদিলেতা, হিদলহানিতে কিসাদে পুরতৌ ।”

— না রাধি, চিরা কলা খেয়া থাইতাঙাই বুলতে নাকরিয়া ভাত রাধলে, এবাকা লমইল বুলতে হিদল পুরিং বুলৌরিতা । রউ-বাউ আনিয়া থা নে । তোর বপাক আহের উগরেতে কিসাদে আটকেইতেই !

— ইনেই আপ্পানে ডরপেয়া লমযাউরিগাতা, মি আসু নাই !

— কতি জেলা এগর ডর নেই এহান । তরে জিঙে মিয়ৌতে ডরপেইতে !

হৌরিয়কর সাদে ডর ভয় নেই মুনিসাকপা জেলা আগর এসাদে ডর এহান দেহিয়া সুভদ্রা ফাক্-ফাক্ আহিরি ।

হৌরয়ক-বহক টটরতারা হের এগৎ বৌহান খানি জবর অইল । পিঠির হেইনৌজারর হুকানা ডেঙ আগ বাগিয়া কুসুমলেইর গরগর চালহানর গজে পড়িল । হৌচুটে কুসুমলেই খাংচেংহান আটেয়া বহকরে গুজুরে গুজুরে গরগর হমবুকে আদ্যেকার হিলগ-পারা দরা উচ্ চকি আহান আসিল উহানর চাকলেগর তলে বস্তা আগ পাড়িয়া গুমজেসি সৌ হাবিরে বুঙ বুঙ তুলিয়া আনিয়া বহুদিলহা । গুমর আনিং সানিং হানাং সৌগি উংখাত অ-পড়তাইগা বুলিয়া সুভদ্রা সৌগির কাদাং বয়া হৌরিয়কর লীলাহান চেইরি ।

বৌহান জবর অর মাহি কুসুমলেই পিঠির থংচিলেদে আকখুরুম মুঙর থংচিলেদে আকখুরুম দাপদানি মেরাক অয়া আটিরি । লেনটনগর দসিগ কমাদিল ।

হাগহান কুমছালিগ অসে । দৌ জিলকার উবাকা পৃথিবী ইমারে বার বৌহানে হারৌ অয়া নাছতারা গাছ বিরুখরে মেম্বমকাহানরকা দেহানি যাকরের । মহাদেব গিরকর ডম্বরুগর পাগালা বৌহানর সাদে দিনহান গুজুরের মেরাক মেরাকে । উহানর তালে তালে গাছ বিরুখ হাবি নাছতারা ডিগল ডিগল গাছ নিয়ামপারা গারি বাগিয়া নাছতারা । বৌহান জবর অর মাহি গাছ বিরুখ তাল বাগিয়া তাগুব নৃত্য অকরলা । পাহিয়া পলি জম বেলেয়া মাঙইলাগা ।

বায়ু কুনেদেঙ আহিল বৌউরুল্লিগ পইলাউ কুসুমলেইর গরগৎ দিল মুজুরন উহান গরগ নিককরল । পিঠির বাহাসপা থাইতেগা বৌউরুল্লিগর পাংকালহান খানি ঙাককরানিয়ে গরগ নক্হানিয়েদে এল পড়িলগা । যেহানি লাগিল উহানিতেই কুসুমলেইর টিকেদে ধুমা নিকুলিল । পইলাকার বারিহান দিয়াউ লংলেইগ খাটাংহানাদে বুলনদিল । বার নামথু নামথু গরগৎ বৌহান বারি দেনি অকরল ।

কুসুমলেই অকতা নিংশিং অইলি - তেই বৌরাজারে ভক্তি আহান নাকরেসে । চেমকুগন্ত চউল নুষ্টি আহান নিকালেয়া পিরা আহানল নুঙর থংচিলহানাদে নিকুলিল । সৌগি বস্তাগর গজে গুমজে পড়েসিগা । হৌরিয়কে কিহান করিরিহান চেইং বুলিয়া সুভদ্রা তেইর পিসে পিসে নিকুলিল ।

লংলেইগ জবর অয়ারগা । কুসুমলেই ধরেসে পিরা উহান উঠানহানাদে ইটাদিয়া

চউল মুষ্টি উহান কাদাদে হিচাদিয়া বৌরাজারে স্তুতি করল, “ বৌরাজা গিরক, তাপথা অয়া পিরাহানাং বহেদে — মি লেইরাপিগে কিতাউ দিয়া পারতৌ থাং ! চউল মুষ্টি এহান লদিয়া যাগা । স্তুতিহান লমকরতেই দিল দিন গুজুরন উহানাং আকফালে হৌরিয়ক বহক দ্বিয়গি থংচিলহান গাটিয়া গরে হমেইলাহা ।

এখুরুম আহিল বৌউরুল্লিগ আরাকৌ পাংকালপাগ । পিঠির বাহাসপা মুজুরিয়া হেইনৌজারর ডেঙ দুগ আগ বাগেদিয়া যিতেগা গুরা আকজার বাগিয়া কুসুমলেইর গরর গজে বেলাদিয়া ডর দেখেইল । বৌবরনহান দিল্ মাহি দিয়া খানি তাপথা অইল । রাতিহান বাককা অইল । সৌগি হজাক করিয়া ভাত উগি ছদা রুহা খেয়া গুমজিলাগা । বারয়াহান এসাদে লিতইলা ।

বিয়ানত উঠিয়া গাঙর মানু বুলে বুলে চেইতারা গাঙহানর অংতাহান — মদনর গরর টুলিগ উড়েয়া নেসেগা, কৃষ্ণধনর গুরুর সাঙগ বেলাদেসে, পটলর ভাত সাঙগর চালহান ফরদুরেয়া মুঙর পস্থরিগং বেলাদেসে, হরিদাসর গরগর চালহান কুরাং নেসেগা কিংগেজানে ছদা খচাগি আসে, দৌ অর লেইসাংগর কাদার সিন্দুর হেইনৌ উজার উথলিয়া মালঠেপগর পথগ থেংকরিয়া বেলাদেসে । বারয়াং এহানি — তেরয়াং কিতা করের কিংগে জানে !

আজি তেরয়া । গেলগা কালি রাতি ঠৈ হাকাত করিয়া ভাতৌ নাহেয়া গুমজিয়া কুসুমলেই ডিলয়া উঠলি । মেইথং ধয়া কুকালা করিয়া খেরি আগ বুজে চাহাং কড়েই কতমুষ্টি বরেয়া পিরি উবাকা সুভদ্রাই আংকরল, “ইনে কালি রাতি পিরা উহান বার চউল উতা হিচেদিয়া কিতা করলেতা ?

— বৌরাজা গিরক সবয়া আহের বুলিয়া তাপথা অয়া বহানিরকা পিরা উহান বার খানিরকা চউল উতা দিয়া ভক্তি করলুতা । এতা হারপেয়া থয়, সমেয়ত কামে লাগতৈ ।

— কইতে বৌরাজাতে নাউ বহেদিল ।

— তি হারপেইলেতা নাউ বহিলতা ! বহিল আরহে বৌবরনহান এরিল নাই — নাইলে দেখলেইস বৌরাজার পাংকালহান । পইলা দিল মুজুরন উহানাং মি হারপেইলুগ — উহানে ভক্তি আহান কাতকরলুগাতা ।

----- উহানাতৌ বৌরাজা চাম নাইলেতে ?

— পদ্মিনী ইনেরাংত হিকেসু বিদ্যা উহান করতৌ । বৌরাজা গিরক উহানাত ঠেলেয়া যানি নুরারতৌ, লাজপেয়া এরানিৎ পড়তৈ ।

— উহানতে কিসাদে করতাহান ?

— উহান মানুরে মাতানি নাকরের ।

সেন্দাহান অনিয়ে দিনহান কালিকার ডৌল উহান করিয়া আনানি অকরল ।
গুলকরে ভাত রাধিয়া সৌগিরে খরেয়া সুভদ্রা হৌরিয়করে সমালানারিকা খাংচেংহান
আটেয়া থাইলি ।

বায়ু কুনেদেস্ত পইলাকার পুংলেহান অকরল বৌরাজাই । তেরয়ার কুমেইহানাং
চারিয়ফালু যৌরসি । অগ্নিকুনগ রকতগ অসে । ঈশান নৈখাত কুনেদেস্ত দৌ জিলকা
জিলকা পুংলেহানরে পাংকরিয়া আনতারা । দিন গুজুরন বার দৌ জিলকানির তুল
তান্না করিয়া বৌ উরুল্লিগ হিলবরণহান লগে করিয়া আহিল । হিল বরণহান লগে পেয়া
তেরয়ার বৌ উরুল্লিগ হাকাত কাইল ।

পইলাকার হুত উগর বারিহান খেয়া পিঠির লেইকিয়েদে লৌ চিকারি অকরলা ।
কুসুমলেই গরে ভিতরে আটানি অকরল । সুভদ্রারে হুদা কাদাং ডাহিরি । মেরাক মেরাকে
আতর মুষ্টিহান থতাহানর কাদাং চেপকরিয়া মন্ত্র আহান সলকরিয়া খৈতুগর চারিয়বারাদে
মাঠিয়েইরি ।

আজিকার লংলেইগ জিরন নেয়সে । কুন বাধা না মানের । হাবিতা মাটামান্না
করিং বুলিয়া লেপসে পারা । কানকালুরা করিল শব্দল দৌ জিলকার, দুহান আহান বজ্র
পড়িল । সুভদ্রা পেয়াউ ডরপানি অকরল ।

কুসুমলেই পিরা আহানে চউল মুষ্টি আহানে বৌরাজার ভক্তি করানিং গেলিগা ।
বৌরাজা আজি যৌবনহান পেয়া, পাংকালহান ঝুময়া কোন স্তুতি না মানের । পাগল ডমরুর
তালর গজে তাণ্ডব অকরল গাছ বিরুখরেল । মেরাক গাছ বিরুখ বাহুল অয়া মাটিয়েদে
গড়াগড়ি দেনি অকরলা । বৌরাজারকা পিরা আহান পাতেদিয়া, চউল গুলি হিচেদিয়া
কুসুমলেই লেপয়া আসিলিগ এরতৈ বুলিয়া । আজিকার বৌরাজার নিয়তহান দেহিয়া
কুসুমলেয়ে হারপেইল তেইর পইলাকার আতিয়ারহান বিফলে গেলগা ।

তেরয়ার বৌ উরুল্লিগ সুপকরেউ তাপথা নার । খাংনাকার আহিল হুত উগ পিঠির
বাহাসপা জাতেয়া কুসুমলেইর গরর চালহানাং কাছিহান বেললহা । খচাগি থদিয়া পিঠির
চালহান উড়েয়া নেনিয়ে গজহান উদুম দুবা অইল । গরে ভিতরে বরনহান দেনি অকরল ।
সৌগিরেল সুভদ্রা চালহান আসে কাদাউগদে চেপইলিগা । লংলেইগ আরাকৌ জবর
অযারগাহান দেহিয়া কুসুমলেই আর খাংকরানি নুরারল । ডরে ডরে এমনৌ মিছল হাকাত
অসেগ ।

লমইলগা আতিয়ারহান এরাদেনির দরকার অইলহান হারপেয়া পদ্মিনী ইনেরে
 নিংশিং অইলি কুসুমলেয়ে। সেন্দান্ত আটেয়া বাদদিয়া থসে কাকালির খাংচেতহান মুকেয়া
 বেলেয়া কুসুমলেই দুরাদে নিকুললি। সুভদ্রা থংচিলহানর ভিতরে থায়া পলেয়া চেইরি।
 খাটাংহানাদে নিকুলিয়া ডরপেইল মাচাকহান অসে রাতি এহানাং তিঙে তিঙে বায়ুকুনেদে
 বুলনদিয়া আঙালুরিহান মুকেয়া দ্বিয়বারাদে ছালকরিয়া ধরিয়া বৌরাজার চিকারিগরে
 জিঙে চিকারি দিয়া মাতানি অকরল, “বৌরাজা গিরক ! আক পড়লেগা, অইলগা এর !
 লাজ নাপারতা, চা !”

বৌরাজা গিরকৌ না এরের, কুসুমলেয়ৌ না এরিরি। তিঙে তিঙে থুরথুরেই
 কাপিয়া লমঘিরিগাহান দেহিয়া সুভদ্রা উরাদারা নিকুলিয়া গিয়া হৌরিয়করে আঙালুরিহান
 গাঠি দাদিয়া আসুলিয়া গরে আনলগা। গরে বরেয়া হুকানা ফুতি পটাদিয়া কলকরিয়া
 ধরিয়া বইলি। কুসুমলেই ডরহানে নিককরিরি।

বৌবরনহান পেলকরে দিলমাহি দিয়া এরিল। বিয়ান হান অইল। তেরয়ার তাণ্ডব
 দেহানিরকা মানু গাঙহান বুলে বুলে চানি অকরলা। পানিয়ে ঋং-গাত পছরি পথঘাট
 বুরাসে। গাছর ডেঙ বাগিয়া ফামে ফামে পথ থেংকরিয়া পড়েসে। কুনগর গর বেলাসে,
 কুনগর গুরুর সাঙ বাগেদেসে, খেরর হেইনি বেলাদেসে, গরর টুল্লি উড়েয়া নেসেগা।
 কারউ না এরাদেসে বৌরাজাই। পাতাই পাতাই বাড়িগর আঠু আঠু অসে। রাতিহানাং
 পৃথিবী ইমার অবয়বহান তঙাল অয়া চুলে মুরে সানিয়া পাগুলিগ পার অসে। গাছ বিরুখ
 মাহি জাং আত বাগিয়া পড়িয়া আসি। বারয়া তেরয়াই হাবি খলপি খলক করেদিল।

বেলিহান বেঙ আহান কায়া হদেইল উবাকা ওমেস্ত উঠলি কুসুমলেই। দ্বিদিন-
 দ্বিরাতি আনাংশা খেয়া কুসুমলেই তনাইহান নেয়য়া পড়লি — নারগৌ হুরকাং অইলি।
 মেইথংহান ধয়া ধয়া বহকরে মাতল — “সুভদ্রা, বলরাম সুখময়রে ডাহিয়া চালহান
 হংকররা বেলা।”

~ * ~ * *

বানাপানির সালে

নিককাকার ডেকি মনিকা কলেজ রোডর তিনজুড়ার পথগর ছরু দোকানহানর মুঙহানাং মারুতিহান উবা করিয়া চকলেট লনিরকা চেইতে দেহিরী দুকানদারীগর ফাম উহানাং রবিকাকুর পটা শাত বাং হবা আরাক গাররাপুরা সৌ আগ বহেসে।

কলেজ ছুটি অয়া যিতেগা মনিকা রবিকাকুর দুকান উহানাস্ত নিককা চকলেট লয়া নেইরীগা। তিনজুড়ার পথগ থকয়া এপেই নিককা গাররাপুরেই সৌ মাহি আড্ডা দিতারা।

আড্ডা দিতারা সৌ উতারে মনিকাই নিককা দেহিরীথাঙৌ কুনগর তুল কুনদিনৌ আহি পড়াপড়ি পেয়া নাসে। মনিকার গাড়ীহান দুকান উহানর মুঙহানাং উবা অইবতাই মেরাকে গাররাপুরা সৌ উতাই হিন্দী সিনেমার এলা দিয়া চুল আচুরা আচুরা নমুনা থানি দেখরানি মনেইতারা। মনিকাও উহানরে “বয়সর ঔনাহান” বুলিয়া কুন প্রতিক্রিয়া না দেখরেয়া দুকানহানাস্ত চকলেট লয়া বেলেয়া যেইরীগা।

আজিতে পেইরাক রবিকাকুর ফামহানাং শাং বাং হবা চেহারা ছবি হবা গাররাপুরা আগ বহেসেহান দেহিয়া তেইর মনহানাং খটকা আহান লাগিল। অংতা লাকতা বার আহির মিস্ত্রা দেহিয়া এগরে দুকানদারিগ নিঙ নাইল মনিকারতা। গাররাপুরা সৌ উগর লগে আহি পড়াপড়ি অয়া কতসময় থাইলী।

চকলেট কতগ লয়া গরে আইলী মনিকা। গরে আয়া খালকরিরী — “রবিকাকুর জিপুত অমাটিক ডাঙর অথাইবাতা ? রবিকাকুতে অমাটিক বুজন নাসে। না রবিকাকুর জিপুত অমাটিক ডাঙর নাইতাই — অইলেউ এসাদে হবা নাইতাই !

পিসেকার দিন সেংকরে কলেজ ছুটি অয়া আইতে রবিকাকুর দুকানহানর মুঙে ঔ গাররাপুরা সৌ উগরে নিককা আড্ডা দিতারা উতার লগে থাইতে দেখল।

মনিকার মারুতিহান দেহিয়া আড্ডা দিয়া আসি উতা আগুরেয়া আয়া গাড়ীহানর কাদাং চেপইলাহা। মনিকা চকলেটগি লয়া বেলেয়া গেলীগা।

এসাদে করিয়া কতদিন গেলগা, গাররাপুরেই উতা মনিকার তুল টটরানি মনেয়াউ টটরানি নুরারিয়া থাইলা। মুনি অয়া জেলাসৌ আগর তুল টটরেয়া নাঙহান আংকরানি নুরারিয়া থাইলা। “মুনি অয়া জেলাসৌ আগর তুল টটরেয়া নাঙহান আংকরানি নুরারলেতে থায়া কিতা করতাং ? আজিতে এগর তুল না টটরেয়া না এরতাঙাই” বুলিয়া বাসেয়া থাইলা।

সময়হান অইলতাই মনিকার দলা মারুতিহান আয়া রবিকাকুর দুকানহানর

মুঙহানাৎ উবা অইলহা। গাৱৰাপুৰেইৰ দল উহান গাড়ীহানাত চেপয়াই মাতানি অকরলা-
- “গুড আফাটারনুন সিস্টাৰ” আয়া মাতানি অকরলাহা অংতা উহান ঠিক নাপেয়া
মনিকা ৰবিকাকুৰে চেয়া মাতল, “কাকু চকলেটগি ত্বৰাকৰে দে”।

চকলেটগি লয়া টটরলাহা এতাৰে কামহানশা নাকৰিয়া গাড়ীহানল বেলেয়া গেলীগা।
হৌদিন দুকানহানাৎ বহেসিল গাৱৰাপুৰাসৌ উগ এতাই কৰলা বেবাৰ এহান ঠিক নাপেয়া
তানুৰে গুজুৱানি অকৰেসে। “অচিনা নিঙল আগৰে কিত্তাউ কাম নেয়া মাতানিৎ
গেলাইগাতা কiyাকা, নাউ হুনিয়া গেলীগা থাংতে লাজতে নাপেইলাই। আৱাক আকদিন
এসাদে নাকৰিয়।” যিতেগা যিতেগা মনিকাই এহান হুনিয়া গেলীগা।

থাংনাকার দিনে মনিকা ৰবিকাকুৰ দুকানে আয়া চকলেট লইতেহা গাৱৰাপুৰাসৌ
এগ আয়া মনিকাৰে মাতলহা — “কালি এপেই মুনিসৌ কতগৈ কৰে বেললা উহান
মৰতাউ নুঙেই না লাগিল। দিনকাল হবা নাৰ থাংতে এতা কিত্তাউ নাঙনিৎ পড়েসিতা।

— না কইতে মৰেতে শাক্তি কিত্তাউ নামাত্ৰেসি।

— অয়াউ থাক, কৰলা উহান থক নাসিল।

এগৈ ঠেকিয়া টটরারহাতা পাৱাবেয়া মনিকাই তাৰে আংকরল “লিডাৰগৰ নাঙহান
হাৰপানি পাৱৌৱিতা?”

কালিকাৰ সৌ উগিৰ লিডাৰগ তাৰে নিংকৰিয়া মাতিৰীহান হাৰপেয়া বিক্ৰম
নিয়াম লাজপেইল। নামাতিয়া নাইলহান দেহিয়া মাতল, “মি তানুৰ লিডাৰগ নাগৈ,
নিষ্কা সময় কাটানিৎ এপেই আইতে তানুৰে দেখি। তানু মৰ লগৰতা নাগৈ। মোৰ নাঙ
বিক্ৰম। মি নুৱা চাকৰিত হমেইলুগ। মি তানুৰ ডেকি বাউটা সৌগ নাগৈ।

গাড়ীহানাৎ পইলা দেহেসে দিনেত্ত বিক্ৰম নিঙলসৌ এগৰে হবা পাসেগ। দলা
মাৰুতিহানার কাচহান লামেয়া আতহান থইৰী উহান খুমা খুমা অয়া তাৰ আহিথমে ধৰা
দেৱহা। বাৰগেণ্ডি ৰং সাংকরা চুলসপা লেমপালহান বুজিয়া বুকগৎ পড়েসে উহান দেহিয়া
বিক্ৰমৰ আহিগি বাহুৱা দেৱ। ৰাঙিলা মাচু গালগি কাশ্মীৰি আপেলগি পাৱা। মাৰুতিহানৰ
খিৰকীহানাৎ যেহানি দেহেসিল উহানিতেই বিক্ৰমৰ মনহান নিয়ামপাৱা আসুলেসে। নিঙল
এগৰ পূৰ্ণ অবয়বহান কতিৰৌ হবা অথাইবতা বুলিয়া বিক্ৰমে খালকৰেৱ।

নিঙল এগৰ তুল দেহা অনিৰ পিসেদেই বিক্ৰমৰ অবচেতন মনহানাৎ তেই ফাম
আহান কালকৰে বেলাসে এহান তা আকখুলাগৈ তাৰ কুঠাগত বয়া খালকৰতে খালকৰতে
উপনি পাৱানি অকরল। এবাকা তা সন্নিশ নিঙল এগৰ যাৱি খালকৰিয়া থাৱ —
মাৰুতিহানৰ খিৰকীহানাৎ তেই বয়া থাইৰী অংতা উহান তাৰ মনৰ পৰ্দাহানাৎ প্ৰতিফলন

অরহ। তেইর কথা বিক্রম প্রায় সময় নিংশিং অর।

দিন আহান বিক্রম রবিকাকুর দুকানহানাৎ বয়া আসে উবাকা দলা মারুতিহান আয়া উপেই উবা অইলহ। নিককাকার মন চরকরা মুক্‌সি উহানল আংকরল — “কাকুতে কই ?”

কিত্তাউ জুরাপ নাদিয়া বয়ামগন্ত চকলেট কতগ নিকালেয়া মনিকার আতহানাৎ দিয়া তেইরে কুপকরে চেয়া থাইল। তার আহির মিত্তাৎ শাক্তি কিত্তাউ নাদেখল মনিকাই। ঔ আহির মিত্তাৎ বিক্রমে মাতানি নুরারিয়া আসে কথাগ মাহি মনিকাই উম করিয়া পেইল। পার্সগন্ত চকলেটর পয়সাহানি নিকালেয়া বিক্রমরে দিয়া মাতল, “তি না আংকরলেউ মি মোর নাঙহান তরে বাগেইং — মোর নাঙ মনিকা। বি এস্‌ সি ফাইনেল ইয়ার।” দলা মারুতিহান মনিকারেল যানি অকরল।

বিক্রম কিত্তাউ টটরানির সময় নাপেয়া চাবি দেসি পুতুলগ পারা অয়া দোকানর ক্যাসবাক্সগৎ পয়সাহানি বরাদিয়া গাড়ীহান সড়কগর ঠেকগ না বুলন দেসেগা পেয়া কুপকরে চেয়া থাইল।

বিক্রম মনিকা আগর নাঙ-শাৎ আগৈ হারপা হারপি অইলা। আজিকালি তিনজুড়ার পথে দোকানর মুণ্ডে, কলেজে মুনিসৌ কতগিয়ে নিঙলসৌ আগরে পেইলে টিটকারী করতারা, লাংকরতারা, বেজতারা, মেরাকে নাগৈতা টটরতারা উহানর আলিয়ে মনিকা বিক্রমরে পইলা দেহানিহানাৎ হবা পেইলেরগায়ৌ আড্ডা দিয়া থাইলা উতার লগরগ নিংকরিয়া টটরানি নামনাসিলী। বিক্রমর পরিচয়হান হারপেয়া মনিকা তার তুল টটরতে দ্বিমনদিশা নাইরী। বিক্রমর তুল টটরেয়া মনিকাই হারপেইল — বিক্রম হবা পরিবারর সৌগ। চেহারাগ দেখতে যেসাদে হবা মনহানৌ উসাদে হবা না হবানেই উহান এবাকা বিসারানির হন্না করানি অকরল মনিকাই।

মনিকার পাসপোর্ট অবয়বহানে, তেইর টটরানির বার ঠুমহানে বিক্রমরে অমাটিকৌ আসুলেবলল, নিক্কা তেইর তুল দুহান আহান জলা কথা টটরানি মনেয়া মাদানকার ঔ সময় উহানাৎ কলেজ রোডর তিনজুড়ার পথগদে যেসাদেউ আকবুলা দেরগা। বন্ধর দিনে মাদানহান খেদানি তারকা নিয়াম হিন কামহান অয়া আহের।

মনিকাও বিক্রমর তুল দেহাদেহি অইতে অইতে বার মেরাকে দুহান আহান কথা টটরানির পিসেদে হারপেইল এগৈ তেইর মনর মানুগ যেগরকা তেইর অন্তরগর ফাম আহান ইচুদিন উদালা অয়া আসিল। তা থকয়া খানিপ্লারা অইলেউ বিক্রমর তুল দুহান আহান টটরানি পারলেই হারৌ অইরী।

দ্বিয়গিউ উবাই উবাই খানিগ্গারা টটরতারা উহানিতেই নিয়ামপারা চেপ পড়লাগা। তানু দ্বিয়গি টটরতে ছনলে মনে অর নিজরতাই টটরতারা পারা। এসাদে তানু দ্বিয়গির তিলনি-বানা-নুংশির য়ারি চলতে থাইল। তানু তিলনির হিরামহান পেইতারাতা — না কুন রেষ্টুরেন্ট, না কুন পার্ক, না কুন আরুপি সিনা ফাম, হুদা কলেজরোডর তিনজুড়ার পথগৎ রবিকাকুর দুকানহানর মুঙে। সমেয়হানৌ মনর য়ারি খুলিয়া দেনির মত নিয়াম সময় নাগৈ — চকলেটগি লইতে যতহান সময় লাগের, মারুতিহান পেয়া স্টার্ট অফ না করিয়া। খানিগ্গারা সময় এহানাটৌ নিয়ামপারা য়ারির ডেকি আগরে আগৈ উপনি পারলা।

বিক্রমে বার মনিকার আগর প্রতি আগর বানাহান খুমিৎ কাইলেউ মনর য়ারি খুলিয়া দেনির খৌরাঙহান না বাগিল। মনিকার মনমোহিনী মুক্সিয়ে, আরৈপা কেথকে, সিধাসাদা চাল চলনে বিক্রমর মনহান চৌরিয়া অনি অকরল।

দিন আহান কথাত্ত কথা অয়া বিক্রমে মনিকারে মাতল, “মনিকা, মি তরে ঠৈগ দিয়া বানা পাউরি তা থকয়া তরে নিজরগ করে পানি মনাউরি।”

বিক্রম অমাটিক ত্বরাকরে তেইরে একথাচুটি এহান মাতে বেলতৈ এহান মনিকাই না খালকরেসিলী। মাতিয়া বিক্রম রাঙাগ অয়া মনিকারে চেয়া থাইলহান দেহিয়া তেই তারে খানি পাতল করে দেনিরকা মাতল, “বানাপার থাংতে এবাকাউ নিজরগ করেপাসু বুলিয়া নিংকরনে!”

— “বিয়া নাইলে নিজরগ নাইতারাতা তা থকয়া মি তরে বিয়া করিয়া নিজরগ করানি মনাউরি।”

মনিকা কুন জুরাপ নাদিয়া গেলিগা।

মনিকা বিক্রমরে হবা বন্ধু আগ বুলিয়া নিংকরিরী। এগৈ তেইরে বিয়ার প্রস্তাব দিতৈ এহান পেয়া তেইর খালকরানিহান না ফৌরসিলগা। বিক্রমর প্রস্তাবহান ছনিয়া মনিকা চিত্তার ডঙরগৎ হমেইলী — বারে বারে তেইরে তৌরেয়ে বাহি দেহহা।

বিক্রমরে তেই ছন্তমেউ বানা পেইরী। উহানে তেইর ছন্তুমে য়ারিহান যেবাকা বিক্রমে হারপেইতৈ উবাকা তার মনহান কিহান অইতৈ উহান খালকরিয়া মনিকা তেইর য়ারি হাবি বিক্রমরাং খুলাশা মাতানি থক বুলিয়া লেপকরল।

বিক্রম তেইরাং ধোকা খাক্ এহান মনিকা কুমবাকাউ না খালকরেসিলী। উহানরকা বিক্রম যেবাকা তেইর প্রতি আকৃষ্ট অনি অকরেসিল উবাকাউ বিক্রমরে সৌকরিয়া দুরেই করানি মনাসিলী। কিন্তুমান বিক্রম তেইরাং তার মনহান এরাদে বেলাসিল তা থকয়া তেইর দুরেই করানির হুন্না উহান কিত্তাউ কানা নাইল। হয়তঃ বিক্রমরে দুরেই করানির

খস্তা উতাতৌ তেইর মনর ভিতরে তার প্রতি দুর্বলতা আসে উতা ফঙসিল যেতারকা
বিক্রম দূরেই নাসিল।

কতদিন পিসেদে মনিকার জুরাপহান হুনানি মনেয়া আংকরতে মনিকাই মাতল -
—“বিক্রম, তোর প্রস্তাবহান সম্পর্কে মরতা আরাকৌ খালকরানি লাগতে”।

“মোর সম্পর্কে তরে হাব্বিতা ফুকারেয়া মাতলু, আরতাতে কিতা বার
খালকরানি”?

—“মোর সম্পর্কে কিতাউ হারপানি নামনার থাং”?

“তোর সম্পর্কে মর হারপেইলতা আকহান হুদা বাকী”। তেই দুর্বল অসে বারা
উহান আংকরে বেলতৈ পাউরী বুলিয়া মনিকার ঠৈগ থুকথুকানি অকরল। ডরপেয়া
ডরপেয়া আংকরল — “কিহান হারপানি বাকী মাত বেনাই।”

—“মি বাদে তরতা বানাপেইল মানু আরতা আসিতা না কিতা”?

মনিকা কুন জুরাপ নাদিয়া তার তুল আহি পড়াপড়ি অয়া মূরগ নঙেইল।

মনিকার ইঙ্গিতহান পেয়া রাই সাঙয়া বিক্রমে মাতল, “উহান অইলেতে মি”

বিক্রমর লেপনিহান হারপেয়া মনিকা তারে আকদিন তেইর ইমাবাবার তুল দেহা
করবেয়া য়ারি দরা করানি মনেয়া গরে ডাকদিল। অমাটিক নুঙেই করে তেইর বিয়ার
প্রস্তাব এসাদে আয়া ফৌরইতৈহা এহান মনিকা হৌপনেদেউ না খালকরেসিলী। শিক্ষাই-
দীক্ষাই রূপে গুণে, বংশ মর্যাদা কুনগদে আল নাইলেউ ভগবানে তেইরে বারা আহানাং
কম করিয়া থদেসে যেহানরকা তেই থক্ক গর পাতানির হৌপন নাদেহেসিলী। আজি
বিক্রমর প্রস্তাবহান হুনিয়া তেইর মনর আশার ফুলর কুড়িগ মাতাম ফানি অকরল।

হবা হবা সাজেল করিয়া ড্রেসিং রুমগং মেংসেলহানর মুংহানাং বহিয়া মনে
মনে নিজর তুল টটরেয়া বিক্রমরে বাসেয়া থাইলী।

বিক্রম মনিকার গরে ফৌরইলহা। তারে ড্রয়ইংরুমগং বহুরেয়া কাম করের সৌ
উগ মনিকারে পৌহান দেনিং গেলগা। মনিকারে আজি পইলা জাঙহানাত্ত মূরগ তালকরে
দেখতৌ বুলিয়া হারৌ অয়া বাসেয়া থাইল। সোফাহানাং বহিয়া মূরগ নঙেয়া নানান
রঙিন হৌপন দেহানিং গৈগ অসে উবাকা “গুড মর্নিং বিক্রম” কথা এহানি কানহানাং
বারি দেনিয়ে মূরগ তুলিয়া চেইতে দেখল অপরূপ হবা নিঙল আগ সেকৌ সেকৌ দিয়া
মুক্‌সিহানল তারে ওক্করানিং আইরী।

বিক্রমর মনহানাং লগে লগে অন্তর্দ্বন্দ্ব আহান দেহা দিল। মনিকা যে এসাদে খানি
লেংগুরিগ এহান তা হার নাপাসিল। গাড়ীহানাং বহিয়া থাইতে তেইর পাসপোর্ট অবয়বহান

দেহিয়া হবা পাসিল বার তেইরেল ভবিষ্যতর হৌপন দেহেসিল। এবাকা মুংহানাং রক্ষ বাস্তবহান দেহিয়া তা খাংকরানি নুৱারল। মনহান অলাং করিয়া খাংতাক উঠিল।

বিক্রমর অংতাহান দেহিয়া মনিকাই মাতল, “কিতা অইলথাং বিক্রম — কিয়াকা অমাটিক তরাকরে উঠলেতা, ব”।

— “তরে এসাদে দেহিয়া এবাকা মাতিলতা মোরতা নেই। আজি আর য়ারি দেনি নুৱারতো”।

— “কিয়াকা নুৱারতেইতা? খুলাশা কর”।

“মোরে তি আগেই বাগানি থকসিল মনিকা”।

— “মি বারে বারে মোর অসুবিধাহান বাগেইং বুলতে তিহে ছানি নামনাসিলে। এবাকা মরে দুষরতা”।

প্রেম এহান অন্তরর লু বারহান। গারিগর তুল অন্তর এগ নিয়ামপারা তঙাল। এবিশ্বাস এহানল মনিকা বিক্রমরে তেমজেয়া খানি তাপথা করানি মনেয়া বিক্রমর আতহানাং ধরিয়া আটকেইতে তেইর আতহান সেচাদিয়া বিক্রম নিকুলিয়া বেলেয়া গেলগা।

মনিকা ইচুদিন কল্পনাল হংকরেসিলী গরগ লেঙৌর গরগর ডেকি মিকুপহানাং বাগিয়া পড়িল।

কিহানৌ বা দুষ করেসিলীথাং ফুলগ পাৱা পবিত্র নিঙলসৌ এগ! জরম অইতে লিকলিক করিয়া দৌ সৌগ পাৱা অয়া জরম অসিলীগ — ডাঙর অনি অকরতে পলিও অয়া জাঙ আহান খানি আসুলে বেলল। বাপকে রূপারে রূপা নাবুলিয়া চিকিৎসা কৰুৱেইল থাঙৌ বালা অনি খানি বাকী থাগেলগা। সুপ আতুরগতে নাগৈ নাই। আর আর হব্বা মানুর সাদে তেইরতাউ জিংতা অয়া খানির অধিকার আসে, গর-গিরস্থি করানির অধিকার আসে — গর পাতানির খৌৱাঙ আসে।

এ কঠিন সংসার এহানাং তেইর মনর জ্বালাহান কুংগৈ হারপেইতইগ! টেইপাঙ মানুৱাংত তেই অমাটিক হৌনাবি আশা নাকরিৱী। এতাহাবি হারপেয়া পুৱিজেলাগ অযেইৱীগাথাঙৌ মনর খৌৱাঙ গুমজুৱেয়া থয়া হারৌ হারৌ অয়া থাইং বুলতে বিক্রম তেইর জীবনে আয়া গুমজিয়া আসিল খৌৱাঙ উহান হজাক করেদেনিয়ে মনিকাই সংসারর রঙিন হৌপন দেহানি অকরেসিলী। আজি বিক্রমর বেবারহান দেহিয়া তেইর স্বাভিমনে বারি খেইল। বা বা কাদিয়া হেজিহানাং পড়লীগা।

জীবনে পইলা করেসে প্রেমহানাং উসুটন আহান খেইল বিক্রমে। গরে আয়া থংচিলহান গাটিয়া আকখুলাগৈ খালকরানিং থেঙইল। খানি-পিনি সিকয়া নুৱাৱাগ পাৱা

অযারগা। আকডেকি মনিকার মেইথংহান তার আহিগিং বাহেরহা, আরাক আকডেকি
তেইর সেকৌ সেকৌ কাকেই উহানি। কতদিন গেলেগা মনহান খানি পাতল অইতৈ
বুলিয়া থাইল। দিন যারগা মাহি তার মনহান তাপথা অনিতে থাক্— চানাপা বরি অযারগা।
মনিকারে পাছরিং বুলিয়াউ পাছরানি নুরারিয়া থাইল।

গেলগা দিনর কথা পাছরিয়া মনহানরে খানি তেমজানি মনেইতে উল্ট মনহানাং
চহা চহা করে বিদেরহা। বিক্রমর প্রস্তাবহান হুনিয়া মনিকা ইজ্জুমক যাকরেসিলীগ নাইগে।
তেইর অসুবিধাহান ফংকরানি মনাসিলী থাঙৌ বিক্রমর হেকঠেলাহানে আকয়া মনিকাই
হুনিয়া নুরারেসিলী। মনিকার সম্পর্কে হাবি য়ারি হারপানির হুয়াই না করেসিল বিক্রমে।
মাততে গেলেগা মারুতিহানর খিড়কীহানাং মনিকারে যে পালপাকর রূপহান দেহেসিল
উহানাতেই বিভূলা অয়া কুনতা হারপানি নামনেয়া উরা-দারা করে বেলল।

মনিকার দুখ নেই বুললেউ যাকরের। তেইর খুটাহান তেই গোপন করানি
নামনাসিলী। বিক্রমেহে কিস্তাউ হুনিয়া নামনাসিল। অমাটিক হবা নিঙল আগ এসাদে
লেংগুরি অইতৈ এহান বিক্রম হৌপনেদেও না খালকরেসিল তা থকয়া তেইর সম্পর্কে
কিস্তাউ হারপানির দরকার মনে নাকরেসিল। ডাঙর শিল্পী আগৈ নিয়াম হবা ছবি আহান
ইকরিয়া লেইলেক অয়াউ সাকা আহান নাথইতৈ। ভগবানেতে মনিকারাং এসাদে সাকা
আহান থদেসে।

তা করল এহান লালহান নিংকরিয়া মনিকারাং গিয়া সেংকরে তেইর আতহান
মাগানি মনার, বার লেংগুরি আগরে গরগিথানীগ করিয়া কিসাদে পালনি এহানৌ খালকরের।
এতা কিতাই তার মনহান চুচর জ্বিগর ডেকি জ্বলানি অকরল। কিহান করতৈ নাকরতৈ
লেপকরানি নুরারিয়া থাইল।

মনিকার ডেকি নির্দোষ নিঙল আগরে দুঃখ দেসে উহানৌ তা হারপানি অকরল।
তেইর তুল উনা অয়া তার মনর কথা এহান হারপুনি মনেয়া আকদিন তিনজুরার
পথগরমা মনিকারে বাসেয়া থাইলগা। কলেজ ছুটির সময় উহানাং দলা মারুতি উহান
রবিকাকুর দুকানহানর মুঙহানাং উবা অইলহা। ভিতরে ঔ রূপসী মনিকা। মেইথংহানাং
মুকসিহানর পটা নুংশিপা ভাব আহান। চকলেট লনিরকা পার্সগং আতহান দিল।

হাদিগং উবা অয়া বিক্রম মনিকারে মাতলগা— “মনিকা, হৌদিনকার অসিল
উহানার থাংনাং তরাং কথা চুটি আহান মি মাতানি মনাউরি — হুনেইতা”?

বিক্রমর উবেদে নাচেয়া “তর ডেকি দুর্বল ব্যক্তিত্ব আলা মানুর কথা হুনিয়া মি
নামনাউরী” বুলিয়া চকলেট নালয়া মনিকা বেলেয়া গেলিগা।

মনিকার যারৌপা অহংকার এহান দেহিয়া বিক্রমরতা জিদ আহান মনহানাৎ জরম অইল।

মনিকার ইমা-বাবায় তেইরাংত য়ারিহান হাবি ছনিয়া মনে মনে নিয়াম হিনপেইলা। মনিকার মালকে এ ঘটনা এহানর পিসেদে আকদিন জিলকরে ডাহিয়া মাতল, “মনিকা, মুনিসৌ উগৈ কিহান মাতানি মনাসিল, উদিন ছনানি থকসিল তরতা।”

মনিকা নিজর প্রতি নিয়ামপারা আত্মবিশ্বাসী। মালকর কথাহানর জুরাপহান দিল তেল্লাম— “ইমা, মি কুংগদেও কম নাসু। হুদা ভগবানে আকবারা লেইলেক করেদিতেগা মি লেয়সুতা। যে মুনিসৌগরাং নিজর প্রতি আস্থা নেই উগর তুল গিরস্থি করানিরকা খালকরানি পেয়া নুরারৌরী।”

মনিকা দিনে দিনে চক যেইরীগা। এসাদে দিন মাহা যানি অকরল। মালক বাপকে মনিকারকা খালকরিয়া হিনপা যিতারাগা।

অইতে অইতে দিন আহান এহানর সমাধানর পথগৌ নিকুলিল। কতমাহা পিসেদে কলেজ বন্ধর দিন আহান মালকে মনিকারে ডাহিয়া মাতল — “মনিকা, তোরকা হবা ফাম আহান মি লেপকরেদেসু, মুনিসৌগ নিয়াম হবা বার বুঝদারগ। তি দেহিয়া হবা পানির কথা। তোর মতহান কিহান”?

মনিকা মালকরে বুঝানির হুমা করিৱী — “ইমা, মোর অন্তরর লু-ফামহানাৎ আরাক আগরে কল্পনা করিয়া বহা বেলাসিলু — বার নুৱা করে আরাক আগরে খালকরানি নুৱারতৌ। উতান্ত জিঙে কথাহানি অইলতাই মোর খুটা এহান দেহিয়া এগয়ৌ বার ঠটে বারিখেইল ডেকি অয়া আলথক অইতে। মি আর দুঃখ সহ্য করানি নুৱারতৌ।”

— “হিন নাপেই ! মি লেপকরলু পাত্র এগ তোর খুটা এতা কিতা দেহিয়া হারপেয়া তরে গ্রহণ করানি মনার। তি জিদহান এরাদে”।

জিলকরে এসাদে বুঝেয়া য়াকরুরেয়া লমকরতেই মালকে লেপকরেসে মুনিসৌ এগ কুঠাগত হমেয়া মনিকার মুঙহানাৎ বহিলহা। দেহিয়াই সবয়া “বিক্রম কার কথাল তি এপেই আইলেতা? তর তুল মর কুন সম্পর্ক নেই — তি এপেইন্ত যাগা” বুলিয়া উঠিং বুলতেই বিক্রমে মনিকার আতহানাৎ ধরিয়া মাতল, “মনিকা, জিদ করিয়া তর জীবনহান না মাংকরি। যে মনিকারে মারুতিহানাৎ দেহিয়া মি কল্পনা করেসিলু, হৌদিন আয়া ঔ মনিকারে না দেহিয়া মেস্তমকাহান মি কিসাদে আকসাদে অপড়েসিলুগাতা। এবাকা হারপেইলু কল্পনা বার বাস্তব দ্বিয়হানি নিয়ামপারা তঙাল। এবাকার বাস্তব এহান মরাং নিয়ামপারা কঠিন অইলেরগায়ৌ মি মুঙামুঙি অনিৎ পড়লু। মি তরে ঠৈগ দিয়া

বানাপাসিলু — এবাকাউ ঔ বানা উহান রঞ্জ আগ না কমেসে বার ভবিষ্যতে নাউ কমইতৈ”।

মনিকার মনহান শেঙ্ নাইলী । বার আংকরল — “মি লেংগুরিগ বুলিয়া দয়া আহান করানিরকা গসরতা না কিতা”?

“মোর মনিকারে মি লেংগুরিগ বুলিয়া আর না নিংকরতৌ?” বুলিয়া জেপগত্ত চকলেট কতগ নিকালেয়া আতহান তেইর উবেদে আগুৱা দিল।

মনিকা আগর হেরৌ মুক্‌সি উহান দিয়া চকলেটগি সহ বিক্রমর আতহান ধরিয়া থাইলী।

* * *

সিন্দূর

মানকুমারর আক্খুলা পুতক গোপাল বিয়া করানির উপযুক্তগ অইল। সরকারী চাকরি আহান করের। যৌবনর ডাক আহিলহান হারপেয়া বাপক বৌরেই বিসারানি অকরল। গোপাল চাকরিত হমেইলগা ঔদিনেত্ত মানকুমার মনে মনে খৌরাঙ আহানল আসেগ। কুটুম-কাসারেও মাতিয়া থসিল 'শৌগ ডাঙর অযারগা, হবা নিঙল আহিত পড়লে চেয়ো,' এবাকা ফঙয়া বিসারানি অকরল।

জিল্লার কাদাত আসেগ তা থকয়া মনে মনে ডাঙর আহান অয়া আক্খুলা পুতকরকা নিঙল চেইতেগা মানকুমার গাঙেদে হমানি নামনাসিল। কিন্তুমান বিধির কলমগত লেপয়া আসিল থাংতে মানকুমারর সাদে অভিমানী মানু আগরতা করিলতা কিত্তাউ নেয়ইল। রিক্সাহান পেয়াউ হমানি নুরারেরগা উসাদে ভিতরর গাঙ আহানাত গিয়া গোপালর কইনাগ লেপকরলগা।

পিয়নকর কথা ইলয়া সরার পারে পারে আটিয়া যিতেগা চানিত গেসেগা নিঙলগর তুল মানকুমারর মুঙামুঙি অইল। সরাহানাত হিনেয়া পুরপারেয়া পানি সেনাপুল আহানল আহিরী উবাকা নিঙল উগরে দেহিয়া মানকুমারে ঠিক্পা বেল্ল। বৌরেই বিসারেয়া যিতেগা পানিল ঙককরল এহানর সাদে হবা লক্ষণ আর অনি নুরারের। জিল্লার কাদাত থায়া আধুনিকতার বৌ-বানাল বেরিয়া থাইলেরগায়ৌ মানকুমাররতা সংস্কারবোধ আহান আসিল। নিঙল এগৈ পানিল ঙককরলহান দেহিয়া তা হারৌহানে থাইল ফাম নাপেইল। হুদা উহানরকাউ নাগৈ — নিঙল উগর লেপগ, কচুহান, গারিগর বাট নিয়াম হবা উহানে মেত্তমকার মিল্লেংহানাত হারপেইল 'এগৈ গোপালর তুল চুনা অইতৈগ'। ইচুদিন চেয়া আহের নিঙল উতা কুনগৌ এগর তুল মান্না নাসিহান দেহিয়া মানকুমারে খালকরল 'পিয়ে যেগউ দেহরা দিয়াউ থাক্ ইমে এ নিঙল এগরেই আজি গোপালরকা লেপকরিয়া যিতৌগাগ'। খালকরতে খালকরতে মানকুমার নিঙল উগর পিসে পিসে লগ ধরিয়া তেইর গর তালকরে গেলগা।

আংকরিয়া হারপেইল পিয়নকে যে নিঙলগর যারিহান তারে মাতেসিলী ঔ নিঙল উগর গরগ এগ। গরর গিরকর নাঙ হুনাসৌ। রাজা লকেইর পিপাগ। হিনেয়া আইলী নিঙল এগ হুনাসৌর জিলক।

পিয়নকে দেহরাদিয়া আহেসে কামহান মাতিয়া হুনাসৌর তুল মানকুমারে যারি দিয়া বহিল। জিলকে তিঙা ফুতি পটেয়া, তুলসী পুঙগ লেপিয়া তুলসী সেবাহান করিয়া, নাম্‌সা পিদিয়া তুলসীর পানীল চালহানাদে বারো গরেদে সিটেয়া লমইলতাই হুনাসৌরে

জিলকরে ডাহিয়া মাতল, ‘পূর্ণিমা, মানু আহেসি, খানিরতা কিতা হংকর, চাহা ফুটিও রাধ’।

হারপেয়াউ থকা, হারনাপেয়াউ থকা, পূর্ণিমা নাঙ এহান নিঙলসৌ এগরাং কতিরৌ চুনা-অ-গেসেগাতা। কচুহান যেসাদে পহর শাতহান উসাদে হবা। গাঙে থায়াউ মঙ-মাতাঙে আধুনিকতার গত্ তেইরাং বারি দেসে। গৌড়ীয়াহানৌ নিয়াম হবা। এতা কিতাই পূর্ণিমা নাঙ-এহান সার্থক অসে। লেরিকৌ গাঙে থায়া যতহান ফৌরনি পারতারা উহানি হবা করে পাশ করেসে।

মানকুমাররাংত পুতকর য়ারি ছনিয়া ছনাসৌ ফামহান সামনি য়াকরেসে নিংকরল। পূর্ণিমার কুষ্টিহানর শকগ ইকরিয়া, য়ারিপৌরি দিয়া, চাহা-পানি পিয়া, গোপালরে বারো গরদুরার চানি মনেইলে আহানিরকা মাতিয়া মানকুমার উঠিল। পূর্ণিমায় হমা দিতে মানকুমারে মাতল, “নাঙহান যেসাদে পূর্ণিমা উসাদে জীবন এহান পহর অয়া মানুরেউ পহর করিয়া থাইস— মি বর দিউরি।”

হারৌ অয়া গরে আয়া কুষ্টি দ্বিয়হানির শকগি চেইতে রাজযোটক অসেহান হারপেয়া মনে মনে লেপয়া থাইলা। ছনাসৌ আয়া গর-দুরার দেহিয়া গোপালরে দেহিয়া বারো কুষ্টিহান তিলসেহান হারপেয়া লুহং হানর তারিখ বেলানির ভারহান মানকুমাররাং দিয়া গেলগা।

মানকুমার নিয়াম কুপ মানুগ। গাঙর মানুরে বৌরেই চেইতেগা তারেল যিতারাগাগ। এহান পুতকে হবাকরে হারপাসে। তা থকয়া পূর্ণিমারে চেয়া বাপকে অসে হারৌ এহান দেহিয়া গোপাল হারপেইল কইনাগ- হবা অথাইব উহানে কইনাগ আর চানি না লাগতৈ বুলিয়া লুহংহান য়াকরল।

অগ্রহায়ণ মাহাত দিন-খেল চেয়া লুহংহান দিলা। পূর্ণিমায় গোপালরে দেহিয়া হারৌ অইলী। পূর্ণিমার রূপ দেহিয়া গোপাল আরাকৌ হারৌ অইল। দামান-কইনা আগরে আগৈ জিঙিয়া হবা অসিহান দেহিয়া হাবি হারৌ অয়া মানকুমারর পসনহানার বাখান করলা।

নুৰা দামান-কইনার ফাম তিলকরে দিলা রাতি উহান পূর্ণিমার নিরালহানাত বারো হেদিগত সিন্দুর পিদাদিয়া গোপালে মাতল, “তোর এ সিন্দুর ফোটা এগ জীবন এহান না মিটতৈ - না মতইতৈ”। গোপালরে হুমাদিয়া এ কথা এহান তেইরাং তার বরহান বুলিয়া নিঙকরল পূর্ণিমায়। হারৌপার জোৱারে তানুর নুৰাকালহানাত টৌ তুলানি অকরল।

পূর্ণিমা কনাকত পুরি করাগৈ কা বুলতে উঠিয়া অভ্যাস অসেগ। কইনাগ অয়াউ

পহর অইতেই ঘুমেন্ত উঠিয়া গরকাম লমকরিয়া হাবি উঠানির আগে হিনেয়া, সেঙয়া আয়া হাবিরে উঠেইরী। গোপাল আটেলপেয়া ডিলয়া উঠলগৌ পূর্ণিমার চাপে পড়িয়া ভালয়া ঘুমেন্ত উঠানি অকরল। গাঙর মানুও পূর্ণিমার অভ্যাস দেহিয়া থাকাত দেনি না পাহরতারা। পূর্ণিমা চরিত বেবাররকা বুলিয়া কমদিনেই হাবিরাং পেটে হমানি পারল।

প্রকৃতির নিয়ম এতা হাবি আকতা। দিনহান লমইলে রাতিহান অইতৈহান শ্বে-নেই, জরম অইলে মরনহান শ্বে নেই। ‘আহানিয়ে কাদানিয়ে বেইবুনি’। এতা হাবি চক্রগর সাদে বুলতারা। নিয়াম হারৌ অইলে দুঃখ আহানে উনা অইতৈহা উহানৌ শ্বে-নেই। কিন্তুমান আইতৈ ও দুঃখ উহান কিসাদেহান বা কতি জবর অইতৈহান হারপানি কারৌ মুরাদ নেই।

গোপাল বারো পূর্ণিমার লুহঙ অনির কত মাহা গেলগা। বসন্তহান লালয়া, যিতেগাই গোপালর মনহানাত হারৌপার ভাটাহান দেহা দিলহা। কিয়াকা থাং তার মনহানাত হারৌপাহান কর্পুরর সাদে টুময়া যানি অকরল। গোপালরাং তঙালপা আহান দেহিয়া পূর্ণিমায় খালকরানি অকরল। তেইতে গরর মানুরাং কুনদিনৌ লাল নাসে। গোপালরেও তেই কুনদিন অশ্রদ্ধা নাকরেসে। সৎ-সংস্কারপূর্ণ পূর্ণিমা যেদিনেত্ত গোপালরাং গর পাতেসে উদিনেত্ত তেইর দেহমন হাবি গোপালরাং কাতকরতে কুনদিনৌ আটকুরিগ নাসে। উহানে গোপালর মনর অবস্থা এহান কিয়াকা অরতা তেই উপনি নুঝারিী। তেইর আত্মবিশ্বাস উহান অমাটিক পাংকালপা যে গোপালর মনর ভাব এহান তেইরকা বুলিয়া নাগৈ, তার অফিসর কুন না কুন কৈচানারকা অসেতা নিংকরিয়া তারে তেমজানির হন্না করিী। তেব গোপালর অবস্থাহান তঙাল নার। আরো চানাপা সাক্তি অ’য়ারগা।

এসাদে থাইতে থাইতে কিতাপারা দিন আহান রাতিহান ফুরেইতেগা কালাচিঙখির মাপা উগৎ দুরেইত্ত পদাবলী কীর্তনর দাপা আহানে দিতারা নুংশিপা এলা আহানে পূর্ণিমার ঘুমহান ভাগিল।

..... তোরে করি মানা,

মা যেন শোনে না,

আমার সন্ন্যাসের কথা,

শুনিলে জননী, হবে পাগলিনী,

পাষাণে ভাঙিবে মাথা।

হজাক অয়া চেইরী থাংতে পূর্ণিমায় হেজিহানাত গোপালরে নাদেহিী। আহিথম হবাকরে মুজুরিয়া সেংকরে চেইতে উদালা হেজিহান দেহিী। দুরাত গিয়া থাইবগা খালকরিয়া

খানি বাসেইল। বাসেইতে বাসেইতে নাহেরহান দেহিয়া থংচিলহান আংকরিয়া দুবাদে নিকুলিয়াও চেয়া আইলীগা। গোপালরে না পেয়া হৌরক -হৌরিয়করে হজাক করল। ডাহা ডাহিয়ে গরর মানুর লগে কাদাবারার মানুও দুগ আগ হজাক আইলা।

হুনিয়া হজাক আইলী এলাহানে — হজাক অয়াউ নাঙইলী ঘটনাহানে তিলৈল। দুরেইত্ত বৌহানাত বাহিয়া আহের নিমাই সন্ন্যাসর এলা উহানে পূর্ণিমার হুদিগর ভিতরে নাগৈ ডর আহানে হকাং করে বেলল। নুৰা কইনাগ থকয়া ডর উহান ফংকরানি নুৱারিয়া ভিতরেদে উঙো যিতেগা যিতেগা উবা অয়া আসে ফাম উহানাতেই পড়ে পড়লীগা। ‘কইনাগ পাহাত আইলী’ বুলিয়া হাবিয়ে তেইরে পানি কিতা ডালিয়া, বৌদিয়া আলকরানিত থেঙইলা।

বিয়ানহান আইল। বেলিরাজা আহের পৌহান তার সারিঙারিঙে ফংকরানি অকরলা। গোপালরে বিসারানির সালে বেলিরাজার পাংলাক লাগতে উহানে বেলিরাজার ফঙনিহান বাসেয়া আসিলা হাবিয়ে। এগদে গোপাল গরে নেই এহান গাঙহানাত ডংগ আইল।

দাপা দাপা আয়া গোপালরে বিসারানিত নিকুললা। আকতা জিল্লাদে গেলাগা, আকতা গাড়ীর ফামে গেলাগা, আকতা পছুরির পারেদে গেলাগা, আকতা গাছ বিরুখর তলেদে চানিত গেলাগা। সাকেই কুটুমর গরে আকতা বিসারেয়া গেলাগা — এসাদে করিয়া বিসারানি অকরলা। পূর্ণিমার বেয়াপার গরে পৌহান ফৌরনিয়ে হুনাঙ্গৌ পূর্ণিমার মালকরেল লংলেইগ অয়া আয়া ফৌরইলহা।

বিসারতে বিসারতে নাপেয়া রাতিফুলে থানাত পৌ দিয়া পেঠেইলা। পৌ-র চেত্ য়ারি এহান নিকুলিল। গোপালর অফিসর মানুও আয়া আংলাক করিয়া গেলাগা। দিন গেলগা, হাপ্তা গেলগা, মাহা যানি অকরল তেবউ গোপালর লিম না পেইলা। করানিরতাউ কিত্তাউ নেয়ইল। যেপেই যেপেই গোপাল যিতেগা পাউরি বুলিয়া খালকরেসিলা হাবিপেইত্ত মানু নিরাশ অয়া আলয়া আইলা।

গাঙে এবাকা এহানেই য়ারিহান — গোপাল কুৱাং গেলগা, কিয়াকা হাবিতা বেলেয়া গেলগা। হাবির মনে প্রশ্ন এহানেই — গোপাল কোনদিনৌ এসাদে খাংতাক্ক মাঙনির মানুগ নাগৈ, মাঙেলগাইস্তে বিয়ার আগেতে কিয়াকা না মাঙেলগা। গোপালর জীবনে কোন দুঃখ নেয়সিল। এবাকাতে কোন্ দুঃখহানে পেইলহাতা যেহানরকা সন্ন্যাস নেনির দরকার পড়িল। খালকরিয়া কুল কিনারা নাপেইতার। উহানে হাবি দুষ পূর্ণিমাৱাং দিয়া তেইরেই ঠালগ দিয়া যেগৈ যেহান মনেইল উহান মাতানি অকরলা। গাঙর মানুর তুল গরর মানুও বার সাকেই কুটুমৌ পূর্ণিমার গজে নুঙেই নায়া থাইলা।

টেইপাঙ মানু এতা কতিরৌ স্বার্থপর অগেসিগাতা । নিজর মানুগ নেয়ইল এহানরে
হুদা নিয়াম ডাঙর করিয়া দেহিয়া মানুর গরেষ্ট আনেসিগা কইনা এগ যেগ নিজর ঠৈগর
আক্করত মাংকরিয়া পাণ্ডলীগ পারা অসে এগর দুঃখ হান হুরকাং করিয়া দেহিয়া তেইরে
তেমজানিতে কাদা আগদে থয়া উল্ট তেইরে দুষীগ নিংকরতারা । নুৰা কইনা এগ হেয়ক
নেয়য়া আক্খুলিগৈ যৌবন এহানল জীবন এহান কিসাদে কাটেইতৈ এহান খালকরে
দেকুরা আক্গৌ তেইর কাদাত নেই ।

আক্খুলা পুতকরে নাপেয়া মানকুমার বারো গোপালর মালক নয়নসেনা মিথল
নেয়ইলা । বংশর বাস্তিগ কোংগৈ দিতৈ এহানল বারো তানুর কু-গত জ্বিগ কোংগৈ দিতৈ,
পানিসিটা কোনগৈ দিতৈ খালকরিয়া দুঃখ করতারা ।

পুতকর জ্বালায় নয়নসেনা ফামে পড়লী । পূর্ণিমাৰে মানুৰে দুষীগ নিংকরলেও
হৌরিয়কে তেইরে দুষীগ নিংকরানি নুৱারিৰী, তেয়ৌ বেয়াপাগ তা থকয়া নুৰা কইনাগর
মনর অবস্থাহান তেই হারপানি পারিৰী । উহানে নয়নসেনা সল্লিশ পূর্ণিমাৰে তেইর কাদাত
চেপকরিয়া থয়া দ্বিয়গিয়ে গোপালর বিয়োগর জ্বালাহান বাটাবাটি করিয়া কাদতারা । পূর্ণিমা
রাতিহান অইলেই মানুর অজান্তেই কপালহানর গজে নুঙেই নায়া গোপালর চিন্তায়
আহির পানির গুলাহানে জাবুরিয়া থাইৰী ।

লুহং করতৌ বুলিয়া মনে কতি হৌপন য়েক্করিয়া থয়া আজি গর পাততেহা
কয়দিনৌ বা হেয়কর উমহান পেইল । কপালথিপি পূর্ণিমা নিজরকা খালকরিল হিরাম
নাপেইৰী । পুতকর জ্বালাহান জারে নুৱারিয়া নয়নসেনা আটইলী । পূর্ণিমা নিজর দুঃখ
উরাবেলেয়া হৌরিয়কর সেবাত মনহান দিল ।

বিধিৰ কলমগর ঠৰেইহাচি নেয়সে এহান দেহিয়া পূর্ণিমা মনহান দরা করানি
অকরল । পূর্ণিমায় হারপেইল তেই মানসিকভাবে দুৰ্বল অগেলেগা হৌরিয়ক আৱাকৌ
আট্টেতৈ — আর জিংতা নাইতেও পারে । উহানে দরা সটহান দিয়া হৌরিয়করে মাতল,
“ইনে, তোর পুতকে মোরে মাতেসিল — মোর সিন্দুর ফোটা এগ জীবনেউ না মিটতৈ,
না মতৈতৈ ।” ঔ কথাচুটি উহানরে মোর গজে তার বরহান বুলিয়া মি এবাকাপেয়াউ
নিংকরুৰী । তা আরো ইনেই না খালকরি — তা যেপেই গিয়াও থাক্গা আকদিন তার
কথাহান থনিরকা যেসাদেউ আলয়া আইতৈ । মনহান দরা কর-খানি পিনি অকর বলি
অ ।”

বহকর বুঝানিহানে কিস্তাউ বর না ধরিল । কত মাহা তাক্করিল মাহি তাক্করিয়া
নয়নসেনা দ্যৌ অইলী । পুতক জিংতা অয়া আসে না মরেসে হার নাপেইল মানকুমারে ।
পুতকর জ্বালায় নয়নসেনা দ্যৌ অইলী । বহকর অংতা, বহকর দুঃখ দেহিয়া মানকুমার

ডহিয়া পুরিয়া মরের। যে পূর্ণিমারে দেহিয়া বংশহান পহর করানিরকা আনেসিলগা ও পূর্ণিমা আজি নিজেই আধার অয়েইরীগাহান দেহিয়া মানকুমার আকখুলাগৈ তার নিরালহান তা ঠেকারার। এতা কিতাই ঔলিজেঁলি অয়া নয়নসেনার কর্মহান হুদা শয্যাহান কাতকরিয়া থইল।

চেইতে চেইতে হাত বসর লালয়া গেলগা। পূর্ণিমারকা জিংতা অয়া থানির সিজিল আহান করানির হকে অফিসর মানুর হম্মাত গোপাল কাম করল অফিস উগত পূর্ণিমা চাকরি আহান পেইল। নিরুদ্দেশ অনির পিসেদে আনুষ্ঠানিকতা পুরা করিয়া হাত বসর লালৈলে উগরে মরিল বুলিয়া সরকারীভাবে যাকরানি অর। উহানরকা মানবিকতার সালেদে পূর্ণিমারে চাকরি আহান দেনি অইল। অফিসে আইতে যিতেগা তেই সধবার সাজেলে সিন্দূরর ফুটাগ নিরালহানাত দিয়া যেইরীগা এহানল অফিসর মানুরে টু-টুঝানি অকরলা। অফিসর মানু যতৌ তেইর প্রতি সহানুভূতিশীল অকানে-তেইরেতে হেয়ক মরিল বুলিয়াহে চাকরিহান দিলাতানাই। উহানে তেইরে যারিজেলাগর সাজেলে দেহানি উহানেই ঔনাহান নিংকরেসিলা। ফঙয়া মাতানিও নুরারতারা। তেব কইগর থতা ডিফা দিয়া থনি পারতাইতা। কথা এতা পেটগত গুরগুরার থাংতে কুন কুনগৈ মেরাকে বঙিয়া নুঙেই পেইতারা। পূর্ণিমায় কামহানশাও নাকরিরী।

হুনাসৌর গরেদেও নুঙেইপা নেই। ডাক-ডাক করিরা নিঙল আগরে বিয়া দিয়াও এ অংতা এহানল দেহানিত পড়তাই এহান হৌপনেদেও না খালকরেসিলা। কপালহানর গজে দুখ দিয়া নিরাল ঠেকারানি ছাড়া তানুরতা আর গতি নেই। তেব জাঙাকর মরানির পৌ নাপাসি থাংতে আশা আহানল বাসেয়া আসি।

গোপাল মাঙেলগাতা যুগ আহান বিস্তা অযারগাথাঙৌ পূর্ণিমার অন্তরে এবাকাউ আশার থম্বেইগুন নিভেসে। এবাকাউ তেইর মনহানাত দৃঢ় বিশ্বাস আহান — গোপাল আকদিন না আকদিন আয়া নিকুলতৈহা। অমাটিক লাঙ্খনার হাদিতৌ আশা চুটি আহান কলকরিয়া জিংতা অয়া থানির হম্মা করিরা। গোপাল কিয়াকা গর বেলেয়া নিরুদ্দেশ অইলগা এহানর কারণহান খালকরিয়া মেরাক মেরাকে কুল কিনারা নাপেইরী।

বার বসর লালয়া গেলগা। সাকেই কুটুমে মানকুমাররে মাতলা — ‘বার বসর লালয়া গেলগা গোপাল মাঙেলগাতা, এগরকা আর না বাসেয়া টুপি-হাড়ি বেলেয়া তারকা কর্ম-কাসা করেদেনিয়ে হবা অইতে’ মাতে পারিলহান নাগৈ যদি গোপাল দৌ অয়া থারগা উহান অইলে কর্ম-কাসা না করলে তার আত্মাগ সদগতি নায়া থাইতে। উতার গজে সামাজিকতারৌ প্রশ্ন আহান আসে। এতা কিতা খালকরিয়া মানকুমারে নয়নসেনার কর্মহান ঠৌরাং করিয়া লগে পুতকরকাও টুপি-হাড়ি বেলেয়া কর্ম করানিত লেপইল।

হৌরকর সিদ্ধান্ত বারো সাকেই কুটুমর ইচ্ছার বিরুদ্ধে পূর্ণিমারতা করিলতা নেই।
 তেইর য়ারিহান অইলতাই মরেসেহান লেপ নায়া তারকা বুলিয়া কিতার কর্ম-কাসা। তেই
 এবাকাও আশার নৌগন্ত মটিহানাত জাঙহানি লামানি নুয়ারিরী। সময়র হুতে যৌবনহান
 হাবিতা গিয়া লময়া য়ারগাথাঙৌ সতীগর সাদে গোপালরে সেংকরে পেইতৈ আশা এহানল
 আরতা না খালকরিয়া যৌবনহান ধরিয়া বহিয়া আসে। সামাজিক বারো আধ্যাত্মিক
 চিন্তাধারাল গোপাল মরেসে লেপকরিয়া তার কর্ম করানিত উবা অইলাতা পেয়া পূর্ণিমার
 অন্তরে কোন দ্বিমন-দ্বিশা নেই। মানু আগ মরেসেহান হার নাপেয়া, প্রমাণ নাপেয়া কইনাগরে
 য়ারি জেলাগ লেপকরিয়া হেয়কর কর্মকাসা করানি এহান কিসাদে ধর্মহান, কিসাদে
 সামাজিকতাহান পূর্ণিমায় হারপানি নুয়ারিরী। এহান পূর্ণিমোরে কুংগৈ, কিসাদে
 বুঝেইতাইগা! পূর্ণিমা হেয়কর মঙ্গল কামনা করিয়া এবাকাও ডাটকরে সিন্দূর ফোটাগ
 দিরি।

পূর্ণিমার চিন্তাধারা দেহিয়া ছনিয়া সমাজর মানুরে নানানতা খালকরতারা। কর্মত
 তেইরে য়ারি জেলাগর হাজেল লনিরকা পিড়ানি অকরলা। কিন্তুমান তেইর প্রশ্নহানর
 জুৰাপহান কুংগৈ দিয়া পারতাইতা? পূর্ণিমায় ফংকরে হাবিরে মাতল, “কর্ম কাসা করতে
 মোরতা আপত্তি আসে বারো যেপেই মি য়ারি অসু বুলিয়া প্রমাণ নাপাসু উপেই মি
 কিয়াকা সিন্দূরর ফোটাগ মিটেয়া দলা ফুতি পিদ্তৌতা?”

দলাদলিত পড়লা। কটুরপছী উতা কর্মহানাত না হমানি লেপকরলা। মানকুমার
 দশগর মানুগ। আজি বহকর জিদহানরকা বুলিয়া সমাজহান দ্বি-ভাগ অনিত পড়লাহান
 হারপেয়া লাংলাত পড়িল। বহকর যুক্তির বারাদে অইত না সমাজর রীতি-নীতির বারাদে
 অইত। সমাজর রীতি-নীতি উরাবেলেয়া থক্ক আহান লেপকরানি তারকা হিন কামহান
 অইল। পুতকর জ্বালার লগে নয়নসেনার পুরা নায়া থাসে কর্মহানর চিন্তা, এতা হাবির
 গজে সমাজর রীতি-নীতির যাতা খেয়া কাহানচিল অয়া মানকুমার সাকেই কুটুম বার
 সমাজর হবাবালাতা খালকরেকুরার পাংলাক চেইল।

দফাই দফাই বৈঠক অনির পিসেদে পূর্ণিমারে হাবির মুঙে ডাহিয়া আংকরানি
 লেপকরলা। পূর্ণিমা সভাহানাত আয়া জানেইলহা গোপালরকা কর্ম করতে তেইরতা
 আপত্তি থাইলেরগায়ৌ সমাজর রীতি-নীতি য়াকরিয়াতে নাগৈ, দশগর ইচ্ছার সম্মান
 জানেয়া কর্ম করানিহান য়াকরল। কিন্তুমান কর্মর লগে তেইর সিন্দূর ফোটাগর সম্পর্ক
 নেয় বুলিয়া তেই সিন্দূরর ফোটাগ মিটানি নাকরল। উদরপছীয়ে তেইর দাবীহান য়াকরিয়া
 কর্মহান করানিত লেপইলা। গুলিপ্পারা মানু তানুর চিন্তাধারার বেড়াজালেত্ত নিকুলিয়া
 আহানি নুয়ারিয়া গোপালর কর্মহানাত যৌবনি নাকরলা। তানুর প্রশ্নহান অইলতাই —

“তেই য়ারি জেলেইর বেশহান নালইলেতে কারকাতে কর্ম এহান ?”

মানকুমার বার হুনাঙ্গী পূর্ণিমার আশা এহানর গজে ইঙপানি ডালানি নামনেয়া সমাজরাং সাজরাং অয়া হুমাতিয়া লাংকরলা কর্ম এহানাত হাবিরে যৌরদেনিরকা হেইচা করলা।

সাবিত্রীয়ে সত্যবানরে জিঙতা করিয়া আনেসিলীগা, বেহুলায়ৌ লক্ষ্মীন্দররে জিঙতা করিয়া আনেসিলীগা। মরেসে আগরে জিঙতা করিয়া আনানিহানতে অসম্ভব কামহান। পূর্ণিমারতাতে অমাটিক হিন কামহান নাগে। তেইর বিশ্বাস হানর গজে ভরিহান দিয়া হুদা বাসেয়া থানিহান। তেইর লেইপাকে থাইলে থাইতেও পারে। লেইপাকহান থিয়সেগ হাবিয়ে হারপাসি। হেয়কর আশাল বহিয়া থাইতে থাইতে যৌবনহান লালয়া গেলগাহান হাবিয়ে দেখতারা। অমাটিক দুঃখিনী এগই হুদা আত্মবিশ্বাস চুটি আহানি কলকরিয়া ধরিয়া জিঙতা অয়া আসে। এগরাংত উহানিও কারলয়া নেনি নামনেইলা সমাজে। তেইর দুঃখ বার যুক্তি উহানর বারাদে চেয়া সমাজর রীতিনীতি উতারে খুবাগ করে দেখলা মানু উতাহাবি পূর্ণিমার য়ারিহান য়াকরিয়া মানকুমারে গোপালরকা লাংকরেসে কর্মহানাত আয়া যৌরইলাহা।

কর্মহানাত না যৌরইলা বারা উহানর মানুরে পূর্ণিমায় প্রশ্ন আহান করল, “হিন্দু শাস্ত্র ও পরম্পরা ইলয়া হাবিয়ে য়াকরিয়া চলিয়া আহেসে রীতিহান — বেয়াপা আগর নিরালহানর বার হেদিগর সিন্দুরর ফুটাগ মিটানি পারেরতা হুদা তেইর মৃত হেয়কর জাঙর বড়ি আঙুলিগ। সিন্দুরর ফোটা এগ মি কি অধিকারল মিটেইতৌতা ? মি এবাকাও মোর গিরক দৌ অসে বুলিয়া হার নাপাসু। যদি তা আলয়া আইলেতে কিতা করতারাই?”

এহানর জুরাপহান কারাঙৌ নেই। গোপালর কর্মহান হবা অয়া গেলগা। হাবি রীতি-নীতি ইলয়া গোপালর আত্মাগরে গোলোকধাম ফৌকরানির সিজিল করলা।

পূর্ণিমা খালকরতে খালকরতে কৌহাঙগ অইলী। বেয়াপাগ অয়া তেইর জীবনর আঁৰেপা নময়হানি লাখলে মাঙয়া গেলগা। এহানেই তেইর লেইপাকে ইকরা আসিলহান পাউরি। অয়াউ আশার নৌগ বুরিয়া ঔনা নেই। নিরালহানাত সিন্দুরর ফুটাগ ডাকডাকেয়া দিয়া হেয়ক আলয়া আইতে উহান দেহানির খৌরাংল পথেদে চেয়া থাইরী।

* * *

দুই নম্বর পুলহান পেয়া

প্রতাপগড়র মুণ্ডমালা পহরিগর কাদাবারাদে লামচিকে, ভূত-প্রেতে কিল কিল করলা হাকতাক আহনাৎ। আহৌ আটগন্ত নিয়াম মানুর মুর তুপকরিয়া ফুলডাল পারা করে কৈকরিয়া থয়া উতার হমবুকেস্ত মাটি ছেদেয়া পহরিগ করিয়া মাটি উতাল মুরউতা গুরতেগা পারগি থককরেসিলা বুলিয়া ইতিহাসে মাতের।

তুপকরা মুর উতার কুনগ আহি পাকদিয়া, কুনগ জু কামারেয়া মাটির তলে গারিয়া আসিলা। উতার দুঃখ, অব্যক্ত জ্বালা যন্ত্রণারকা তানুর ঠৈ উতা প্রেতাঝা অলয়া প্রতিশোধর খৌরাঙল থা থাইবা উহান বিশ্বাস না করিলহান নাগৈ। ঔ প্রেতাঝা উতাই সিনা পেয়া আরো কতি মানু মারেসিলা ঔতাউ প্রেতাঝা অলয়া বুলতারা। এতা হাবি তিলয়া মুণ্ডমালা এলাকা এগ লামচিকর, প্রেতাঝার হেড কোয়ার্টারগ অলসিল ঔ হাকতাকে।

দিনে, মাদানে, বেলিটিকে পেয়াউ ঔ ফামেদে মানু সিনা অয়া নাগেলাগা। গাটামি করেসিলাগা উতা আনাংশা পাসিলা।

ভূত-প্রেত, লামচিক এতারতাউ যারযির লেপকরা এলাকা থার। ঔ লেপকরা এলাকা লালয়া যানি তানু নুরারতারা। মুণ্ডমালার প্রেতাঝা এতারতাউ এলাকা লেপয়া আসিল। পাথারকান্দির বাজারেদেস্ত মোটর সড়কগ অয়া আটানি অকরলে মুণ্ডমালার স্কুলগ ফৌবনির আগে হুরু পুল আহান আসে। উহানরে এক নম্বর পুলহান ধরিয়া যিতেগা থাইলে অঙেইগাঙ ফৌবনির আগে আরাক পুল আহান পেয়ার উহানরে দুই নম্বর পুলহান মাস্তারা। এ দ্বিয় পুলর হাদির এলাকা এগৈ মুণ্ডমালার লামচিকর, ভূতপ্রেতর এলাকাগ।

এ এলাকার হাদিৎ মুণ্ডমালার পহরিগ বার মুণ্ডমালার স্কুলগ লামলাকাহানাৎ আসে। দৌবালা পহরিগর পারেদে, মোটর সড়কগর দ্বিয় বারাদে কেৰা বনশৌ থায়া ফাম উহান ডরপেইল মাচাকহান অসে।

এতা য়ারি হাবিগৈ য়াকরলেউ পাঞ্জালি গাঙর বলাই মিএগই রঞ্জ আগৌ নাকরল। বলাই মিএগ নিয়াম পাংকালপা গাররাপুৰাগ আসিল। দৌ-দুকর লাছলা য়ারি এতা তা নাগসল। হুদা তার পামপলর বলিহানর গজে বিশ্বাস থইল। গাররাপুৰা কালে লাঠিগল নিকুললে আক্খুলাগৈ দশ বারগ মানু এষ্বেগ করিয়া বেলানি পারেসিল।

সেন্দাহান অইবতাই বাজারুলিরে মুণ্ডমালার ভূত-প্রেতে থেংকরিয়া হিনকরলা বুলিয়া হুনিয়া আহিলথাঙৌ তা নিজে কুনদিন উনাউনি নাসে। ডরভয় নেয়য়া রাতি ডিলয়া বুললথাঙৌ তিড়াসপার দৌ, লেরিরপারর দৌ, মজারখানার দৌ, ডঙরগর হেইকিরিজারর দৌ তা নাংনাসে কুনোদিনৌ। উহানেতে দৌ-দুকর, ভূত-প্রেতর য়ারি এতা তা ডরুয়া

মানুর মনর কল্পনা বার গড়েইপা য়ারি বুলিয়া নিংকরল ।

মুণ্ডমালার কাদাবারাদে মানুর গর নেয়সিল । উদুম দুৰা ফামহান । পছরিগর পারেদে বার সড়কগর বারাদে ছরু ছরু কেবাবন । উতার ভিতরে হিয়াল, খাংমেকুর থায়া মানুরে সিনা পেইলে তালকরলা । এতা কিতারকা ফাম এহানাং এম্নৌ ডরপেইল পরিবেশ আহান আসিল এহান বলাই মিএগই য়াকরলেউ তা নিজে নাংনাইল থাংতে মানুরাংত হুনিয়া এতা উনা অনির খৌরাঙ আহানল থাইল ।

সমেয় কাল কারেউ বাসেয়া নাথার । দিন গেলগা মাহি মুণ্ডমালার পছরিগর কাদাবারার দৌ-দুক নেয়নি অকরলা । কালর হুতে হাবিতা বাছরেয়া নিলগা । বলাই মিএগউ বয়সহান আলঠা অইল, বিয়া করিয়া সৌ-জিপুত ডাঙর অইলা ।

লামপালহান লালয়া বরণ পড়ানি অকরল । লাঙ্গল পূজা করিয়া মানু বি বাঙ্গানি অকরলা । ক্ষেতি অকরানিরকা বলাই মিএগরতা আলর মইষ আগ লনির দরকার পড়িল । আলর মইষ, লাঙ্গল, উকেই, পারন, ফেলন কিতা হাবি আছিমগঞ্জর ঠাংচার বাজারে গিয়া লইলাগা । বলাই মিএগ ঠাংচার দিন আহান মাদানে আছিমগঞ্জর বাজারে মইষ আগ লনিরকা গেলগা ।

দেশী, বাঙ্গর, দুনসলা মইষ বাছতে বাছতে বলাই মিএগ দালালর আতে পড়ে পড়িলগা । দালালর আতে পড়িয়া বাজারহান বুলতে বুলতে মইষ লনিউ নায়া লাছলে সমেয়হান খেদিয়া থেপাং থেতয়া সেন্দাহান গিয়া পড়েসেগাহান বলাই মিএগই হারনাপাসে । বাজারহান লময়া দুকানদার বার আটানিং থেঙসি । বাজারুলি হাবি গিয়া হদাসিগা । লাস্ট-ট্রিপর বাসহান গিয়া পড়েসেগা তা থকয়া বলাই মিএগ আকখুলাগৈ আটিয়া গরে আলনিং পড়িল । দালাল উতারে ঠারা ঠারা দুকানদার কুনগ লগ পেইলেতেক বুলিয়া বিসারানি অকরল ।

হজক-সুন্ তুকতার বেপারী রসেন্দ্র দাসর গর পাথারকান্দিত । হাবি বাজারে তা দুকান বহেইলগা । ঔ দিন আছিমগঞ্জে ঠাংচার বাজারহান লমকরিয়া দুকানগ আটেয়া নাগাবান্তিগ উবুরি করিয়া ডুফাগ তিঙেয়া, জ্বিগ লাগেয়া বাংহানল বারহানি বারকরিয়া আটানি অকরতেই বলাই মিএগই দেহিয়া আংকরল, “রসেন্দ্র একলা নি বা ?”

— অয় একলা ।

— তাইলে চল, দুইজনে গপ করি করি যাইমু ।

দ্বিয়গিয়ে য়ারি দিয়া দিয়া গরেদে আলনি অকরলা । নেশনেল হাইবের পিচকরা পথগ । রসেন্দ্রই বেপারর য়ারি দের, বলাই মিএগই ক্ষেতির ।

বাজারে হজক-সুন্-তুকতা বেসতারা এতার ঔনাহান — হজক আককারি লাগেয়া টাক সলকরে সলকরে পিয়া বইতারা। হজক লকুরা উতা আয়া আকেইচুম দিয়া হজকখানি লয়া নিতারাগা এহানরে এডভারটাইজহানৌ মাতানি যাকরের। উহানেতে বয়সহান কমইলেউ রসেন্দ্ররতা হজক পিনিহান ঠকহান অসে। দুকানগ আটেয়া আইতে লাগাসে হজক উকারি পিয়া পিয়া য়ারি দিয়া আইতে আইতে কুংবাকা পাথারকান্দির উত্তর রেলগেইটাহন ফৌরসিহাহান হার নাপাসি।

রসেন্দ্র গর ফৌরইলহা। বলাই আকখুলাগৈ মুণ্ডমালাগ ফারি দিয়া যানিৎ পড়িল তা থকয়া খালকরাৎ পড়িল। বুড়া অইল থাংতে এবাকা খানি ডরৌ পার।

থাচির রাতিহান, বারহান ঠাংচা। ঠাংচাই থাচিয়ে তিলসে রাতিহান। বরণহান নাপরলেউ মেঘালা অসে, মেরাকে দৌ জিলকার। গুর গুর করিয়া হাগহান বরি অয়া আহের। লিরি লিরি বৌ আহানে বরণহানর পৌহান দেনি মনার। হাগহান হাঞ্জেয়া আনের অংতা উহানে ডর ডর ভাব আহান হুয়া আহের। ঔ ডর ডর ভাব উহান আরাকৌ কাহাঞ্চিল অর মুণ্ডমালা এলাকাগ নিংশিং অইলে।

রসেন্দ্রই খালকরের রাতিহানৌ বাক্কা ডিলেল — ঠাংচাই থাচিয়ে তিলসে এহানাৎ যে মেঘালা দৌ জিলকানির পরিবেশ আহান হাঞ্জেসে এহানাৎ আকখুলাগ বলাই মিঞা যানিৎ পড়িল থাংতে শৈনায়া হেবানিয়া উতা উনা অইতৈগা। ডরপা পড়লেগা ধরিয়া মারে বেলতাই তারে। এসাদে দিন এহানাৎ বুড়া এগরে আকখুলাগরে যানি দেনি থক নেই নিংকরিয়া মাতল, — “চাচা, রাইত দিরং অইগেছে, আমরার ঘরে থাক — কইল যাইবাই।”

কিয়াকা নাযিগা বুলের উহানতে রসেন্দ্রই নামাতের। নামাতিয়াউ বলাই মিঞাই হারপার। মাদানে বাজারে আহেসেগ, আলয়া নাগেলেগা গরে হাবিয়ে খালকরিয়া থাইতাই তা থকয়া বলাই মিঞাই রসেন্দ্রর প্রস্তাবহান থনি নুরারিয়া মাতল, “আমার লাগি চিন্তা করিয় না, আমার কুনতা অইত নাই। ঘরে না গেলে নেনার মা, ছাৰাল হাবুগুলি চিন্তা করিয়া রইবা নু।”

বলাই মিঞারে আটকা নুরারিয়া গরেন্ড ডাঙর উপারি আগ বুজে হজক আককারি লাগেয়া টিকি নিয়ামকরে দিয়া লাগেয়া, আরি আগৎ পানি বুজিয়া আসুলহানর লগে জবরক রহিব উসাদে করেদিয়া ধুমা নিকালেয়া বলাইরাং দিয়া রসেন্দ্রই মাতল “চাচা জোরে জোরে টানিয়া তামাক খায়া খায়া যাও, আগুন অণ্ড যতসময় তোমার আতে থাকব কেউ তোমারে ছইতে পারত নাই। কুনগুরে চাইলেউ আততনে আগুন ছাড়িয় না। যাও ঠাকুরে তোমারে রক্ষা করউক।”

মুণ্ডমালাগ ফারি দিয়া আজিকার ঠাংচাই খাচিয়ে তিলসে মেঘালা রাতি এহানাং
বলাই মিঞা আকখুলাগৈ গর তালকরে সালসে। লগগ ছন্দা মনর সাহসহান বার হজকারি।

পাথারকান্দির দুকানপাঠ বেলেয়া উদুমদুবা লপুকগৎ নিকুলিলহা। মুণ্ডহানাং
এক নম্বর পুলহান। মানু-গুরু, পাহিয়া পলির সাড়া শব্দ নেই — ইঞ্চিক চিকসে।

কুমাছালি আধারহান। মেরাক মেরাকে দৌ জিলকার উহান গজেত্ত ফটো তুলতারা
পারা। লিরি লিরি বৌ আহান উদুমদুবা লপুকগৎ বাধা নাপেয়া লেচচং দিয়া যিতেগা
বলাই মিঞার কানহানিৎ বিপদর সংকেতহান দিয়া যারগা। বলাই মিঞার গারিগ রমকাটা
বারি দেব।

বলাই মিঞার গাটটামিহান বয়সর লগে লগে টুময়া গেসেগা — পাংকালহানৌ
আগেকার ডেকি নাগৈ — আসেতা ছন্দা গুর্দাগ। যে গুর্দাগরকা আজিকার পরিবেশ
এহানাটৌ তা ডরহানরে কাদা আগদে বেলেয়া কর্তব্যর খাতিরে ঠৈগ তালুহানাং দিয়া
গরে আলনিৎ লেপসে।

উপারিগর জিগর গজে ভরসা করিয়া হজকারি পিয়া পিয়া ধুমাল গঙালেয়া
কয়লার ইঞ্জিনগর ডেকি — কাকেইহান ডিগল করিয়া সালসে। হজকারি আসুলানির
হেরে হেরেদে ডরহান বাগানিরকা এলা এহান আচচুলে দেব —

খাটল পাতা দিয়া,

বইরা এগু বানায়া ;

গাঙপার আইলাম

তার লেসুর ধরিয়া।

এক নম্বর পুলহান লালৈল। মনে মনে দৌ নিংকরল “আল্লা দুয়া করিয়”।
এলাহান আরাকৌ আচচুলে অকরল।

বাতেদে বিলগর কেবাসপান্ত হিয়াল দুগ আগর রৌ ছনিয়া এলাহান এরিল।
টেইপাং জন্তুর রৌ দুহান আহানে খানি সাহসহান আহিল।

স্কুলগর সিদাহান লালৈতেই পিঠিয়েদেত্ত মানু আগ — লগ ধরানির সুরাকহান
পেইল। ফামহানে, দণ্ডহানে গমনাসে হারপেয়া, পিঠিয়েদে বুলন নাদিয়া ইজ্জু মুঙেদে
ডিগল কাকেই কারানিৎ থাইল।

নিকুলিল উগ কাদাং চেপয়া বলাই মিঞারে আংকরানি অকরল, “চাচা, কইত্তনে
আরাই?” বলাই মিঞার গারিগ তপ্তা অইল, নিংশা হান কেঙইল, গাম শৌরনি অকরল।

ডরনাপেইল সটহান দিয়া থুরথুরেই কাপা নারগল দেসিল এলা উহান সেংকরে
অকরল —

খা-ট-ল পা-তা দি-য়া

তেৎনায়া হজকারিয়ৌ পিয়ের জিগ নিবে পড়বগাসাং বুলিয়া।

সেংকরে উগৈ ডাকল, “চাচা, মাতরাই না কিতা বা — গুসা করছনি?”

কিন্তাউ না টটরেয়া বলাই মিঞা কু-র কু-র হজকারি আসুলিয়া শলাকা কর কাকেই
দিয়া যারগা কুনরকম দুই নম্বর পুলহান লালপড়লেগাতেক বুলিয়া।

লগ ধরেসে উগৈ এখুরুমতে হজকারি আকচুম দেনি মনেয়া মাতল, “চাচা,
তামাক খাইতাম, চিলিম অণ্ড লামাই দেউ!”

কামহানশা নাকরিয়া বলাই মিঞা কাকেইহান আরাকৌ ত্বরা করল। জারে নুরারিয়া
লগ ধরেসে উগৈ নারগ ডাঙর করল, “তামাক খাইতাম কইতে হন নানি — চিলিম অণ্ড
লামাই দেউ না!”

বলাই মিঞাউ কাঙ্গিহান সলিল। নারগ নিকালল “আমি চিলিম কেনে নামাই
দিমু, খাইবার অইলে টানিয়া লয়া খাও!”

প্রেতায়াগৈ কুরাং জিগ সকপারতৈতা। ডর দেহুরেয়া উপারিগর জিগ তারাংত
খেইকরে পারলেতে তা মনাসে উহান করে পারেরতা। উহানে মেইথি অইল, “চিলিম
অণ্ড লামাই আগলা থৈ দেও।”

জিগ সকনি নুরারিয়া লামেয়া থনিরকা মাতানিয়ে বলাই মিঞাই হরপেইল লগ
ধরেসে এগ হেবানিয়া উতা। ডরহান জবর অইলেউ জুরাপ দিল “খাইবার অইলে
টানিয়া লয়া খাও!”

ভুতে মানুরে তুলাতুলি টটরানিহান। বলাই মিঞার মনহান জিগং, থতাহানাং
আকহান কথা, খাইবার অইলে টানিয়া লয়া খাও’ — আহিথম দুই নম্বর পুলহানাদে।

বলাই মিঞারাংত জিগ খেইকরানিরকা কৌশলগমাহি করের ভূত উগৈ —
থাকাং দিয়াউ চার, নায়া ডরৌ দেহুরার “চাচা আইজ যদি চিলিম অণ্ড না লামাইদেউ
তাইলে তোমার কল্লা মলিদিমু।” ভূত উগর আকেই ধমকাং দিন গুজুরের পারা। বলাই
মিঞা ডরহানে বেসেপ অযারগা — বরণ নাদিয়াউ ফুতিফালি গামে চিচুপাগ অইল,
খৌনুগ হকিল। হজকারি পিনিহানতে না এরের।

দিনহানর গতিহান আরাকৌ শাক্তি অইল, বৌহানৌ জবর অইল, দৌ

জিলকানিহানৌ জিরন নেয়ইল, বরণহান পড়িং পড়িং বুলের। দৌ জিলকানির হেরেদে তেরাদে চেয়া বলায়ে দেখল লগ ধরেসে ভূত উগ বিভৎস, বিকট অসে। উগরে দেহিয়া বলাই মিঞা আরাকৌ ডরপেইল। উগর তুল লাংলা করতে করতে দুই নম্বর পুলহান বিত্তা অইলাগা।

লেহাযুগা নেই বলিপাংকালপা মানুরে এসাদে সিনা পেয়া মারেসে মুণ্ডমালার এ রক্ষী এগৈ আজিকার সুযোগ এহানাং মামুলি বুড়া বাঙ্গাল এগরে শকনি পেয়া নুরারিয়া কাছিহানে দিল চিকারি উগ বলাই মিঞারে বেমতাল লাগা বেলল। লগে লগে বাতেদেস্ত আরাক আগ নিকুলিয়া ডিগল অইলমাহি অয়া বুড়া এগরে দ্বিয়গদেস্ত ডর দেখুয়েয়া উপারিগর জ্বিগ বেলুরানির হন্না অকরলা।

নিজর আহিল এসাদে ভয়ংকর পরিস্থিতি এহান দেহিয়া বলাই মিঞার হুসহান নেয়নি অকরল। অয়াউ হেকঠেলাহানল কাকেইহান না জিরার — হজকারি আসুলানিহান না জিরার — তার গারিগ এবাকা মেসিনহান পারা অইল। কাকেই কারিং বুলিয়া কারেরহান নাগৈ — আপপানে জাঙহানিয়ে পারাহান বেলার, অটদ্বিয়গিয়ে নিংশাহানে তিলয়া হজকারি পিতারা।

প্রকৃতি ইমাই ঠেক ঠেক করে আমিয়েয়া মুক্‌সি দিয়া, নার সেংকরিয়া আজিকার কুমেই এহান চেইরি — প্রেতাঙ্কার বার টেইপাং মানুর সিংনাহান।

আরাক দৌ জিলকা আহানাং বলাই মিঞাই দুই নম্বর পুলহান ছদ্দা কতবেং দূরেইত দেখল। মনহানাং নুরা পাংকাল আহান পেইল — ‘যেতাউ অক সীমানাগ পেইলুহা।’

তানুর এলাকাগ লমরহান হারপেয়া ছেয়া দৌ উতা বীভৎস চেহারা পালৈলা — আরাকৌ চাপ সৃষ্টি করলা। মেণ্ডমকাহানাং মানু এগরে লমকরানি নুরারলে তানুরতা মরানির সমান। তানু বিকট শব্দ বার অঙ্গভঙ্গিল থেঙসি উবাকা আরাক কতগ নিকুলিয়া মুণ্ডেদেস্ত সড়কগর গজে কায়া বলাই মিঞারে থেৎকরে বেললা। উতারমা মেরাকগৈ নানান বিনান রূপ ধরতারা বার বলাই মিঞার জাঙহানির হাদিয়েদে লিতনির হন্না করতারা কিন্তু মান মুদাগ তালকরে লামেয়া লুঙ্গিহান পিদেসে থাংতে নুরারতারা।

এতা দেহিয়া বলাইর গারিগং আর শক্তি নেয়ইল। ইচুসমেয় রাজপথগং কানি নুরারিয়া আসিলা উতাই এবাকা রাজপথগর গজে কাইলা। হাবিয়ে তিলয়া অকরলা মেল উহানাং বলাই মিঞা হেইবি নাইবি দেনি অকরল। তপ্তা অসিল গারিগ ইঙনি অকরল, কানহানি ডিফেয়া আনল, আহিথম মাম-মাম করানি অকরল। “আজিতে

লমইলতাক' বুলিয়া মনে মনে 'আম্মা দুবা করিয়' বুলতেই হৌপনহান পারা করে
ছনল—

“ভাজি দ ভাজি ——— অ ভাজি”

জিপুতর নারগি চিনিয়া, আহিথম হিনপেয়া মেলিয়া চেইতে লেণ্টন আগল জিপুত
দ্বিয়গি আইতারাহান দেহিয়া পাংকালহান যেহানি আসিল উহানি এরাদিয়া ডাকদিল —

“ভাজিরে পাইতে অইলে জলদি আউ ”

বাপকর নারগ ছনিয়া বলাই মিঞার জিপুত দ্বিয়গি আকদাপে দুই নম্বর পুলহান
ফৌরইলাহা। লামচিক এগি কিত্তাউ জত্তাউ নেই পারা আকখুলা বুড়া বাঙ্গাল এগরে
তানুর এলাকাগৎ সিনা পেয়া কিত্তাউ করানি নুরারলা এ দুঃখ এহানে মাঙয়া গেলাগা।

দুই নম্বর পুলহানর গজ্জহান। নাটাই, মিঠাই দ্বিয়গি কাদাৎ চেপইতেই বাপক
বলাই মিঞা আহিগি পাকদিয়া, থতাহানাদে কলপুক শৌকরিয়া পাহাৎ অয়া ছেদাসি
কলাগাছজার অলয়া তানুর গজে বাছা অয়া পড়িল। আতহানাত্ত আরি উপারি, হজকারি
শিকদিয়া গিয়া পুলহানর কাদা আগদে পড়িয়া থাইলগা।

জিপুত দ্বিয়গিয়ে বাপকরে লেমপালে কাকরিয়া গরে আনলা। পীরগরে ডাহিয়া
জারেয়া রাতিহান ফুরানির সময়ে উহানাৎ বলাই মিঞারে আলকরলা। ছসহান আহিল
আরো কালি রাতিকার ঘটনা উহান নিংশিং অয়া বলাই মিঞা আহিগি বাছরা দিল।

~ * ~ * *

বৈতরণী লালৈতেগা

আপাবপার আমলেত্ত আমারতা বিশ্বাস আহান চলিয়া আহের — মানু দৌ অনির পিসেদে বৈতরণীহান লালনি লাগের। আগেকার গিরিগিথানীয়ে মানুগ নুৱাৱা অয়া আটইবতাই দান-দহিনা করলা, পারলা গিরিগিথানীয়ে দৌৱরাং গুরু আকেইগ কাতকরলা — ঔ গুরু উগর লেজগত ধরিয়া বৈতরণীহান লালনি পারবাতা বুলিয়া। আজিকালি নিয়ামপারা আমার মানু শহরবাসী অয়া থানিয়ে গুরু পালানি নুৱাৱলা বার গাঙে থায়াউ গুরু না পাল্লা থাংতে হাংকা দিনেত্ত চলিয়া আহের রীতি উহানাত্ত থানি দূরেই অনি অকরলা। অয়া-অয়াউ বৈতরণীহান লালনির বিশ্বাস এহানতে এবাকাউ না বুলানি নুৱাৱিয়ার। বৈতরণীহান লালৈতে খেৱাল লালনির য়ারি আহানৌ হুনেসি। উহানে মানু নুৱাৱা অয়া আট্টেলে বার সাধুহান হমেইলে আতহানাং খেৱার পইসা আহান দিয়া দেনির চল আহানৌ আসিল। কিন্তুমান বৈতরণী খেৱাল লালনিত্ত গুরুর লেজগৎ ধরিয়া লালনি উহানেই নিয়াম ঠিকহান বুলিয়া হাবিয়ে নিংকরতারা।

গজে মাতলাং কারণ উতারকা গুরু পালানি কমইলা থাংতে — গুরুও না পালিয়া বৈতরণীহান লালৈতেগা গুরু আকেইগৌ পানি, এহানর সাম পথ আগ পানির উপায় আহান খালকরতে খালকরতে আমার জাতর নেতা কতগ বৈকুণ্ঠধাম ফৌৱইলাগা। ভগবান শ্রীকৃষ্ণই তানুরে ঙ্ককরিয়া বহুৱেয়া বৈকুণ্ঠধাম ফৌৱনির কারণহান আংকরল। নেতা এগিয়ে মাতলা — “প্রভু! তিতে অন্তর্যামীগ, হাবিতাউ হারপারগ, তেব মাতিয়ারতা। আমার মানু এতা বিপদ আহানাত পড়িয়া থাইলাং থাংতে উহানাত্ত নিকুলিল উপায় আহান বিসারেয়া প্রভুৱাং আইলাংতা।”

প্রভুরে আংকরল — কি বিপদহান থাং ?

নেতা এগিয়ে মাতলা, “প্রভু আমার মানু এতা বৈতরণীহান লালৈতেগা গুরুর লেজগৎ ধরিয়া লালইতারা। আজিকালি আমার মানু শহরবাসী অনিয়ে গুরু পালানির সুবিধা নেয়ইল, বার গাঙে থায়াউ আধুনিকতাহানে জাপদিয়া গুরু পালানি নুৱাৱলাং থাংতে বৈতরণীহান কিসাদে লালনি উহান উপনায়া থাইলাং। বাজারেত্ত গুরু আকেইগ লয়া কাম চলেইবাংতাউ হাপ্তাত আকদিন গুরুর বাজার বহের, উতাউ বরণ পড়ানি অকরলে। বাজার নেই দিন উতাত মানু দৌ অপড়লেগা হাপ্তাহান সুরয়া বাজার-কায়া গুরু লয়া আনতে আনতে বৈতরণীৰ পারগত বহিয়া বাসেয়া ডিল পরলেগা যমলোকে নিয়াম লাংলা অইতাইগা। চিত্রগুপ্ত ডাঙরিয়া গিরকে বেক্‌ডেইটে কেইস না'লর বুলিয়া হুনেসি। এসাদে অইলেতে আমার গতিহান কিহান?”

প্রভুরে হারপেইল, সমস্যাহান নিয়াম জটিল অসে। অন্তর্যামীগ থকয়া তানু কিহান মনেয়া আহেসিহান হারপেইল, অয়াউ হারনাপেইল সটহান দিয়া আংকরল, — “মরাংত কিহান পাংলাক পানি মনারাই উহান ফংকরিয়া মাতলেতে মি কিহানি পাংকরে পারিমতা খালকরিয়া চেইতুনাই।

নেতা এগিয়ে ফংকরিয়া মাতানি অকরলা, — হাই, প্রভু! আমি মনাসিতা গুরু কতগ প্রভুরাংত পানি। প্রভুরে গুরু উগি বৈরতরনীহানর পারগত সিজিল আহান করিয়া থদিলে যেবাকা লাগতৈ উবাকা পেইতাঙাই। উহান অইলে আমারতা গুরু পালানিয়ৌ না লাগিল, লনিউ না লাগিল।

মানু এগির লৌশিং এহান দেহিয়া প্রভুরে মুক্সি মুক্সি দিয়া অন্তরে অন্তরে মাতের, — ‘মানু এতা কতিরৌ আটেলপাতা অইলাতা, নিজর কর্তব্যহানিয়ৌ নাকরিয়া মানুর খকে চড়িয়া লিতনি মনেইতার।’

কিন্তুমান কিহানতে করত প্রভুরে! সংসার এহানর পালনকর্তাগ অইল থাংতে হাবির বারাদেউ চানি লাগতেনাই। মানু এতারে পাংকরানি মনেয়া মাতল, — চেই, গুরুগিতে মি দেনি পারতৌ, কিন্তুমান এতা রাহেকুরা মি দেনি নুঝারতৌ। তোমারতা হাচুরিয়া আজিকালি এপেইতৌ গুরু রাহানি উঠিল। কলে বাধিয়া সাপ্লায়াররাংত বার লয়া খরেয়া পালিয়ার। কনাকে করেসিলাংহান থকয়া উহানর স্মৃতিহান পারা করিয়া এবাকাউ চলেয়া যিয়ারগাতা। দিতৌ এতারে খরেয়া পিউরেয়া পালানির ভারহান তুমি নেনি লাগতৈ।

নেতা এগিয়ে আগর লগে আগৈ কানাকানি করিয়া হদেয়া মাত্লাম — প্রভু! আমারতাতে নিজরতাউ থাইবাং লাম নেই থাংতে বৈতরনীর পারে গুরু থনির ফামতে কুরাং পেইতাঙাইতা? বার লেইরাপা সমাজহান, এতাহাবি গুরুরে কিসাদে খরানি পিউরানি পারতাঙাইতা?

— মিতে অকরতেই মাতলুগ, গুরুগি দিতৌ, বাকী উতা তুমারতা।

— উহান অইলেতে এহানর ভারহান প্রভুরে দয়া করিয়া যমরাজারাং দিয়া দিলেতে হবা অইবতা।

প্রভু হারপেয়াউ হারনাপেইলগ অলয়া আংকরল, — নিজর লাম নেই থাংতে কুরাংতে থারাই?

— মানুর লামে।

নিয়াম আংকরলে নিজর গজে পড়ে পড়তৈগা বুলিয়া প্রভুরে যমরাজারে ডাহিয়া মানু এতার য়ারিহান দিয়া তানুরকা গুরুগির সিজিল আহান করেদেনির হেইচা করল।

যমরাজা মুরগ নঙেয়া খানি খালকরিয়া মাত্ৰ — “প্রভু! কামহানতে তানুরহান থাংতে প্রভুরে দিতেই গুরু এগি থনির বার পালানির দায়িত্বহানৌ তানুরহান। প্রভুরে মাত্ৰে থাংতে বার তানুরতা থাইবা লাম নেই বুল্‌লা থাংতে এবাকারকা গুরু এগি থনির ফামহান মি সিজিল করেদিতৌ বার খরানি-পিউরানির ভারহান তানুরাং থাক। প্রভুরে গুরুগি দিতেই। মি থনির ফাম দিতৌ। খরানি-পালানি উহানতে তানু করকা, কিয়াকা বুল্‌লেতে ফল পানির সালেদে তানুরতাউ কাম খানি করানি থকর। আমারতাউ নিয়ম খানি আসে নাই। কিন্তু উ না করলেতে কিতার ফল পেইতাইতা।

নেতা এগিয়ে খালকরলা, যমরাজায় মাতের এহান হইহান। এহানেদে না ইলৈলে চিত্রগুপ্তর খাতাহানাং পুণ্যর নম্বর কমাতিয়া উতাল পিসেদে তাক্করতাই। উহানে আর যারি ডিগল না করিয়া যেহানি পেইলা উহানিয়ৌ অইল্‌গা বুলিয়া যাকরলা। বৈঠকহানাং লেপকরলা — প্রভুরে গুরু আহৌগ দিতে, যমরাজায় বৈতরণীর পারগত কল আগ হংকরিয়া গুরুউগি থদেনির সিজিল করেদিতৈ, গুরু উগিরে খরানি-পালানির সিজিলহান আমার নেতা এগিয়ে করতাই। প্রভুরে গুরুগিয়ে খেইতাই বার মাতেদিল — চাক্কিমিলর গুড়া, রাইসমিলর কুড়া, উতার লগে মদুর খানি খানি, কঙালা ঘাস বার আর আরতা। কলগ হবা দিন আহান চেয়া সাংকা করিয়া গুরুগি থনি অকরানি। তিন মাহ ফাইলে প্রভুরে যমরাজায় তিলয়া কলউগং মিল্‌লেং আহান দিতাই — গুরুগি কিমে কিসাদে অয়া থাইলা চেইতাই।

এগদে নেতা এগিয়ে ঘরে আয়া হাবিরে ডাহিয়া যারি এহান বাগেইলা। যারিহান হুনিয়া বৈঠকে না যৌরসিলা নেতা কতগৈ যারৌ করিয়া মাত্ৰা। — আহৌগ গুরুর খানির বার যোগাড় করানি এহান সাদের কামহান? কিয়াকা গসিয়া আইলাইতা? আমি এহান নাকরিয়ার। আমি সেংকরে বৈঠকে বইতাঙইগা।

এতা বুলিয়া তানু নুঙেই নাপেয়া বেলেয়া গেলাগা। আরাক কতগৈ বার মাত্ৰা, করিয়া আহেস এহানতে চুমহান, কিন্তুমান ধন-পয়সা এতাহাবি পুলকরানি এহানৌ কমহানতে নাগৈ।

এসাদে করিয়া নিজর নিজরমা খানি কেরেন্না-কেরেন্নি অইল। যেতাউ অক, মেজরিটির মতামত নিয়া এহান লেপইল যে, নিজর মানুর ভিতরেত্ত কুন আগৈ বার এতা সাপ্লাই করতৈ, হিসাব থইতৈ। কমিটি আহান হংকরিয়া গরে গরে চাঁদা তুলানি লেপইল।

হৌগদে নুঙেই নাপেয়া গেলাগা হেবানিয়া কতগ বার বৈঠক করানির নিঙে প্রভুরাং গেলাগা। প্রভুর তুল দেহা করিয়া তানুর খৌরাংহান বাগেইলা আর প্রভুরে ইজ্জুমক মাতেদিল, — “মি জনে-জনে বৈঠক করানি নুবারতৌ। হাবিদ হবারকা বুলিয়া আগে

আহেসিলা তোমার নেতা উতার তুল বহিয়া যেহান লেপকরলাং উহানর লরন-চরন নাইতে। তানুর তুল তিলেগা যেইগা।”

হেবানিয়া এগি মুর নঙেয়া আলথক অয়া আইলা। আয়াউ সাপ্লাইর দায়িত্ব উহান পানিরকা দাপদা-ফালদি অকরলাহা। লেপকরা ফামে যমরাজায় চেইলমাটিক গুরুকল আগ হংকরেদিল। থাচিয়ে ঠাংচায় তিলসে পিনপিনি বরণ দের দিন আহানাত, রাতি নঙেইত প্রভুরে দিল গুরুউগি আনিয়া কলগ সাক্ষা করিয়া বরেইলা। বার্তন পেয়া মহাদেব গিরক মিকুপ আহানরকা আয়া সাংকাহানাত যৌরয়া গেলগা। মহাদেব গিরক যৌরনির নিঙে সিদ্ধির ঠৌরাং করেসিল আমার সাপ্লায়ার গিরকে। তাউ নুরা ব্যবসাত লামেরগ থকয়া সিদ্ধি আসুল দুহান আহান দিয়া পইলা দিনকারকা নেসেগা বার উতা গুরুগিরে খরেয়া গরে আইতে আইতে রাতিহান ফুরেইল।

এসাদে করিয়া জাত এহান হেরেদে লিতয়া যানির পথ আগ পেইলা। সাপ্লায়ারগরাং গুরুগি খরানির ভারহান দিয়া, হিনপেয়া দুখপেয়া ধন-পয়সা থানি মানি চাঁদা তুলিয়া তারাং কাংকরিয়া চলেয়া যানির সিজিল আহান করলা। এগৈ ঠিকমত করের না নাকরের এহান তালাবি করানির মানুরৌ নেই।

তিনমাহা পিসেদে যমরাজায় গুরু-কলগ বার গুরুগিরে মিল্লেং আহান করানির কথা থাইলেউ মাহুহান সুবইতে না সুবইতে নারদরাংত জরুরী পৌহান পেয়া প্রভু বৈকুণ্ঠ বৈতরণীর পারগত আয়া ফৌরইলহা। গুরুউগি অসি অংতা উহান দেহিয়া প্রভু নুঙেই নানিহানে নিরালহান ঠিপকরল। নারদেরল যমরাজারে বার আমার নেতা এগিরে ত্বরাকরে আনিরকা পৌ দিয়াপেঠেইল। হাবিহান আয়া ফৌরইলাহা আর প্রভু নিয়াম নুঙেই নাপেয়া নেতা এগিরে গুজুরানি অকরল, — “হাবিতা পাংকরেদিলাং আর হুদা গুরু এগিরে খরানিয়ৌ নুরারলাইতা? অমাটিক আটেল পেইলেতে কিসাদে টেইপাং মানু অয়া জিংতা অয়া গাইতারাইতা! চেইতা, গুরু এগির অংতা এহান চেই! টটরা নুরারতারা জন্তু বুলিয়া নাহরেয়া থস, এহান চুমতা! তুমি চারা আহান এল্করিয়া চেইতা, কিহান অরাইতা।”

নেতা এগিয়ে লগে নেসিগা সাপ্লায়ার উগরে দেহরেয়া মাতলা — প্রভু! এগরাং গুরুগি পালানির ভারহান দেসি থাংতে এগৈ কিহান করিয়া গুরুগির এসাদে হালংহান করেসেতা আংকরেদিক।

প্রভু তানুর যারিহান হুনিয়া চাম্ নায়া মাতল, — এতাপারা সমাজ এহানাত এতাহাবি মানু থাইতে হুদা আগরাং ভারহান দিয়া কুংগয়ৌ তালাবি নাকরিয়া থানি এহানতে মি নাকরলু। হাবিরতাউ দায়িত্ব বুলিয়া আহানতে থানি থকসিল।

উতা বুলিয়া প্রভুরে সাপ্লায়ার উগরে আংকরিয়া এহানর জুরাপহান ছনানি মনেইল। সাপ্লায়ার উগ আহাতুলিহানাং চিপেয়া নেসেগা ফাইল উগন্ত ভাউচার, বিল, কেশ্-মেমো বার আর আর কাগজপত্র দেহুরেয়া মাতানি অকরল, হাবিয়ে চেই, মি নিক্কা নিক্কা সময়মত হাবি বার সাপ্লাই দেসু। নিক্কা নিক্কাকার ভাউচার পুল্লাপ করে খমকরিয়া ফাইল করিয়া থসু। কুনদিন আহানৌ বাদ নাদেসু।

হাবিয়ে কাজগপত্র উতা চেয়া দেখতারা, মাতের উহান হাইহান। কাগজপত্র হাবি ঠিক আসে কুন গণ্ডগোল নেই। উতাইলেতে কিয়াকাতে গুরু এগি আড়-বারি দেসি? থকাল ভিতরেদে হমাসেগা, আহির-পটে চেমুটি যমসে, চেইল অংতাহান নাসে এহান হারপানি নুরারলা। নিয়াম হিনপেয়া, নিয়াম দুঃখপেয়া প্রভু দিব্যদৃষ্টিল চেয়া দেহের, সাপ্লায়ার এগৈ হাণ্ডাত আকদিন বার সাপ্লাই দিয়া বাকি দিন উতারতা ছদা কাগজপত্র পুলকরিয়া থ'গেসেগা। নিয়াম সরয়া আহিগি মেলিয়া চেইতে দেহেরতা সাপ্লায়ার উগ নেয়সে,—পলেয়া গেসেগা। বাকী থাইলা নেতা উতারে মাতল, তোমার হবারকা করতে নিজেই ঠিক নাইলাই থাংতে মোরতা করিলতা কিত্তাউ নেই। যেইগা নিজে আগে ঠিক অয়া আহগা।

এতা বুলিয়া প্রভু তা দেসে গুরু উগি আলথক নেনির যাথাং দিয়া অদৃশ্য অ'গেলগা। আমার নেতা এগি অক্‌নেইগি অলয়া এহান হপনহান, না টেইপাংহান উপনি নুরারিয়া আগরে আগৈ চেয়া থাইলা।

* * *

লেখক পরিচিতি



নিখিল বিষ্ণুপ্রিয়া মণিপুরী মহাসভার ‘বিশ্ব-সম্মেলন ২০০৩’ বার ৪২-তম অধিবেশনর স্মরণিকাহানি প্রভাস কান্তি সিংহর সৃষ্টি। বিশ্ব সম্মেলনর স্মরণিকাহানি নিকালানির পিসেদে গিরক সক্রিয়ভাবে আমার সাহিত্যরমা সামিল অইল। বিভিন্ন সাহিত্য পত্রিকাৎ গিরকর লেংকরা য়ারি প্রবন্ধ প্রকাশ অনি অকরল। গিরকর পইলা উপন্যাসহান ‘কার বিদা হাদি’ সাহিত্য পরিষদেত্ত ফণ্ডনির থাংনাৎ গিরকে সাহিত্যর ফালুৎ লেইচন্দন পেইল।

গিরকর থাংনাকার লেরিকহান ‘য়ারির ঝাকা’ লোককথার সংকলনহান। ‘বানাপানির সালে’ লেরিকএহান ইচুদিন গিরকর লেংকরা য়ারি যেতা বিভিন্ন সাহিত্য পত্রিকাৎ প্রকাশিত অসিল উতার পুল্লাপ সংকলনহান।

পাথারকান্দির খালপার লয়ার মঞ্জীগ্রামে গিরকর আদি গর অইলেউ এবাকা শিলচর বিবেকানন্দ রোডে গর পালয়া আসে।

প্রভাস কান্তি সিংহ বর্তমানে নিখিল বিষ্ণুপ্রিয়া মণিপুরী সাহিত্য পরিষদ আসাম রাজ্যিক কমিটির উপ-সভাপতিগ।